

123

অশোক-চরিত ।



শ্রীকৃষ্ণ বিহারী সেন
প্রণীত ।

Calcutta:

PRINTED BY LAHIRI AND MITRA AT THE ELM PRESS,
29, BEADON STREET, AND PUBLISHED BY
S. K. LAHIRI & CO., 54, COLLEGE
STREET, CALCUTTA.

1892.

[All rights reserved.]

ভূমিকা ।

ভারতের কোন ইতিহাস নাই। তবে একটি বিশেষ সময়ের অনেকগুলি ঘটনা বৌদ্ধ শাস্ত্র অনুসন্ধান করিতে করিতে পাওয়া গিয়াছে। সে সময়টি অশোকের সময়। নেপাল, সিংহল এবং ব্রহ্মদেশের ধর্ম সাহিত্য হইতে বৌদ্ধধর্মের ইতিহাস অনেকটা পাওয়া যায়। আর এক দিকে প্রিন্সেপ সাহেব অসাধারণ বুদ্ধি সহকারে অশোকের শিলাস্তম্ভ এবং প্রস্তর ফলকোপরি লিখিত ভাষা আবিষ্কার করিয়া পাঠকমণ্ডলীকে চির কৃতজ্ঞতা পাশে বদ্ধ করিয়াছেন। তিনি অশোকের আদেশগুলি অনুবাদ করিলে পর মহাত্মা Burnouf এবং Wilson তাহা পুনর্ব্বার অনুবাদিত করেন এবং মহাত্মা Cunningham সেই গুলি একত্রিত করিয়া উৎকৃষ্ট টীকা এবং অনুবাদের সহিত প্রকাশিত করেন। এতদ্ব্যতীত অশোকের বিষয়ক অনেকগুলি কথা মহাত্মা Burnouf কর্তৃক রচিত Introduction a l'histoire du Buddhismisme Indien, সিংহল দেশে প্রচারিত দ্বীপবংশ, এবং Bishop Bigandet কর্তৃক রচিত Vie ou Legende de Gaudama এই সকল পুস্তকে সঙ্কলিত আছে। সুতরাং ইতিহাসটি রচনা করিতে বিশেষ পরিশ্রম হইয়াছে। ঘটনা গুলিকে এক সূত্রে গ্রথিত করা এবং তাহাদিগের উপর মতামত প্রকাশ করা এতুইটা বিষয়ের দায়িত্ব লেখক সম্পূর্ণরূপে আপনার করিয়া লইয়াছেন। পাঠক মহাশয় সকল ত্রুটি মার্জ্জনা করিয়া যদি পুস্তকখানি আদ্যোপান্ত পাঠ করেন তাহা হইলেই আমি আমার সমুদয় পরিশ্রম সার্থক বোধ করিব।


“অশোক চরিত নাটক” খানি আলবার্ট কলেজের ছাত্রগণের অভিনয়ের জন্য রচিত হইয়াছিল। ইহাতে দুই একটি এরূপ ঘটনা বিবৃত আছে যাহা ইতিহাসের মধ্যে সন্নিবিষ্ট করিয়া দিতে পারি নাই। সেই জন্য ইহা পৃথক আকারে প্রকাশিত হইল।

উপসংহারকালে স্বীকার করিতেছি যে এই পুস্তকের প্রকৃষ্ট আলবার্ট কলেজের সংস্কৃতাধ্যাপক শ্রীযুক্ত বাবু রজনীকান্ত চট্টোপাধ্যায় এবং আমার পরম স্নহদ শ্রীযুক্ত বাবু জ্যোতিরিন্দ্রনাথ ঠাকুর আদ্যোপান্ত দেখিয়া দিয়াছেন। তাঁহাদিগের নিকট আমি চির কৃতজ্ঞতা ঋণে আবদ্ধ রহিলাম।

লেখক ।

সূচীপত্র ।

	পৃষ্ঠা
ধর্মরাজ্য বিস্তার	১
ধর্মপ্রচারের উপায়	৪
পালি ভাষার প্রকাশ	১৪
ভাষার ইতিহাস	২৩
দেশের অবস্থা	২৯
মৌর্যবংশ	৩৬
বৌদ্ধ অশোক	৪১
বৌদ্ধদিগের মহাসভা	৪৬
প্রচারক প্রেরণ	৫১
লঙ্কা	৫৩
স্তূপ এবং বিহার নির্মাণ	৫৯
তীর্থ দর্শন	৬৪
বিবিধ আদেশ প্রচার	৬৬
প্রস্তক ফলকের স্থান	৭৭
দেব দেবীতে বিশ্বাস	৮২
বৌদ্ধ সঙ্ঘ এবং শাস্ত্র	৮৬
প্রস্তর ফলক	৮৯
জীবে দয়া	৯২
বার্দ্ধক্য এবং মৃত্যু	৯৬
অশোক চরিত নাটক	১০৩



অশোক-চরিত ।

ধর্মরাজ্য বিস্তার ।

ঈশার জন্ম গ্রহণ করিবার ২৫৭ বৎসর পূর্বে, শাক্যসিংহের নির্বাণ প্রাপ্তির ২২২ বৎসর পরে অশোক বৌদ্ধধর্মের আশ্রয় অবলম্বন করেন । তাঁহার মহত্ব এবং পরাক্রমের সীমা ছিল না । আর্য্যাবর্তের সমস্ত রাজকুল তাঁহার আধিপত্য স্বীকার করিয়াছিলেন । মানচিত্র দেখিলেই তাঁহার রাজ্যসীমার বৃহত্ত্ব হৃদয়ঙ্গম করা যায় । পূর্বদিকে বঙ্গ এবং কামরূপ, দক্ষিণে কলিঙ্গ এবং বিষ্ণ্যচল, পশ্চিমে মহারাষ্ট্র, সুরাষ্ট্র, বিরাট, সমুদয় সিন্ধুতট এবং তক্ষশিলা এবং উত্তরে কাশ্মীর এবং হিমাচল । আর্য্যাবর্তের উপাধি তখন জম্বুদ্বীপ ছিল । তিনি ইহার চক্রবর্তী রাজা অর্থাৎ সম্রাট ছিলেন । ইহার অন্তর্গত সমস্ত ভূমি অশোকের সাম্রাজ্যভুক্ত ছিল । এবং কেবল তাহা নহে । জম্বুদ্বীপের চতুঃসীমান্ধ এবং দূরন্ধ যত প্রবল পরাক্রান্ত রাজা ছিলেন তাঁহার অশোকের সঙ্গে সন্ধি সংস্থাপন করিয়া বন্ধুতা শৃঙ্খলে আবদ্ধ হইয়াছিলেন । যে সকল জাতিরা তাঁহাকে সম্মান করিত তাহাদিগের কতকগুলি নাম পণ্ডিতদিগের নিকট পরিচিত আছে এবং কতকগুলি নিতান্ত নূতন এবং অশ্রুতপূর্ব বলিয়া বোধ হয় । অশোক নিজে তাহাদিগের নাম লিখিয়া গিয়াছেন, যথা, চোল, পাণ্ড্য, যোন, কাম্বোজ, নতক, নভপত্তি, ভোজ, পিতেনিক, অন্ধ্র এবং পুন্ড্রিক ।

ত্রৈতা যুগে রামচন্দ্র, দ্বাপরে পঞ্চপাণ্ডব, এবং কলিযুগে বিক্রমা-
 দিত্য, হর্ষবর্দ্ধন এবং আকবর;—অশোক এই সকল প্রতাপাশ্রিত মহী-
 পালদিগের সমকক্ষ ছিলেন। ভারতবর্ষে এই শ্রেণীর সম্রাট অধিক
 দেখা যায় না। এ দেশ সচরাচর অনেকগুলি ক্ষুদ্র ক্ষুদ্র রাজ্যে
 বিভক্ত থাকে। এবং মধ্যে মধ্যে একজন পরম তেজস্বী রাজপুরুষ
 আসিয়া সেই সকল রাজ্য অধিকার করেন ও তাহাদিগকে একত্রিত
 করিয়া একটা বৃহৎ সাম্রাজ্য স্থাপন করেন। ইহাও অতি আশ্চর্যের
 বিষয় যে ভারতে এই সকল সম্রাটের ইতিহাস প্রায় একটি একটি
 প্রকাণ্ড ধর্মবিপ্লব কিম্বা রাজ বিপ্লবের সহিত গ্রথিত। যখন
 দেশ পাপে কিম্বা দুরাচারে মগ্ন হয়, যখন কোন একটি নূতন ধর্মের
 আবির্ভাবকাল উপস্থিত হয়, কিম্বা যখন দেশকে অজ্ঞান রাশি হইতে
 বিমুক্ত করিবার প্রয়োজন হয়, তখনই এক একজন চক্রবর্তী রাজা
 আসিয়া ভগবানের ইচ্ছা সম্পাদন করিয়া চলিয়া যান। রাক্ষসেরা কি
 প্রকারে দেশ শাসন করে, দেবপ্রকৃতির লোকেরাই বা কিরূপে
 প্রজা পালন করেন, সত্যপালনই রাজত্বের ভিত্তিভূমি এবং
 অসত্যই সমাজ ও ধর্মের উচ্ছেদকারী, ইহা দেখাইবার জন্ম রামচন্দ্র
 ত্রৈতা যুগে মনুষ্য সমাজে অবতীর্ণ হন। পরে বৈষ্ণব ধর্ম সংস্থা-
 পিত হইবার পূর্বেই শ্রীকৃষ্ণ প্রেমরাজ্য বিস্তৃত করিতে আসিয়া-
 ছিলেন এবং তাহারই সহায়তায় ধর্মরাজ যুধিষ্ঠিরের বিস্তৃত
 সাম্রাজ্য সংস্থাপন করা আবশ্যক হইয়াছিল। অশোকও সেই মত
 বৌদ্ধধর্ম প্রচারের সহায় হইয়া একটি প্রকৃত সাম্রাজ্য স্থাপন
 করিয়াছিলেন। কোন একটি নূতন ধর্ম প্রতিষ্ঠিত করিতে গেলে
 প্রথমেই একটি সুস্থাপিত, সুশাসিত, সুবিস্তৃত রাজ্যের প্রয়ো-
 জন হয়। যদি দেশ নানাবিধ ক্ষুদ্র ক্ষুদ্র রাজ্যে বিভক্ত থাকে,
 তাহা হইলে এক রাজার দেশে যাহা হইতেছে তাহা অন্য
 রাজার দেশে সহজে প্রবেশ করিতে পারে না; রাজা রাজার

প্রতি হিংসা করে এবং প্রজায় প্রজায় চিরশত্রুতা ও বিবাদ চলিতে থাকে। নূতন ধর্ম সংস্থাপনের সময় সমস্ত বিঘ্ন বাধা চূর্ণ করিতে হয়। এক রাজ্য হইতে অন্য রাজ্যে যাইবার পথ পরিষ্কার রাখা চাই। এক নিয়মপ্রণালী রাজ্যময় স্থাপিত হওয়া আবশ্যিক। একই ভাষা সকল লোকের মধ্যে প্রচলিত থাকা চাই। তাহী একজন রাজার অধীনে থাকিলেই হইতে পারে, অনেক রাজা থাকিলে হয় না। এই জন্ম বিধাতা বিশেষ বিশেষ কালে আমাদিগের দেশে নূতন বিধান প্রচার করিবার সময় যেমন একটি একটি ভক্ত মহাপুরুষ আনিয়া দেন, তেমনি তাঁহার সঙ্গে সঙ্গে এক একজন চক্রবর্তী রাজাও অভিষিক্ত করিয়া পাঠান। এক ঈশ্বরের ধর্ম রাজ্য এক সম্রাটের পার্থিব রাজ্যে প্রতিষ্ঠিত হইবে। বৌদ্ধধর্ম একটি নূতন বিধান, দেশের পাপ ভার মোচন করিবার জন্ম প্রেরিত হইয়াছিল। তাহা প্রচার করিবার জন্ম শাক্য গোঁতম স্বর্গ হইতে অবতীর্ণ হইয়াছিলেন এবং তাহা প্রতিষ্ঠিত করিবার জন্ম অশোক এই সুবিশাল জম্বুদ্বীপে রাজাধিরাজ হইয়া প্রেরিত হইয়াছিলেন।

নূতন ধর্ম প্রচার করিবার পক্ষে যাহা যাহা সুবিধা তাহা সকলই অশোকের রাজত্বকালে ছিল। প্রথমতঃ, অশোকের প্রভাবে জাতীয় শত্রুতা প্রকাশিত হইবার কোন সম্ভাবনা ছিল না। তক্ষশিলার লোকেরা স্বভাবতঃ উদ্ধত এবং রণপ্রিয় ছিল। তাহাদিগের মধ্যে কোন নিরীহ নির্দোষ প্রচারক উপস্থিত হইলে তাহার প্রাণ লইয়া টানাটানি হইত। কিন্তু অশোকের ক্ষমতার কাছে সকলেই হীনপ্রভ। সুতরাং প্রচার কার্য সহজেই হইয়া যাইত। দ্বিতীয়তঃ, বৌদ্ধধর্ম কোন বিশেষ জাতীয় ধর্ম হইয়া আসে নাই। ইহা পৃথিবীর ধর্ম। জাতি নির্বিশেষে ইহা সকল লোককেই মুক্তির পথ প্রদর্শন করিতে আসিয়াছিল। সেই জন্ম জম্বুদ্বীপের বাহিরেও এ ধর্মের প্রচার আবশ্যক হইয়াছিল। অশোকের প্রবল প্রতাপ

বলে বিদেশীয় রাজারা তাঁহার সঙ্গে সন্ধিতে বদ্ধ ছিল। গ্রীস, মিসর, সিরিয়া, সিংহল এসকল দেশের লোকেরা আগ্রহের সহিত অশোকের ধর্মপ্রচারকদিগের কথা শুনিত। তৃতীয়তঃ, দেশময় ভাষার ঐক্য ছিল। পণ্ডিতেরা সংস্কৃত কহিতেন। কিন্তু সর্বসাধারণে পালি ভাষা ব্যবহার করিত। বুদ্ধদেবের নিকট একদিন কতকগুলি পণ্ডিত আসিয়া বলিলেন যে আপনার ধর্ম এত উচ্চ যে তাহা প্রচার করিবার জন্য অতি উচ্চতম ভাষার আবশ্যক। ইতর ভাষায় প্রচারিত হইলে ধর্মও ইতর হইয়া যাইবে। সেই জন্য ঐ ধর্ম সংস্কৃতে প্রচারিত হওয়া উচিত। বুদ্ধদেব তাঁহা-দিগের কথায় অসন্তুষ্ট হইলেন। তিনি বলিলেন, আমার ধর্ম দীন-হীন ইতর পাপীদিগের মুক্তির জন্য। এ শ্রেণীর লোকেরা সংস্কৃত কি বুঝিবে? সেই জন্য তিনি একটি নিয়ম করিয়া দিলেন যে তাঁহার ধর্ম কেহ কখন যেন সংস্কৃতে প্রচার না করে; দেশীয় ভাষায় প্রচারিত হইবে। অশোকের রাজ্যে পালি বলিয়া একটি ভাষাই ব্যবহৃত হইত এবং তাহা লিখিবার জন্য দুই প্রকার অক্ষরমালা প্রচলিত ছিল। সে অক্ষরের ক খ প্রভৃতির নাম এক ছিল, কিন্তু আকার ভিন্ন ছিল। ভাষা এক, অক্ষরের নাম এক, কিন্তু আকার ভিন্ন। এই জন্যই নবধর্ম প্রচার করিবার পক্ষে সকল সুবিধাই অশোকের সময়ে বর্তমান ছিল। বাস্তবিক সেই সময়ে অশোকের মত একজন সম্রাটের রাজসিংহাসনে উপবেশন করা আবশ্যক হইয়াছিল।

ধর্ম প্রচারের উপায় ।*

কিরাপে এই নবধর্ম সর্বসাধারণের মধ্যে প্রচারিত হইবে? অশোকের মনে এই প্রশ্ন প্রথমেই উত্থিত হইল। তাঁহার অসা-

ধারণ বুদ্ধিবলে শীঘ্রই তিনি একটি সিদ্ধান্তে উপনীত হইলেন। প্রথমতঃ, সর্ব্বাঙ্গে ধর্ম্মের একতা স্থাপিত হওয়া আবশ্যক। নানা মুনির নানা মত হইলে লোকদিগের মুক্তির পথে ব্যাঘাত হইবে। একজন বলিবেন, আমি ধর্ম্ম এইরূপ করিয়া বুঝি। আর একজন বলিবেন, না, এইরূপ অর্থই হইতে পারে। এ প্রকার মত ভেদ হইলে ধর্ম্ম গ্রহণ করিবার পক্ষে মহা ব্যাঘাত আসিয়া পড়ে। এই জন্ত অশোক পাটলিপুত্র নগরে বৌদ্ধ ভিক্ষুদের এক মহা সভা আহ্বান করেন। সেই সভায় বৌদ্ধধর্ম্ম কি এবং তাহার মূল মন্ত্র কি কি তাহা সূক্ষ্ম-ভাবে স্থিরীকৃত হয়। দ্বিতীয়তঃ, যখন ধর্ম্ম স্থির হইল তখন তাহা প্রচার করিবার জন্য লোকের আবশ্যক। ভারতে প্রচারক দিয়া ধর্ম্ম প্রচার কখন হয় নাই। বুদ্ধ এই পদ্ধতির সূত্রপাত করেন। তাহার পরে ঈশা, মহম্মদ প্রভৃতি মহাপুরুষেরা সেই রীতি অনুযায়ী নিজ নিজ ধর্ম্ম প্রচার করিয়াছিলেন। অশোকের প্রচার-কেরা ভারত ছাড়িয়া নানা দেশ বিদেশে বৌদ্ধধর্ম্মের জয় কীর্ত্তন করিতে লাগিলেন। পশ্চিমে গ্রাস, এপিরাস, সিরিয়া এবং মিসর; উত্তরে তাতার এবং কাবুল; এবং দক্ষিণে সিংহলদ্বীপ—এই সকল স্থানে নবধর্ম্মের কীর্ত্তি স্থাপিত হইয়াছিল। মিসরদেশে অ্যালেক-জান্দ্রিয়া নগর তখন ইয়ুরোপ এবং এসিয়ার মধ্যবর্ত্তী, প্রকাণ্ড সন্ধি-স্থল ছিল। একদিক হইতে গ্রীকদিগের সাহিত্য, দর্শন এবং বিজ্ঞান এবং অপরদিক হইতে ভারতবর্ষের ধর্ম্মবিজ্ঞান এবং দর্শন শাস্ত্র প্রবাহিত হয়। এইরূপ পূর্ব্ব পশ্চিমের ভাব একাধারে মিশ্রিত হইয়া একটি নূতন দর্শন শাস্ত্র রচিত হইল। সেই শাস্ত্রে প্লেটোর বিচিত্র ভাব সকল পতঞ্জলি কৃত যোগের সহিত মিশ্রিত হইয়া যায়। সেই শাস্ত্রে অবশেষে ঈশাই-ধর্ম্মের সত্য আসিয়া পড়ে। এই তিন স্রোত এক হইয়া প্রথম তিন শতাব্দীর খ্রীষ্টীয় ধর্ম্মে পরিণত হয়। ঈশাই-ধর্ম্ম প্রণালী দেখিয়া অনেকে অনেক সময় আশ্চর্য্য

হইয়া থাকেন । তাঁহারা দেখেন যে রোমান ক্যাথলিকদিগের মধ্যে এমন নিয়মাবলি আছে যাহার অনেক অংশের সহিত ভারতের ধর্ম্মের সৌসাদৃশ্য আছে । বাস্তবিক আশ্চর্য্য হইবার কোন কারণ নাই । যাঁহারা বলেন যে ঈশা বৌদ্ধধর্ম্ম হইতে সত্য শিক্ষা করিয়াছিলেন তাঁহারা বিধানশাস্ত্রের গুঢ় তত্ত্ব ভাল করিয়া অনুধাবন করিয়া দেখেন নাই । একটি একটি বিধান একটি একটি নূতন ভাব লইয়া পৃথিবীতে আসে এবং সেই ভাবটি একটি বিশেষ সমাজ কিম্বা বিশেষ সময়ের অভাব পূরণ করিবার জন্য গঠিত হইয়া থাকে । ঈশার ধর্ম্ম ইহুদিদিগের সমাজ হইতে উৎপন্ন । কিন্তু ইহা কেবল ইহুদিদিগের পরিত্রাণের জন্য আসে নাই । সেই সময়ে গ্রীস এবং রোমে যে সকল ভয়ানক পাপ এবং পাপপ্রবর্তক ধর্ম্ম প্রচলিত ছিল তাহাদিগকেও উৎপাটন করা ইহার কার্য্য ছিল । তখন যে সকল ভয়ানক পাপ পৃথিবীতে প্রচলিত ছিল তাহা শুনিলে কর্ণে হস্ত দিতে হয় । ইহা সত্য যে সেই সময়ে যদি ঠিক ঈশা বলিয়া একজন মহাপুরুষ না আসিতেন তাহা হইলে পৃথিবীকে নিজ পাপ ভারেই রসাতলে যাইতে হইত । ঈশাকে যে লোকে পরিত্রাতা বলে তাহার অনেক কারণ আছে । বাস্তবিক তিনি পরিত্রাতা ছিলেন । তাঁহার জন্য তখনকার পাপ সকল একেবারে বিনষ্ট হইয়া যায় এবং সেই সময় হইতে পৃথিবী নূতন ভাবে নূতন বলে সত্যের দিকে অগ্রসর হইতে থাকে । যদি বৌদ্ধধর্ম্মের বিষয় আলোচনা করি তাহা হইলে এই প্রতীতি হয় যে শাক্য-সিংহ এদেশের জন্য প্রেরিত হইয়াছিলেন । তাঁহার মত-সকল অন্য দেশের লোকেরাও অবলম্বন করিয়াছিল, সত্য । কিন্তু যে সকল অভাব দূর করিবার জন্য তাঁহার ধর্ম্ম এখানে আগমন করে, সেই সকল অভাব এ দেশেই বর্ত্তমান ছিল । যাগ যজ্ঞ ক্রিয়া-কলাপ, বাহ্যিক ধর্ম্ম, এবং ঘোর কপটতা হইতে ভারতকে নিস্তার করি-

বার জন্মই তিনি “প্রকৃত ধর্ম মনের ভিতর” এই সত্যটি প্রচার করিতে আসেন। তাঁহার মতে বাহিরের ধর্ম কিছুই নহে। ঈশ্বরকে না জানিয়া ঈশ্বরের বিষয় নির্ণয় করা পাংগলের কথা। কেহই অস্তুরে পবিত্র না হইলে ঈশ্বর তত্ত্ব বুঝিতে পারে না। প্রকৃত ধর্মের মূল নির্ব্যাণ—কামনা অগ্নিকে একেবারে নির্ব্যাণ করা। এধর্ম ঈশ্বরবাদ অধিক নাই। ইহা কেবল বিশুদ্ধ নীতিমূলক। ইহাতে এবং খ্রীষ্টীয়ধর্মে অনেক প্রভেদ। দুইটি ভিন্ন ভিন্ন ভাবমূলক, দুইটি দুই রকম অভিন্ন যোচনার্থ প্রেরিত। স্মরণ্যঃ কেহ কাহারও হইতে অপহরণ করে নাই। দুইটিই বিধান, দুইটিই সত্য, দুইটিই নূতন, দুইটিই স্বতন্ত্র।

কিন্তু যদিও এই দুই ধর্ম পৃথক এবং ইহাদিগের উদ্দেশ্য ভিন্ন ভিন্ন, তথাপি নিয়মাদি বিষয়ে স্পর্শ দেখা যায় যে ইউরোপ ভারত হইতে কতকগুলি বিশেষ শিক্ষা লাভ করিয়াছিল। রোমান ক্যাথলিক ধর্ম রাজকের সম্মুখে পাপ স্বীকার পদ্ধতি প্রচলিত। তথায় যোন্নাফারী এবং নানারি অর্থাৎ ভিক্ষু ভিক্ষুণীদিগের জন্য বিহার এবং আশ্রম আছে। সেই সকল ভিক্ষু এবং ভিক্ষুণীরা বিবাহ করিতে পারে না। তাহাদিগকে সংসার পরিত্যাগ করিয়া থাকিতে হয়। সেখানে একজন প্রধান ধর্ম পুরুষ (পোপ) আছেন। উপাসনার সময় ধূপ ধূনা প্রজ্জ্বলিত হয়। ঘণ্টা বাজে। মুনিরা মরুভূমিতে এবং পর্বত গুহায় বাস করে। উপবাস প্রভৃতি নানা প্রকার উপায়ে শরীরকে কষ্ট দেওয়া পাপ ত্যাগ সম্বন্ধে প্রধান সহায় বলিয়া বিবেচিত হয়। এইরূপ নানাবিধ নিয়ম প্রণালী এত স্পর্শতঃ ভারতজাত যে তাহাদিগের মধ্যে কতকগুলি কোম কালে ইউরোপীয় বলিয়া বোধ হয় না। জম্বুদ্বীপ হইতে সেই সকল শিক্ষা সেখানে গিয়াছে ইহাই বোধ হয়। অশোক যে সকল প্রচারক ইউরোপে পাঠাইয়াছিলেন তাঁহারা বৌদ্ধধর্মের নিয়মাবলি সেখানে প্রচার করেন, ইহার প্রমাণ অশোকের কথা হইতেই পাওয়া যায়। এতদ্ব্যতীত গ্রীক এবং রোম্যান লেখকদিগের লিখিত

পুস্তক সকলে ভারতের বিষয় এমন সকল কথা পাওয়া যায় যাহাতে স্পষ্ট প্রতীতি হয় যে পূর্বকালে এদেশে এবং ওদেশে বিশেষ ঘনিষ্ঠতা ছিল । অ্যাপুলিয়াস নামক একজন সুপ্রসিদ্ধ লেখক ভারতের সুখ্যাতি করিতে করিতে বলিতেছেন:—“ভারতকে আমি অতিশয় শ্রদ্ধা করি । তাহার কারণ ইহা নহে যে সে দেশে হস্তীর দন্ত রাশি রাশি পাওয়া যায়, কিম্বা সেখানে মরিচের প্রচুর ফসল হয়, কিম্বা সেখানে দারুচিনির ব্যবসা হয়, কিম্বা সেখানকার লোহ অতিশয় স্থায়ী এবং কঠিন, কিম্বা সেখানে রোপ্যের খনি আছে এবং সেখানকার নদী সকল স্বর্ণে পূর্ণ । ইহাও কারণ নহে যে সেখানকার প্রাকৃতিক পদার্থ সকল অতি আশ্চর্য্য । প্রকৃতি ত আশ্চর্য্যই, কিন্তু সেখানকার মানুষ আরও আশ্চর্য্য । কৃষি ব্যবসা এবং যুদ্ধ শাস্ত্রে অনেকেই নিপুণ । এতদ্ব্যতীত সেখানে ঋষি বলিয়া এক শ্রেণীর লোক আছে । তাহারা ভূমি কর্ষণ করে না, দ্রাক্ষা রস হইতে সুরা প্রস্তুত করে না, অশ্ব কিম্বা বৃষ প্রভৃতি পশুকে বশীভূত করে না । তাহারা গুরু শিষ্যে কেবল জ্ঞানের চর্চা করে । আলস্য এবং জড়তাকে তাহারা সর্ব্বোপেক্ষা ঘৃণা করে । আহারের সময় উপস্থিত হইলে শিষ্যেরা ভোজনের স্থানে উপস্থিত হয় । ভোজন আরম্ভ হইবার পূর্বে গুরু শিষ্যদিগকে জিজ্ঞাসা করেন, তোমরা সূর্য্যোদয় হইতে এখন পর্য্যন্ত কি কি কার্য্য করিয়াছ বর্ণনা কর । একজন বলিল, দুইজন লোক বিবাদ করিতেছিল । তাহারা আমাকে মধ্যস্থ মানিল । আমি তাহাদিগের পরস্পরের ঘৃণা কমাইয়া দিয়াছি এবং তাহাদিগের সন্ধিভাব দূর করিয়া হৃদয়কে মিত্রতার স্তম্ভিভাবে পূর্ণ করিয়াছি । আর একজন বলিল, আমি পিতামাতার আজ্ঞা পালন করিয়াছি । আর একজন বলিল, আমি গভীর চিন্তায় নিমগ্ন থাকিয়া একটি সত্য আবিষ্কার করিয়াছি । সকলেই বাহা বাহা করিয়াছে গুরুর সম্মুখে বলিল । যে অলস হইয়া কিছুই করে নাই সে সেদিনকার আহার পাইল না । শূন্য উদরে তাহাকে

পুনর্ব্বার কার্য্যক্ষেত্রে যাইতে হইল। আপুলিয়াস ১১৪ খ্রীঃ অব্দে জন্ম গ্রহণ করিয়াছিলেন।

মহারাক্ষ্ট্র দেশে পাণ্ড্য বলিয়া একজন রাজা ছিলেন। তিনি রোমের সম্রাট অগাফাস সিজারের নিকট কতকগুলি রাজদূত প্রেরণ করেন। তাহাদিগের সঙ্গে একজন সন্ন্যাসীও প্রেরিত হইয়া ছিলেন। অগাফাস তখন আথেন্স নগরে বাস করিতেছিলেন। ব্রাহ্মণ কিছুদিন সেখানে অবস্থিতি করিয়াই জীবনে বীতস্পৃহ হইয়া চিত্তাধিরোহণ করিয়া প্রাণত্যাগ করেন। অগাফাস সেই স্থানে উপস্থিত থাকিয়া সকলই দেখিয়াছিলেন এবং গ্রীকেরা একরূপ অপূর্ব্ব ঘটনা দেখিয়া আশ্চর্য্যাব্বিত হইয়াছিল। যেখানে ব্রাহ্মণের ভস্ম পড়িয়া ছিল, সেই খানে তাহারা একটি সমাধি স্থাপন করিয়া দেয়। সেই সমাধির উপর নিম্নলিখিত কয়েকটি বচন লিখিত ছিল :—

“বরগোজা হইতে যে শম্মর্গাচার্য্য আসিয়াছিলেন তাঁহার ভস্ম এই স্থানে একত্রিত করা আছে। তাঁহার দেশের আচার অনুসারে তিনি এই খানে দেহ ত্যাগ করিয়াছিলেন।” খ্রীষ্টের শিষ্য সেন্টপল এক স্থানে বলিয়া গিয়াছেন যে “আমি আমার শরীরকে ভস্মসাৎ করিতে পারি, কিন্তু যদি আমার প্রেম না থাকে, তাহা হইলে শরীর দাহতে কোন উপকার নাই।” কেহ কেহ বলেন যে সেন্ট পল যখন এই ছত্রটি রচনা করিতেছিলেন তখন নিশ্চয়ই তিনি বরগোজার শম্মর্গাচার্য্যের বিষয় ভাবিতেছিলেন। অগাফাস সিজার পৃথিবীপতি ছিলেন। তাঁহার সম্মুখে এত বড় ব্যাপার হইয়াছিল, তাহা দেখিয়া সকলেই চমকিত হইয়াছিল সন্দেহ নাই। ইহা সম্ভব বলিয়া বোধ হয় যে সেন্ট পল যখন আথেন্স নগরে উপস্থিত হন তখন তিনি সেই সমাধি দেখিয়াছিলেন এবং সেই সময়ে সহজেই তাঁহার মনে প্রেমহীন আত্মবিসর্জনের কথা আসিবে ইহা আর আশ্চর্য্য কি ? ঈশা প্রেমে, অনুরাগে উত্তেজিত হইয়া প্রাণ দান করিয়াছিলেন, আর এই

শম্মগাচার্য্য সংসারে বিরাগী হইয়া, স্বার্থ চরিতার্থ করিবার জন্ত প্রাণত্যাগ করেন। সেণ্ট পলের মনে নিশ্চয়ই এইরূপ একটি ভাব আসিয়াছিল। এই স্থলে বলা উচিত যে বরগোজাকে এখন বেরোচ বলে। ইহা বম্বে প্রদেশের একটি সহর।

ইতিহাসে লিখিত আছে যে আলেকজান্ডারের ভারত হইতে প্রত্যাগমন, 'কালে কল্যাণ পণ্ডিত তাঁহার সহবাত্রী হন। তিনি পথিব্যে জীবনে বিরাগী হইয়া সম্রাটের সম্মুখে অগ্নিতে দগ্ধ হইয়া প্রাণত্যাগ করেন। ফিলিপ পুত্র আলেকজান্ডারের সহিত ঋষি ও সন্ন্যাসীদিগের যে সকল বিষয়ে কথোপকথন হইয়াছিল তাহা প্লুটার্কের গ্রন্থে স্থূললিত ভাষায় বিবৃত আছে।

এদেশীয়দিগের সহিত ইউরোপবাসীদিগের যে অনেক স্থলে অনেক বিষয় লইয়া পরস্পর সাক্ষাৎ হইত এবং লেখালেখি চলিত তাহার প্রমাণ পাওয়া যায়, এবং আমাদিগের যোগ শাস্ত্র যে ঈশাই-ধর্ম্মের উপর একটি বিশেষ শক্তি সঞ্চারিত করিয়াছিল তাহারও প্রমাণ আছে। ইহাতেই প্রতীয়মান হয় যে খ্রিষ্টীয় ধর্ম্মের নিয়মাবলী অনেকাংশে যৌদ্ধ এবং ভারতের আর্য্য ধর্ম্মের নিকটে ঋণী।

তৃতীয়তঃ, প্রজাদিগকে ধর্ম্মের পথে রাখিবার জন্ত অশোক ধর্ম্ম-মাত্রা নাম দিয়া কতকগুলি নীতির উপদেষ্টা নিযুক্ত করেন। তাহার প্রাক্ষণ, ক্ষত্রিয়, বৈশ্য, শূত্র সকল শ্রেণীর আচার, ব্যবহার, রীতি এবং নীতি পর্য্যবেক্ষণ করিত এবং চুরাচার দেখিলেই মহারাজাকে তদ্বিষয়ে অবগত করাইত। কেবল ভারতে নহে। যোন, কাশ্মোজ, গান্ধার, নরাস্তিক, পেতেনিক প্রভৃতি অপরান্ত প্রদেশে যে সকল অগ্ধধর্ম্মাবলম্বী বাস করিত, তাহাদিগেরও রীতি নীতি দেখিবার ভার ইহাদিগের উপর ছিল।

চতুর্থতঃ, সে সময় মুদ্রাঙ্কন প্রথা ছিল না। পুস্তক কিম্বা গেজেট প্রকাশ এখনকার রাজপুস্তকেরা যেমন প্রজাদিগের জ্ঞাপনার্থ নিয়মাদি

প্রকাশ করেন, তখন সেরূপ ছিল না। অথচ নব ধর্মের মত এবং মহারাজার তদ্বিষয়ক অনুজ্ঞা প্রজাদিগকে অবগত করান অত্যাশঙ্ক বলিয়া বোধ হইয়াছিল। অশোক একটি আশ্চর্য্য প্রণালী অবলম্বন করিয়া এই উদ্দেশ্য সাধন করিয়াছিলেন। তিনি সাম্রাজ্যের ভিন্ন ভিন্ন অংশে শিলাস্তম্ভ এবং প্রস্তর কলক প্রতিষ্ঠা করিয়াছিলেন। তাঁহার যে সকল আজ্ঞা ও নিয়ম সময়ে সময়ে প্রকাশিত হইত তাহা হৃন্দর গরিষ্ঠার অঙ্করে এই সমুদয় স্তম্ভে ও কলকে খোদিত করা হইত। অশোক আপনার মস্তিষ্ক হইতে যে এই প্রণালীটি উদ্ভাবিত করিয়াছিলেন তাহা আমাদের স্থির করিবার কোন উপায় নাই। তবে এই পর্য্যন্ত বলিতে পারা যায় যে শিলাস্তম্ভ সকল ইহার অগ্রে ইরানে প্রচলিত ছিল। ডেরাইয়াস পারস্য দেশের “ক্ষায়থিয় ক্ষায়থিয়ানাম” অর্থাৎ রাজাধিরাজ ছিলেন। তাঁহার লিখিত একটি ইতিহাস বিহিস্থান নামক স্থানে পর্বতউপরি খোদিত আছে। তবে ডেরাইয়াস নিজ মহিমা দেশ বিদেশে প্রচার করিয়াছিলেন। অশোক এই সকল স্তম্ভে কেবল ধর্মের মহিমা কীর্তন করিয়াছিলেন। ভারতে এবং অন্যান্য দেশে এই প্রভেদ! এই সকল খোদিত অঙ্কর ২১০০ বৎসর ধরিয়া অবস্থিতি করিতেছে। অথচ এতদিন কেহ তাহাদিগের তাৎপর্য্য হৃদয়ঙ্গম করিতে পারে নাই। ঈশা জন্মাইবার ২৬০ বৎসর পূর্বের অশোক মগধের রাজসিংহাসনে আরোহণ করেন এবং তাঁহার প্রথম আজ্ঞা খ্রীষ্টাব্দের ২৫১ বৎসর পূর্বের খোদিত হয়। সুতরাং এই সকল কলকের বয়ঃক্রম আজ ২১৪৩ বৎসর হইল। অশোকের রাজ্য অল্পকাল স্থায়ী ছিল এবং তাঁহার উত্তরাধিকারীরা সকলে বৌদ্ধ ছিলেন না। তিনি গেলেন; তাঁহার রাজত্ব গেল, এবং সঙ্গে সঙ্গে তাঁহার ভাষাও গেল। তাঁহার সময়ে সংস্কৃত চলিত ভাষা ছিল না। পালি ভাষায় প্রজাবর্গ কথা কহিত। এখন

কার চলিত ভাষা সকল এই পালির রূপান্তর মাত্র। কিন্তু ইহাতে এখন পর্য্যন্ত সংস্কৃতের বিভক্তি সকল ছিল। তবে উচ্চারণের অপভ্রংশ এবং তাহার সঙ্গে সঙ্গে বানানের বিকৃতিও হইয়াছিল। সংস্কৃতের সর্বত্র সুন্দর অক্ষরমালা লোকে উচ্চারণ করিতে পারিত না। দেশ ভেদে, কাল ভেদে, অবস্থা ভেদে লোকদিগের তালু এবং জিহ্বা রূপান্তর প্রাপ্ত হয়। আমরা যে অক্ষর উচ্চারণ করিতে পারি সাহেবেরা তাহা পারে না। আমরা ত বলিতে পারি ইংরাজেরা তাহা ট বলিয়া থাকে। আবার মনুষ্যদিগের রসনা স্বভাবতঃ অলস। একটি কথা সম্পূর্ণরূপে উচ্চারণ করিতে চাহেনা। যেখানে কথাটি “প্রিয়দর্শী” সেখানে লোকে “পিয়দর্শী” বলে; রেফ ও র ফলাটি একেবারে ছাড়িয়া দেয়। যাহা হউক বৎসরের পর বৎসর চলিয়া গেল। তাহার সঙ্গে অশোকের ভাষাও লোকের স্মরণ পথ হইতে বিলুপ্ত হইল। অশোকের স্তম্ভ ও ফলক সকল যেখানে প্রতিষ্ঠিত হইয়াছিল সেই স্থানেই রহিয়া গেল। কিন্তু লোকেরা ইহা কি, কে করিয়াছিল কিম্বা ইহার তাৎপর্য্য কি একেবারে ভুলিয়া গেল। উপধর্ম্ম এবং কুসংস্কার আসিয়া এ সকলকে দৈবকার্য্য বলিয়া প্রতিপন্ন করিল। দেবতারা নিজে আসিয়া এই সকল অক্ষর লিখিয়াছেন তাহা মানুষে কিরূপে অর্থ করিতে পারিবে? এই প্রকারে এই সকল শিলা এবং প্রস্তর কালক্রমে বৃক্ষ লতা ও শৈবাল দ্বারা আচ্ছাদিত হইল। কোন কোনটাকে লোকেরা চূর্ণ করিয়া ফেলিল। কত স্থানে অক্ষর সকল বিলুপ্ত হইয়া গিয়াছে। সংসারের সকলই যে অসার এই তাহার প্রমাণ। অশোক রাজাধিরাজ ছিলেন। তাঁহার মহিমা চিরস্মরণীয় করিবার জন্য তিনি পর্ব্বতোপরি নিজ ইতিহাস খোদন করিয়া যান। কিন্তু কাল অতি নির্দয়, কালের মহিমা রাজাধিরাজের অপেক্ষা অধিক। দুই সহস্র বৎসর পূর্ব্বের যে লোক জন্ম-স্থানে বাস করিত সে যদি এখন আবার আসিয়া এই দেশকে দেখে,

কত পরিবর্তন তাহার নয়ন গোচর হইবে । জম্বুদ্বীপ নামের পরিবর্তে ভারতবর্ষ নাম হইয়াছে । তাহার পর আবার পারসীকেরা আসিয়া এদেশের নাম হিন্দু এবং লোকদিগের নাম হিন্দু রাখিল । সিদ্ধুকুলে বাস করিত বলিয়া লোকদিগের নাম হিন্দু হইল এবং সিদ্ধু, শতদ্রু, চন্দ্রভাগা, ইন্দ্ৰাবতী, বিতস্তা, বিপাসা এবং সরস্বতী এই সপ্ত নদী দ্বারা পঞ্জাব অভিবিক্ত ছিল বলিয়া তাহাকে হপ্ত হিন্দু (সপ্ত-সিদ্ধু) বলিয়া ডাকিত । পারসীকভাষা সংস্কৃতের রূপান্তর । কিন্তু যেখানে সংস্কৃতে স সেখানে পারসীকে হ হয় । পরে গ্রীকেরা আসিয়া একেবারে নামের অপভ্রংশ করিয়া দিল । তাহারা সিদ্ধু উচ্চারণ করিতে পারিত না বলিয়া তাহার নাম ইনডাস দেয়, এবং সেই কারণেই ভারতের নাম ইণ্ডিয়া হইল । গঙ্গা গ্যাঙ্গেস নাম প্রাপ্ত হইল । প্রাচ্য (পূর্বদিকস্থ দেশ) সকলকে তাহারা প্রাসি বলিয়া ডাকিত । এইরূপে দুই সহস্র বৎসর পূর্বে যে লোক জন্মিয়াছিল সে যদি আবার জন্মগ্রহণ করিয়া এখানে অবতীর্ণ হয়, তাহা হইলে সে দেখিবে যে দেশের নাম আর সে নাম নাই এবং দেশের লোকদিগকে আর সে নামে ডাকা হয়না । আর সে জাতি সমুদয়ও নাই । ব্রাহ্মণেরা আর সে ব্রাহ্মণ জাতি নাই । ক্ষত্রিয়কুল ধ্বংস হইয়া গিয়াছে । বৈশ্য-জাতি লোপ পাইয়াছে । এখন দেশ কেবল ব্রাহ্মণ এবং শূত্রের দ্বারা পরিপূর্ণ । শূত্রদিগের মধ্যেও নূতন নূতন জাতি আসিয়া পড়িয়াছে । সে ভাষাও নাই । এখন যদি সেই লোকটি আসিয়া আমাদিগের সঙ্গে অশোকের ভাষায় কথা কহে আমরা তাহাকে পাগল বলিয়া স্থির করি । ভাষা, রীতি, নীতি সকলই পরিবর্তিত হইয়াছে । কালের ধর্ম্মই এই !

পালি ভাষার প্রকাশ ।

ইউরোপীয় পাণ্ডিতদিগের নিকট অশোকের নামের খুড় আদর । তাহার একটি কারণ এই যে অশোক কর্তৃক খোদিত স্তম্ভ এবং ফলক হইতে ভারতের ইতিহাস কিঞ্চিৎ পরিমাণে স্থিরীকৃত হইয়াছে । দুই সহস্র বৎসর কাল এই সকল ফলক স্থানে স্থানে পড়িয়াছিল । ইংরাজেরা ঐ সকল লেখা দেখিয়াও তাহার মর্ম্ম ঠিক করিতে পারেন নাই । অবশেষে প্রিণসেপ নামক একজন অসাধারণ ধীসম্পন্ন পাণ্ডিত এই সকল লেখার নকল লইয়া তাহাদিগকে পরস্পর মিলাইতে লাগিলেন । মহাপুরুষেরা একটি সামান্য মাত্র সন্ধেত পাইয়াও অতি আশ্চর্য্যজনক তথ্যের আবিষ্কার করেন । প্রিণসেপ সাহেব সেই লেখা গুলি একত্র করিয়া দেখিলেন যে তন্মধ্যে অনেকগুলি মন্দির সমূহে খোদিত ছিল । সুতরাং সেগুলি দান পত্র হইবে এবং যাহারা মন্দির প্রতিষ্ঠা করিয়াছিলেন তাঁহাদিগের নাম, প্রতিষ্ঠার তারিখ, কোন্ রাজার সময় সেই সকল দান দেওয়া হইয়াছিল এই সকল বিবরণ তাহাতে লিখিত থাকিবে এই অনুমান করিলেন । এই ভাবিয়া তিনি “দান” এই কথাটি তন্মধ্যে অনুসন্ধান করিতে লাগিলেন । তিনি দেখিতে পাইলেন যে সকল লেখার শেষ কথা এক প্রকারের । সুতরাং এই প্রতীয়মান হইল যে একথাটি দা—ন হইবে । নাগরী, দেবনাগরী প্রভৃতি অক্ষর মালার সহিত তুলনা করিয়া স্পষ্ট তাহা দা—নই বলিয়া প্রতীয়মান হইল । এইরূপে ক্রমে ক্রমে একটি অক্ষরের পর আর একটি অক্ষর বাহির হইয়া পড়িল । অবশেষে সমুদয় ভাষাও স্থিরীকৃত হইল । একটা যেন নূতন জগত আবিষ্কৃত হইয়া গেল । কোথা হইতে অন্ধকার মধ্যে একটা নূতন সূর্য্য যেন বক বক করিয়া

উদয় হইল । ভাষা ঠিক করিতে অধিক কষ্ট হইল না । কেননা সিংহল দ্বীপে এখনও পালি ভাষাতে বৌদ্ধ শাস্ত্র লিপিবদ্ধ আছে । তাহার সঙ্গে অশোকের ভাষার কতকটা সৌসাদৃশ্য দেখা যায় । এতদ্ব্যতীত সংস্কৃতের সমুদয় বিভক্তি ইহাতে স্পষ্টভাবে কিম্বা অস্পষ্টভাবে বর্ত্তমান আছে । সুতরাং খোদিত ভাষার তাৎপর্য বুঝিতে অধিক দিন লাগিল না । ভারতে ভাষায় ভাষায় অনেক ঐক্য আছে । যে বাঙ্গালা জাতি তাহার পক্ষে হিন্দির গুঢ় তত্ত্ব অধিক দিন অগ্রকাশিত থাকে না । ‘তুলনার পদ্ধতি’ অবলম্বন করিলে যে সকল শাস্ত্র এখন বুঝিতে কষ্ট হয় তাহা একেবারে সহজ হইয়া যায় । এই পদ্ধতি অবলম্বন করাতে যে সকল তত্ত্ব জানিবার কোন সম্ভাবনা ছিল না তাহা স্পষ্টরূপে হৃদয়ঙ্গম হইয়াছে ।

যে ভাষা প্রকাশিত হইল তাহা এখনকার কোন চলিত ভাষার সহিত মিলেনা । সিংহল দেশে যে পালিতে বৌদ্ধ শাস্ত্র লিখিত আছে ইহা তাহা নহে । বরং সংস্কৃতের সঙ্গে ইহার অধিকতর ঘনিষ্ঠতা । বোধ হয় যে সেই সময়ে মগধ রাজ্যে ইহা চলিত ভাষা ছিল । তাহা পরিবর্তিত হইতে হইতে ভিন্ন ভিন্ন প্রদেশে ভিন্ন ভিন্ন রূপ ধারণ করিয়াছে । সেই পালি রূপান্তরিত হইয়া অবশেষে আধুনিক চলিত ভাষায় পরিণত হইয়াছে । এই সকল ভাষা পর্যালোচনা করিলে ভাষাশাস্ত্রের মূল তত্ত্ব অনেকটা অবগত হওয়া যায় । একটি দৃষ্টান্ত দেখিলে একথা সপ্রমাণ হইবে ।

স্তম্ভ এবং কলকের অনেক স্থানে একটি বিশেষ নাম দৃষ্টি গোচর হয় । সকল গুলিতে লেখা আছে “দেবানাম্ পিয় পিয়দনী” এখন “দেবানাম্ পিয় পিয়দনী” কে ? প্রথমে দেখিলেই “দেবানাম্” শব্দের অর্থ “দেবতাদিগের” ইহা স্পষ্ট বুঝা যায়, “পিয়” কথাটি “প্রিয়” এবং “পিয়দনী” “প্রিয়দর্শী” । কথা গুলি তুলনা করিয়া দেখিলে বুঝিতে পারিব যে তখন ভারতের সকল অংশে এক

কথা সমান রূপে উচ্চারিত হইত না । কোন কোন প্রদেশে “র” এই অক্ষর উচ্চারণ করিবার ক্ষমতা একেবারে ছিল না । মগধ দেশের লোকেরা ইহার পরিবর্তে “ল” ব্যবহার করিত । সেই জন্য অনেকগুলি ফলকে ‘রাজ’ না হইয়া ‘লাজ’ লিখিত আছে, ‘অন্তরম’ পরিবর্তে ‘অন্তলম’, ‘চরণ’ পরিবর্তে ‘চলণ’ এবং ‘দশলখ’ পরিবর্তে ‘দশলথ’ ইহাও দেখা যায় । “র” অক্ষর উচ্চারণ করিবার ক্ষমতা মগধের লোকদিগের ছিলনা । উত্তর এবং মধ্য ভারতে, এবং কলিঙ্গ প্রভৃতি স্থানে “র” উচ্চারিত হইত । আবার দেখা যায় যে পঞ্জাব প্রদেশে রফলা এবং রেক ব্যবহৃত হইত, এবং সাহাবাজগর্হি নামক স্থানে যে ফলক বর্তমান আছে তাহাতে “প্রিয় “ও” দর্শী” এতুটি কথাই লেখা আছে । কিন্তু সুরাষ্ট্র (গুজরাট) প্রভৃতি স্থানে ‘পিয়’ এবং ‘দর্শী’ এইরূপ লেখা দৃষ্ট হয় । এইরূপ পর্যা-লোচনা করিয়া প্রতিপন্ন হইল যে প্রিয়দর্শী বলিয়া তখন একজন রাজা ছিলেন । এখন প্রিয়দর্শী কে ? এনামের কোন রাজা ইতিহাসে বর্ণিত নাই । বিষ্ণুপুরাণে পঞ্চ পাণ্ডব হইতে ভারতের সমুদয় রাজবংশের নাম ক্রমান্বয়ে লিখিত আছে । তাহার মধ্যে প্রিয়দর্শী নাম দেখিতে পাওয়া যায় না । এই প্রিয়দর্শী রাজা কে ইহা ঠিক করিতে গিয়া ভারতের ইতিহাসের একটা বৃহৎ অংশ উজ্জ্বল রূপে প্রকাশিত হইল । এদেশের পুরাতন ইতিহাসের কোন ঘটনারই তারিখ পাওয়া যায় না । মহাভারত কোন্ সময়ে রচিত, ধর্ম্মরাজ যুধিষ্ঠির কখন রাজসূয় যজ্ঞ করিয়া দেশে সাম্রাজ্য প্রতিষ্ঠিত করিয়া ছিলেন, উপনিষৎ এবং দর্শনশাস্ত্র সকল কখন কোন্ অবস্থাতে কে লিখিয়াছিলেন, কালিদাসের কবিতা গুলি কোন্ কালে কোন্ রাজার সময়ে লোকদিগকে মোহিত করিয়াছিল, বিক্রমা-দিত্যের সংবৎ কি এবং তাঁহার নবরত্নই বা কখন রাজসভাকে শোভিত করিয়াছিল এই সকল প্রকাণ্ড প্রকাণ্ড প্রশ্নের উত্তর

যে শীঘ্র পাওয়া যাইবে তাহা বোধ হয় না । কিন্তু একটি সম্রাটের সময় নিরূপিত হইলে অন্যান্য দেশের ইতিহাস তাহার সহিত তুলনা দ্বারা স্থিরীকৃত হইতে পারে । “প্রিয়দর্শী” এ রাজা কে ইহা জানিয়া আমরা ভারতের প্রায় দুই তিন শত বর্ষের ইতিহাস কথঙ্কিত পরিমাণে জুনিতে পারিয়াছি । আমাদিগের দেশের ইতিহাস এতদূর তিমির রাশিতে আচ্ছন্ন যে তাহা বিবেচনা করিলে এ উপকারটি বড় সামান্য বলিয়া বোধ হয় না । পণ্ডিতদিগের কৃপায় আমরা স্বদেশের বিষয়ে একটু অধিক পরিমাণে অহঙ্কারী হইতে পারিয়াছি । এতদিন অনেকটা “গোঁজা মিলন” দিতে হইত । এখন নিশ্চয় মন বলিতে পারে যে এই সকল বিদ্যা ভারতের—এই সকল শাস্ত্র ভারত হইতে দেশান্তরে গিয়া অন্য জাতীয় লোকদিগকে জ্ঞানালোকে আলোকিত করিয়াছে ।

গ্রীস দেশ হইতে একজন রাজদূত এখানে আসিয়াছিলেন, তাঁহার নাম মেগাসথেনিস । তিনি সেলিউকস নৃপতি দ্বারা প্রেরিত হইয়াছিলেন । পাটলিপুত্র নগরে অনেক দিন বাস করেন এবং যে রাজার সমীপে তিনি প্রেরিত হন তাঁহাকে গ্রীকেরা সাম্রাজ্যপটাস বলিয়া ডাকিত । প্রসিদ্ধ পণ্ডিত সার উইলিয়ম জোন্স এই সাম্রাজ্যপটাসকে চন্দ্রগুপ্ত বলিয়া চিনিতে পারিলেন । ইহা একটি প্রকাণ্ড আবিষ্কৃত্য । বিষ্ণুপুরাণে চন্দ্রগুপ্তের নাম পাওয়া যায় । মুদ্রা রাক্ষসে ঐ রাজার নাম উল্লেখিত আছে । চন্দ্রগুপ্তের মন্ত্রী চাণক্যের নাম সকলেই শুনিয়াছেন । তাঁহার সংগৃহীত শ্লোক সমূহ পাঠশালার অনেক ছাত্রের মুখস্থ বলিতে পারে । মেগাসথেনিস যে উৎকৃষ্ট বিবরণ রাখিয়া যান তাহা হইতে আমরা মগধ এবং পাটলিপুত্রের বিষয় অনেকটা অবগত হইয়াছি । চন্দ্রগুপ্ত অত্যন্ত পরাক্রান্ত রাজা ছিলেন । আলেকজান্ডার যখন পঞ্জাবে আসিয়া যুদ্ধ করেন তখন তিনি পুরু রাজার সৈন্যভুক্ত ছিলেন এবং তৎপরে চাণক্যের বুদ্ধি

কৌশলে মগধরাজ্য অধিকার করেন । এই চন্দ্রগুপ্ত খ্রীঃ অব্দের পূর্ব ৩১৫ হইতে ২৯১ বৎসর পর্য্যন্ত রাজত্ব করিয়াছিলেন । চন্দ্রগুপ্তের পুত্র বিন্দুসার এবং তাঁহার পুত্র অশোক । যে সকল প্রস্তরফলকের কথা উল্লেখ করিয়াছি তাহাতে প্রিয়দর্শীর সিংহাসনারোহণের তারিখ লেখা আছে । তাহা এই অশোক রাজার তারিখের সহিত মিলিয়া যায় । অধিকন্তু সিংহল দেশে দ্বীপবংশ বলিয়া এক পুস্তক রচিত হইয়াছিল তাহাতে “প্রিয়দর্শী” যে অশোক তাহার স্পষ্ট উল্লেখ আছে । সুতরাং এই সকল শিলা স্তম্ভ এবং প্রস্তরফলকের রচয়িতা যে অশোক তাহার আর কোন সন্দেহ নাই । অশোক যে মগধ দেশের রাজা ছিলেন এবং তিনি যে সময়ে জীবিত ছিলেন তাহা তাঁহার কথা হইতেই আমরা জানিতে পারিয়াছি । একটী ফলকে তিনি লিখিতেছেন —“সবত বিজিতংসি দেবানামপিয়সা পিয়দর্শিস লাজিনে যেচ অন্তা মথ চোডা, পাণ্ডিয়া, সাতিয়পুতো, কেটলপুতো, তম্বপান্নি আস্তিযোগে নাম যোন লাজানে চ অলম্নে তস আস্তিযোগস সামন্তা লাজানে সবতা দেবানামপিয়সা পিয়দর্শিসা লাজিনে চুবে চিকিসাচ্চা কতা মনুস চিকিসা চ পশু চিকিসা চ ওষধানি..... ।” পাঠকেরা ভাষাটা কি ইহা কথঞ্চিৎ পরিমাণে উপলব্ধি করিতে পারিবেন বলিয়া ফলকের কিয়দংশ উদ্ধৃত করিয়া দেওয়া গেল । প্রিনসেপ সাহেব ইহার অর্থ এইরূপ করিয়াছেন —“দেবতাদিগের প্রিয় প্রিয়দর্শীর বিজিত বিভাগের প্রত্যেক স্থানে এবং চোডা, পাণ্ডিয়, সত্যপুত্র, কেতলপুত্র, তম্বপানি পর্য্যন্ত, যে যে স্থানে বৌদ্ধধর্মাবলম্বীরা বাস করে, এবং গ্রীক রাজ আস্তিওকাসের রাজ্যে (যথায় তাঁহার সেনাপতিরা শাসন করেন), যেখানে সেখানে দেবতাদিগের প্রিয় প্রিয়দর্শী রাজার চিকিৎসার দ্বিবিধ পদ্ধতি স্থাপিত হইয়াছে—মনুষ্যের জন্ম চিকিৎসা এবং পশুদিগের জন্ম চিকিৎসা । এতদ্ব্যতীত মনুষ্যদিগের উপযোগী এবং পশুদিগের উপযোগী সর্ব্বপ্রকার ঔষধও বিতরিত হয় ।” অন্য একস্থানে নিম্নলিখিত অনু-

জ্ঞাতি প্রচারিত হইয়াছে :—“আস্তিযোক নাম যোন রাজ পরঞ্চ তেন আস্তিযোকেন চতুর ।।। রজনি তুরময়ে নাম আস্তিকিন নাম মক নাম আলিকসন্দরে নাম নিচ চোডা পাণ্ড অবং তম্বপানিয় হেবম্ মেবম্ হেবম্ মেবম্ রাজা ।।...” ইহার অর্থ এই—“গ্রীক রাজ আস্তিযোক ভিন্ন অন্য চারি জন রাজা, যথা, তুরময়, আস্তিকিনি, মক এবং আলিকসন্দর, ইহাদিগের রাজ্যে এবং অন্যান্যস্থানে দেবতাদিগের প্রিয় প্রিয়দর্শীর ধর্ম্মানুজ্ঞা সকল লোকদিগকে ধর্ম্মভুক্ত করিতেছে ।” যে দুইটি অংশ উদ্ধৃত করা গেল ইহাতে পাঁচ জন রাজার নামের উল্লেখ আছে । ইহারা অশোকের বন্ধু ছিলেন এবং ইহাদিগের দেশে বৌদ্ধ ধর্ম্ম কেবল যে প্রচারিত হইয়াছিল তাহা নহে, সেই সেই দেশের লোকেরা বৌদ্ধ ধর্ম্ম গ্রহণও করিয়াছিল । ইতিহাস পাঠে অবগত হওয়া যায় যে ম্যাসিডন নৃপতি আলেকজান্দার দি গ্রেট যখন পঞ্জাব জয় করিয়া দেশাভিমুখে গমন করিতে করিতে প্রাগজ্যাগ করিলেন, তখন তাঁহার বৃহৎ রাজ্য তাঁহার সেনাপতিরা ভাগ করিয়া লইয়াছিলেন । তাঁহাদিগের পুত্রেরাই অশোকের সহযোগী ছিলেন । আস্তিযোক বলিয়া যে রাজা উল্লেখিত হইয়াছেন তিনি সিরিয়া দেশের রাজা ছিলেন । তাঁহার নাম আস্তিযোকস থিয়স ছিল—তিনি প্রথম আস্তিযোকাসের পুত্র । তিনি খ্রীঃ অব্দের পূর্বে ২৬৩ বৎসর হইতে ২৪৬ বৎসর রাজত্ব করিয়াছিলেন । তুরমেয় মিসরদেশের বিখ্যাত টলেমি ফিল্যাডেলফস নামে রাজা ছিলেন—ইনি প্রথম টলেমির পুত্র । তিনি খ্রীঃ অব্দের পূর্বে ২৮৫ বৎসর হইতে ২৪৬ বৎসর রাজা ছিলেন । আর্টিকিনি ম্যাসিডোনিয়া দেশের আর্টিগোনাস গোনাস বলিয়া প্রসিদ্ধ ভূপতি ছিলেন । ইনি খ্রীঃ অব্দের পূর্বে ২৭৬ বৎসর হইতে ২৪৩ বৎসর রাজা ছিলেন । মক সাইরিন নামক দেশের নৃপতি, তাঁহাকে গ্রীকেরা মেগাস বলিয়া ডাকিত । আলিকসন্দার এপিরাস দেশের রাজা ছিলেন । তিনি প্রথম আলেকজান্দার

রের পুত্র এবং তাঁহার রাজত্ব কাল খ্রীঃ অব্দের পূর্বের ২৭২ বৎসর হইতে ২৫৪ বৎসর পর্য্যন্ত । তাহা হইলেই প্রমাণ হইল যে অশোক এই সকল রাজাদিগের সময়ে জীবিত ছিলেন । এইরূপ গণনা করিয়া একপ্রকার স্থির হইয়াছে যে অশোকের রাজ্যাভিষেক খ্রীঃ অব্দের ২৬০ বৎসর পূর্বের হয় এবং তিনি খ্রীঃ অব্দের ২২২ বৎসর পূর্বের প্রাণত্যাগ করেন ।

হিন্দুদিগের কাল বোধ নাই । তাহারা অনন্তকাল লইয়া ব্যস্ত । ব্রহ্মই সার আর সংসার কেবল মায়ার স্থান । জীবন ও মরণ কেবল কর্মফল—আসিবে, যাইবে, ইহাদিগের কোন মূল্য নাই, ইহাদিগের কথা মনে রাখাও বিড়ম্বনা মাত্র । কেহ কি কখন কোন স্বপ্নকে মনে করিয়া রাখিতে চায় ? না, গভীরভাবে পুস্তকে লিপিবদ্ধ করিতে ইচ্ছা করে ? তেমনি জানিবে এই জীবনটি একটি প্রকাণ্ড নিদ্রা এবং ইহার ঘটনা সকল কেবল স্বপ্ন মাত্র । যেমন নিদ্রা ভাঙ্গিলে দেখি যে স্বপ্ন কোন কার্যেরই নয় এবং তাহা তখনই ভুলিয়া যাই, তদ্রূপ মুক্তি লাভ করিয়া যখন জাগিয়া উঠি তখন জীবনের ঘটনা গুলি স্বপ্ন বলিয়া বোধ হয় আর সে সকল একেবারে ভুলিয়া যাইতে হয় । এই কারণে হিন্দু লেখকেরা কখন কোন কার্যের একটি তারিখ বা সময় রাখিয়া যান নাই । এমন প্রকাণ্ড গ্রন্থ মহাভারত, যাহার তুল্য কবিতা পৃথিবীতে কোন স্থানে বা জাতিতে রচিত হইয়াছে কিনা সন্দেহ, সেই মহাভারত কে লিখিল বা কোন সময়ে লিখিত হইল ইহা একটি বর্ণেও প্রকাশিত হয় নাই । আমরা অনুমান করিয়া যতটা স্থির করিয়া লইতে পারি । তাহা অপেক্ষা আর অধিক আশা করা যাইতে পারে না । কিন্তু এবিষয়ে বৌদ্ধেরা হিন্দুদিগের মত ছিলনা । বৌদ্ধধর্ম মানবধর্ম ছিল, অর্থাৎ ইহাতে দেবতাদিগের আধিপত্য ছিলনা । মানুষ আপনার চেষ্টাতে বুদ্ধপদ লাভ করিতে পারিত । এক জন্মে না পারিলেও, অনেক জন্ম ধরিয়া চেষ্টা করিতে পারিলে

অবশেষে নির্ব্বাণমুক্তি পাইবার সম্ভাবনা ছিল । কশ্মীর উপর মুক্তি নির্ভর করিত । সুতরাং যেহা করিত তাহা একপ্রকার তাহার জীবনে যুক্ত হইয়া থাকিত । আমি আজ এই পুণ্য কার্য্যটি করিয়াছি, আজ ভিক্ষুদিগের জন্য এত অর্থ দান করিয়াছি, এইসকল ঘটনা বৌদ্ধেরা পরিষ্কার ভাষায় লিখিয়া রাখিত । সেই জন্য বৌদ্ধদিগের ইতিহাস ও ছিল । তাহারা প্রত্যেক ঘটনার তারিখ রাখিত এবং সকল কার্য্যের বিবরণ লিখিত । দুর্ভাগ্যক্রমে মুসলমানেরা আসিয়া বৌদ্ধদিগের রচিত অনেক গ্রন্থ নষ্ট করিয়া ফেলিয়াছে । কাশী, বিহার, মলন্দ প্রভৃতি স্থানে বৌদ্ধদিগের যে সকল অতিশয় মূল্যবান পুস্তকালয় ছিল, সে সকল আক্রোশ করিয়া তাহারা একেবারে বিনষ্ট করিয়া ফেলে । সে সকল রচিত গ্রন্থ পুনঃপ্রাপ্ত হইবার আর কোন সম্ভাবনা নাই । এতদ্ব্যতীত যে সকল গ্রন্থ আছে তাহার একাংশ নেপালে পাওয়া গিয়াছে এবং অপরাংশ সিংহল দ্বীপে আজও পাওয়া যায় । বৌদ্ধধর্ম্ম যখন ভারতবর্ষে দুর্ব্বল হইয়া পড়ে তখন তাহার পরিবর্তে শৈবধর্ম্ম আসিয়া প্রতিষ্ঠিত হইল । যেখানে বৌদ্ধেরা রাজা ছিল সেখানে হিন্দুরা প্রবল হইয়া তাহাদের রাজত্ব ধ্বংস করিয়া ফেলিল । বঙ্গদেশ বিহারাধিপতি পালবংশীয়দিগের রাজত্বের অন্তর্গত ছিল । কথিত আছে যে আদিশূর বঙ্গদেশ হইতে তাহাদিগকে বহির্গত করিয়া দেন এবং তিনি শৈব ছিলেন বলিয়া যেখানে যেখানে বৌদ্ধদিগের বিহার ছিল সেই সেই স্থানে একটি করিয়া শিবের মন্দির স্থাপন করিয়াছিলেন । এইরূপে নানা স্থানে বৌদ্ধ ও হিন্দুদিগের মধ্যে যুদ্ধ আরম্ভ হইল । হিন্দু রাজারা বৌদ্ধ রাজাদিগকে পরাস্ত করিয়া তাহাদিগের হস্ত হইতে রাজ্য সকল কাড়িয়া লইল এবং বৌদ্ধেরা ভয়ে পলায়ন করিয়া নেপাল দেশে আশ্রয় গ্রহণ করিল । তাহারা কতকগুলি পুস্তক সঙ্গে করিয়া লইয়া যাইতে পারিয়াছিল । সেই পুস্তকগুলি সংস্কৃতে রচিত, এখনও নেপালে সুরক্ষিত আছে । এদিকে অশোকের সময়

তাহার পুত্র মহেন্দ্র সিংহল দেশে ধর্মপ্রচার করিতে যান। তিনিও অনেক পুস্তক সেখানে লইয়া গিয়াছিলেন এবং এতদ্ব্যতীত সেখানকার বৌদ্ধেরাও অনেক পুস্তক রচনা করিয়াছিল। সে সকল পালি ভাষাতে লিখিত। এখনও সে সকলই বর্তমান আছে।

এই সকল পুস্তক দেখিয়া এবং অশোক নির্মিতশিলা স্তম্ভ এবং প্রস্তর ফলক দেখিয়া আমরা বৌদ্ধদিগের এবং তাহার সঙ্গে সঙ্গে ভারতের ইতিহাস কিয়দংশ স্থির করিতে পারিয়াছি। পাঠকেরা যদি এই সকল পাঠ করিয়া স্বাধীন ভাবে নূতন নূতন ব্যাপার সকল আবিষ্কার করিতে পারেন, তাহাইহলে হিন্দুদিগের যে অপবাদ আছে যে তাহার ইতিহাস বিষয়ে নিতান্ত অজ্ঞ সে অপবাদ আর এক দিনের জন্য থাকিবেন।

ভাষার ইতিহাস ।

অশোকের নাম প্রকাশিত হইবার পর আমরা ক্রমে ক্রমে তাঁহার অন্যান্য বৃত্তান্ত সকলও অবগত হইলাম । প্রথমতঃ, ভাষার ইতিহাস অনেক পরিমাণে পাওয়া যায় । যথা, আমরা দেখিতে পাই যে এখনকার চলিত অক্ষর এবং কথাসকল দুই সহস্র বৎসর পূর্ব হইতে ব্যবহারে আসিতে আরম্ভ করিয়াছে । সংস্কৃতে শ, ষ, স এই তিনটির স্পষ্ট উচ্চারণ ছিল । এখনও হিন্দী মহারাষ্ট্র প্রভৃতি ভাষাতে তাহা প্রচলিত আছে । কিন্তু কোন কোন জাতির পক্ষে ষ উচ্চারণ করা নিতান্ত সহজ নহে । সুতরাং তাহারা এ অক্ষর একেবারে উচ্চারণ করে না । পশ্চিম প্রদেশে অনেকে “ভাষা” না বলিয়া “ভাখা” বলে । বঙ্গদেশে এ তিনটি এক উচ্চারণে পরিণত হইয়াছে । তালব্য, মূর্দ্ধণ্য এবং দন্ত্য বলিয়া আমরা তাহাদিগের প্রভেদ করি । কিন্তু এপ্রভেদ নিতান্ত অর্থহীন এবং অসঙ্গত । অশোকের রচনা সকল দেখিলে বুঝিতে পারিব যে তাঁহার সময় হইতেই এই তিন অক্ষরের দুর্গতি আরম্ভ হইয়াছে । খালসী নামক স্থানে যে শিলা স্তম্ভ আছে তাহাতে “পাষণ্ড” কথা “পাশণ্ড” বলিয়া লিখিত আছে । এই দেখিয়া একজন ইংরাজী পণ্ডিত স্থির করিয়াছেন যে তখনকার কালে ষর অনুরূপ অক্ষর ভারতে ছিলনা । এইরূপ যুক্তি আনিলেই চক্ষুস্থির ! বাঙ্গালিরা তিনটি “শ”কে একই প্রকারে উচ্চারণ করে বলিয়া কোন পণ্ডিত কি বলিতে পারেন যে বাঙ্গালিদিগের মধ্যে শ, ষ, স এই তিনের অস্তিত্ব নাই । এরূপ যুক্তি করিয়া অনেকে বৃথা উপহাসা-স্পদ হইয়া পড়েন । যাহা হউক তখনকার লোকেরা যে অক্ষর যেরূপ উচ্চারণ করিতে পারিত তাহা সেইরূপ লিখিত । পঞ্জাবে

তিনেরই উচ্চারণ ছিল। সুতরাং তিনটিরই ভিন্ন ভিন্ন রূপ ছিল। সাবাজগার্মি নামক স্থানে যে অনুজ্ঞা লিখিত আছে তাহাতে “সুসুশা” এই কথাটি লেখা আছে। কিন্তু অন্যান্য স্থানে তাহা “সুসুসা” এই রূপে লিখিত দেখা যায়। তখন হইতে দন্ত্য এবং মূর্দ্ধণ্য “ন” এরও হ্রস্বা আরম্ভ হইয়াছে। একস্থানে “ব্রাহ্মন” এই কথা লিখিত আছে। “মনুষ্য” কথাটি সংস্কৃত। কিন্তু অশোকের সময়ে ইহা নানা আকারে দেখা যায়। এক স্থানে “মানুসো”, ঢোলি বলিয়া স্থানে “মুনিসে”, পালি ভাষাতে “মানুসো”, এবং প্রাকৃত ভাষাতে “মানুস” রূপে প্রচলিত ছিল। এখনকার “মানুষ” তখন হইতে প্রচলনের চেষ্টা করিয়া আসিতেছে। এইরূপ এখনকার যত কথা সংস্কৃতের অপভ্রংশ বলিয়া প্রচলিত আছে তাহার মধ্যে অনেকগুলিকে অশোকের সময়ে যে পালি ভাষা চলিত ছিল তাহার মধ্যে চিনিতে পারা যায়। আবার অনেক গুলি কথা তখন প্রচলিত ছিল, কিন্তু এখন তাহা একেবারে লোপ পাইয়াছে। যথা, জম্বুদ্বীপ এই কথা রূপনাথ পর্বতের উপর লিখিত আছে; এখন জম্বুদ্বীপে আমরা বাস করি ইহা বলিলে লোকে আমাদিগকে উপহাস করিবে। ভিক্ষু ও ভিক্ষুণী এই বলিয়া যে বৌদ্ধ বৈরাগী এবং বৈরাগিনী খ্যাত ছিল তাহারা বৌদ্ধধর্মের সঙ্গে এদেশ পরিত্যাগ করিয়া গিয়াছে। “মার” অর্থাৎ সয়তান বা পাপ পুরুষ, “বুদ্ধিসত্তা” অর্থাৎ বুদ্ধ, এসকল কথা আর কোথাও পাওয়া যায় না। কে বলিতে পারে, বেহার এই কথাটির ব্যুৎপত্তি কোথা হইতে হইয়াছে? “বেহার” এই শব্দের অর্থ, যে দেশে বিহার আছে। “বিহার” ইহার অর্থ যাহাকে ইংরাজীতে মোনাষ্টারী বা নানারি বলে, অর্থাৎ যে স্থানে ভিক্ষু ভিক্ষুণীরা বাস করিত। অশোকের সময় বেহারময় বিহার ছিল এই জন্ত ইহার নাম বেহার হইয়াছে। সেই সকল বিহার এখন প্রায় দেখা যায় না। কাশীর সারনাথে একখণ্ড ভূমি খনন করিয়া একটি বিহার প্রকাশিত হইয়াছে। মুসলমানেরা তাহাকে

অগ্নি দ্বারা দহন করিয়া ফেলে । যখন খনন করিয়া বাহির করা হয় তখন তাহার মধ্যে অগ্নি, লৌহ, পিত্তল, করণা প্রভৃতি অগ্নি সংযোগে একীভূত হইয়া রহিয়াছে দেখা গেল । স্থানে স্থানে রুটি কিম্বা চাপাটি প্রস্তুত হইয়া পড়িয়া আছে । কাষ্ঠ সকল দহন হইয়া গিয়াছে । ঠিক যেন বোধ হয় ভিক্ষুরা ভোজন করিবার আয়োজন করিতেছিল কিম্বা ভোজন করিতে আরম্ভ করিয়াছিল এমন সময়ে মুসলমানেরা তাহাদিগকে আক্রমণ করে । এতদ্ব্যতীত অনেকগুলি বিহার মুসলমানেরা মসজিদ করিয়া লইয়াছে । বোরান-পুর নামক স্থানে অটল মসজিদ দেখিলেই ইহাকে এ দেশীয় অটালিকা বলিয়া বুঝিতে পারা যায় । অন্যান্য স্থানে বিহার গুলি একেবারে বিনষ্ট হইয়া গিয়াছে । কেবল বেহার কথাটি আছে । তাহার অর্থও সকলে অবগত নহে ।

আর একটি নূতন কথা আমরা জানিতে পারিতেছি । এদেশ অঙ্কশাস্ত্রের মূল স্থান । নামতা এই শাস্ত্রের ভিত্তি স্বরূপ । সেই নামতা এই দেশে প্রথম আবিষ্কৃত হয় । অন্যান্য দেশে প্রতি সংখ্যার একটি একটি বিশেষ সঙ্কেত ছিল । যথা রোমদেশে M ইহার অর্থ এক সহস্র, D ইহার অর্থ পাঁচ শত, C ইহার অর্থ একশত ছিল । তিন শত বলিতে হইলে CCC দ্বারা তাহা পরিচিত হইত । পুরাকালে সকল দেশে প্রথম দশ সংখ্যা অঙ্গুলী দ্বারা নির্দিষ্ট হইত । যথা, এক অঙ্গুলীর নির্দেশে এক, চারি অঙ্গুলীতে চারি বুঝাইত । পাঁচ বলিতে হইলে V এই সঙ্কেত চলিত । দশ বলিতে হইলে দুটি হস্ত বিপরীত দিকে রাখিলেই হইত । তাহার আকার X । এই রূপে প্রতি সংখ্যার একটি একটি নাম এবং একটি একটি আকার মনে করিয়া রাখিতে হইত । কিন্তু সামান্য লোকদিগের পক্ষে তাহা আয়ত্ত করা অসম্ভব হইত । পরে এদেশের পণ্ডিতেরা আশ্চর্য্য বুদ্ধি খাটাইয়া এক নূতন সাঙ্কেতিক শাস্ত্র বাহির করিলেন । সেই

শাস্ত্র এ দেশ হইতে আরবেয়া লইয়া যায় এবং তাহারাই ইউরোপ
মন্ত্র প্রচার করে। ইংরাজী মোটেসান আমাদিগেরই আদিম
অর্থ-নামতাপদ্ধতি। সে শাস্ত্রের সঙ্কেত এই। এক হইতে
নয় পর্য্যন্ত সংখ্যা স্বতন্ত্র আকারের। তাহার পর সমুদয় সংখ্যা দশ
মূলক। একের পর একটি শূন্য যোগ করিলেই দশ হয়।
ইহার পর কোটি পর্য্যন্ত সংখ্যা সেই দশের পিঠে এক একটি
শূন্য বাড়াইয়া দিলেই হয়। দশের পর এক, $১০ + ১$ অর্থাৎ
একাদশ, $১০ + ২$ অর্থাৎ দ্বা + দশ ইত্যাদি। $২০ - ১$ অর্থাৎ
উনবিংশতি। ২×১০ অর্থাৎ দ্বি \times দশতি। কালক্রমে দ্বি ইহার
দুই এবং দশতি ইহার দ লোপ পাইয়া যায় অবশিষ্ট
রহিল বিংশতি অর্থাৎ দুই দশ। মনুষ্য বুদ্ধির কি আশ্চর্য
ক্ষমতা। অনন্ত ভগবান ব্যতীত কে কোটি কোটি সংখ্যাকে
অনুভব করিতে পারে? কিন্তু ক্ষুদ্র মনুষ্য তাহা অনুভব
করিতে সমর্থ হউক বা না হউক, এক সামান্য সঙ্কেত দ্বারা
তাহার ভাব বুঝিয়া লয়। একের পর কয়েকটি শূন্য যোগ করিলেই
ভগবান যাহা বুঝিতে পারেন মানুষে তাহা বুঝিতে পারি বলিয়া
ভাণ করে। জম্বুদ্বীপের লোকেরা এই আবিষ্কৃত্য করিয়া জগতকে
মোহিত করিয়াছে। অথচ ইহা এত সহজ যে রাস্তার বালকেরা
পর্য্যন্ত ইহা অক্লেশে ব্যবহার করিতে পারে। কিন্তু কয় জন বলিতে
পারে যে ইহার দশ মূলক সংখ্যা এবং ইহা স্থির করিতে অতিশয়
কীকবুদ্ধি পণ্ডিত সকলও এক সময় পরাস্ত হইয়াছিলেন?

অশোকের সময়ে সংখ্যা বিষয়ে দুটি নূতন কথা পাওয়া যায়।
প্রথমতঃ, তখনকার সংখ্যা সকল সম্পূর্ণরূপে এখনকার আকার ধারণ
করে নাই। আমাদিগের দেশের স্ত্রীলোকেরা যেমন ধোপার নিকট
কাপড় দিলে দেওয়ালে কতকগুলি দাঁড়ী কাটে, অশোকের সময়
ও সেইরূপ কতকটা ছিল। সাহাবাজগাছি নামক স্থানে যে প্রস্তর

ফলক আছে তাহাতে চতুর অর্থাৎ চারি ।।। এইরূপ লিখিত আছে । খালসী বলিয়া স্থানে সেই সংখ্যা + এই সংকেতে পরিচিত । অশোকের সময়ে চারি ইহার আকার + কিস্বা × ছিল । পাঠকেরা এই সংকেত দুটি শীঘ্র শীঘ্র লিখিতে চেষ্টা করিলে বুঝিতে পারিবেন কিরূপে কালক্রমে ইহারা এখনকার ৪ এর আকার ধারণ করিল । আর একটি কথা এই । অশোকের পূর্বে দ্বাদশ প্রভৃতি কথা প্রচলিত ছিল । কিন্তু তাঁহার সময়ে বার, তের প্রভৃতি কথা কলা আরম্ভ হইয়াছে মাত্র । সাহাবাজগাহি ফলকে “বারয়” একখাটি লেখা আছে । যে স্থানে ইহার ব্যবহার হইয়াছে তাহা এই—“দেবানাম প্রিয়ে প্রিয়দশী রান্য অহতি বারয় বয ...” । “বয” শব্দ বর্ষ এবং “বারয়” শব্দ দ্বাদশ । ইহাতে প্রমাণ হইতেছে যে অশোকের সময়েই এখনকার চলিত ভাষার সূত্রপাত হয় । বুদ্ধ দেব অশোকের ২৫০ বৎসর পূর্বে পালি কিস্বা মগধি ভাষায় বর্ণন প্রচার করিয়া গিয়াছিলেন । তখনও সাধারণ লোকদিগের মধ্যে সংস্কৃত সম্যকরূপে প্রচলিত ছিলনা । পালি ভাষা অশোকের ভাষা । ইহা পঞ্জাবী, উজ্জয়িনী এবং মগধি এই তিন প্রকার আকারে কথিত হইত । সেই সময়ে সংস্কৃতের বিভক্তি সকল বর্তমান ছিল । কিন্তু তাহারও অপভ্রংশ আরম্ভ হইয়াছিল, এবং ইহা ব্যতীত এখনকার কথা সকলও ভূমি অধিকার করিতে চেষ্টা করিতেছিল । এই যে পালি “বারয়”, বাঙ্গালা “বার”, হিন্দুস্থানী “বারহ” ইহারা সকলেই সংস্কৃত দ্বাদশের রূপান্তর । কথাটা দ্বাদশ কিস্বা দ্বাদশ । ক্রমে “দু” লোপ পাইল । “দ্বা” বলিতে লোকের কষ্ট হইত । ত্রীলোকেরা এবং সামান্য লোকেরা স্বভাবতঃ “বাদশ” বলিত । “শ”র পরিবর্তে “হ” হয় ইহা আমরা অনেক স্থলে দেখিয়াছি । যথা “সিদ্ধু” হইতে এখনকার “হিন্দু” হইয়াছে । “হিন্দু” কথা সংস্কৃত নহে এবং ইহা কোন সংস্কৃত অভিধানে পাওয়া যায় না । সুতরাং

“বান্দল” একথাটি “বাদহ” হইল। অধিকন্তু অনেক জাতির মধ্যে “দ” “র” হইয়া যায়। সুতরাং “বাদহ” “বারহ” রূপধারণ করিল। এইরূপে “ত্রয়োদশ” হইতে “ডের”, “চতুর্দশ” হইতে “চৌদ,” প্রভৃতি সংখ্যা সংক্ৰান্ত হইতে আবির্ভূত হইল। এই আবির্ভাবের বয়স অন্ততঃ দুই সহস্র বৎসরের অধিক। ইহা অশোকের সময় হইতেই আরম্ভ হইয়াছে, তাহার পূর্ব হইতেও হইতে পারে। ভাষা একদিনে হয় না। কোন রাজ্য অনুমতি করিলেও হয় না। সভাতে কতকগুলি লোক মিলিত হইয়া একমত হইলেও ইহার সৃজন চলে না। বৃক্ষের ন্যায় ইহার ইতিহাস। অল্পে অল্পে ধীরে ধীরে ইহার উৎপত্তি, বৃদ্ধি, এবং হ্রাস। বাঙ্গালা, হিন্দি প্রভৃতি ভাষার বীজ বহুকাল পূর্বের প্রকৃতি বর্ণন করিয়া গিয়াছেন। দুই সহস্র বৎসর পরে তাহা কল প্রসব করিতেছে। এখনও ইহাদিগের উন্নতি প্রকৃত প্রস্তাবে হয় নাই। হুসন্ত্য ভাষা হইতে এখনও কত শত বৎসর লাগিবে কে বলিতে পারে ?



দেশের অবস্থা ।

শাক্য গোতম খ্রীঃ অব্দের ৫৫৮ বৎসর পূর্বের জন্ম গ্রহণ করেন। যখন তাঁহার ২৯ বৎসর বয়ঃক্রম, তখন তিনি পিতৃভবন পরিত্যাগ করিয়া বৈরাগ্য অবলম্বন করেন। ছয় বৎসর কঠোর সাধনের পর তিনি বুদ্ধের অবস্থা প্রাপ্ত হন। ৪৫ বৎসর ধর্ম প্রচার করিয়া ৮০ বৎসর বয়ঃক্রমে তিনি কুশিনগর নামক স্থানে মানবলীলা সম্বরণ করেন। খ্রীঃ অব্দের ৪৭৮ বৎসর পূর্বের তাঁহার মৃত্যু হয়। বুদ্ধদেবের ধর্ম ২০০ বৎসর কাল অল্প অল্প উন্নতি করিতেছিল। সেই সময়ে বৌদ্ধদিগের সংখ্যা কত ছিল তাহা জানিবার কোন সম্ভাবনা নাই। তবে এই পর্য্যন্ত বলা যাইতে পারে যে সেই দুই শত বৎসরের ভিতর বৌদ্ধদিগের মধ্যে অনেক মতভেদ এবং বিরোধ উপস্থিত হয়। তাহাদিগের ভিতর ১৮টি দল হইয়াছিল। তাহার অধিকাংশই বোধ হয় সেই সময়ে আরম্ভ হয়। দুইটি মহা সভা ইতি মধ্যে হইয়া গিয়াছে। একটি মহাসভার বুদ্ধের প্রধান শিষ্য মহাকাশ্যপ সভাপতি ছিলেন এবং আর একটি মহাসভা বৈশালী দেশীর ভিক্ষুদিগের অযথা ব্যবহারের বিরুদ্ধে প্রতিবাদ করিবার জন্য আহূত হয়। ইহাতে বুঝা যায় যে বিনা সাহায্যে আপনাদের বলে বৌদ্ধধর্ম অনেক দূর পর্য্যন্ত বাইতে পারিয়াছিল। কিন্তু অম্যান্য দিক হইতে সহানুভূতি না আসিলে বৌদ্ধ ধর্ম কি সহস্র বৎসর কিম্বা তদধিক এদেশে রাজত্ব করিতে পারিত ? তখন ভারতবর্ষে অনেক পরিবর্তন হইয়া গিয়াছে এবং নব নব ভাব চারিদিক হইতে আসিয়া এদেশে প্রবেশ করিতেছিল।

প্রথমতঃ, দেখিতে পাই যে তখনকার দেশীয় আচার ব্যবহারের অনেক পরিবর্তন আরম্ভ হইয়াছে । ক্ষত্রিয় ধর্ম প্রায় লোপ পাইয়াছে । নন্দ এদেশের প্রথম শূদ্র রাজা ছিলেন । তাঁহার পর মৌর্য বংশের সকল রাজাই শূদ্র ছিল । বাস্তবিক যে প্রবাদ আছে যে পৃথিবী এক-বিংশতিবার নিন্দ্রাক্ত্রিয় হইয়াছিল তাহার মূলে সত্য আছে । ভারতে যখন প্রথম শূদ্র রাজা হয় তখন কি একরূপ পরাক্রান্ত কোন ক্ষত্রিয় রাজারা ছিলনা যাহারা সম্মিলিত হইয়া সেই দুরাচারী শূদ্রের দর্প চূর্ণ করিতে পারিত ? সত্য কথা এই যে ভারতবর্ষে অনেক বার অনেক বিদেশী স্বেচ্ছ আসিয়া ক্ষত্রিয়দিগকে পরাজয় করিয়াছিল । পরে যখন সেই ক্ষত্রিয়কুল সম্পূর্ণরূপে হীনপ্রভ হয়, তখনই শূদ্রেরা অহঙ্কার করিয়া রাজকাব্য গ্রহণ করিতে সাহস করিয়াছিল । আমাদিগের বিশ্বাস এই যে যে দিন এদেশে প্রথম শূদ্র রাজা হয়, সেই দিন হইতে পুরাতন ধর্ম পরাস্ত হইয়া গেল ও নূতন বিধির সৃষ্টি হইল । একরূপ চিহ্ন সকল দেখা দিল যাহাতে মনে হয় যে এক নূতন যুগের আবির্ভাব হইতেছে । দর্শন শাস্ত্র সকল আসিয়া একদিকে লোক দিগকে ন্যায়াশাস্ত্রের নিয়ম দ্বারা নূতন মত বিচার করিতে শিখাইল, অপরদিকে সাংখ্য নিরীশ্বর তত্ত্ব প্রচার করিল । পতঞ্জলি কৃত যোগ শাস্ত্র অনেক প্রকার অনৈসর্গিক ব্যাপার যোগ দ্বারা সম্বৎসর তাহা দেখাইল । একটা নূতন সময় আসিতেছে বেশ রোধ হইল । বৌদ্ধ ধর্ম এই সকল শক্তি সমূহের অবশ্যম্ভাবী ফল । সেই সময়কার একটা প্রকাণ্ড ভাব এই যে লোক নির্বিশেষে সকল জাতিরই ধর্মে সমান অধিকার আছে । ইহা বলিলেও সব হইল না । অধিকন্তু যেমন ব্রাহ্মণ-দিগের আছে, তেমনি চণ্ডালদিগেরও আছে ।

এই ভাবটি যখন বুদ্ধের আবির্ভাবে বলবান হইল তখন ক্ষত্রিয় ধর্ম যে লোপ পাইবে তাহার আর আশ্চর্য্য কি ? বুদ্ধের মৃত্যুর সোড়-

শত বৎসর পরে আর একটি নূতন বিপ্লব ঘটয়াছিল । আলেকজান্ডার দি গ্রেট নামক প্রসিদ্ধ মেসিডোনিয়ার ভূপতি খ্রীঃপূর্বের ৩২৭ বৎসর পূর্বেই এই দেশ আক্রমণ করেন । তিনি শতদ্রু নদী পর্যন্ত আসিতে পারিয়াছিলেন । কিন্তু তাঁহার আক্রমণের ফল সকল অনেক কাল স্থায়ী এবং অনেক দূর ব্যাপী হইয়াছিল । সেই ভূপতি যখন পুরু রাজার সহিত যুদ্ধ করেন তখন চন্দ্রগুপ্ত নামক একজন লোক তাঁহার নিকটে উপস্থিত হয় । পরে তিনি এ দেশ পরিভ্রমণ করিয়া চলিয়া গেলে চন্দ্রগুপ্ত চাণক্যের সাহায্যে পার্টিলিপুত্র নগরের রাজার প্রাণবধ করিয়া নিজে সেই দেশের রাজা হন । চন্দ্রগুপ্ত জাতিতে শূদ্র ছিলেন । আলেকজান্ডার এদেশে কোন চিরস্থায়ী কীর্তি রাখিয়া যাইতে পারেন নাই । কিন্তু কথিত আছে যে তিনি যখন এদেশে আসেন তখন তাঁহার সঙ্গে প্রায় তিন সহস্র শিম্পী এবং নাটকের অভিনেতা আসে । এই সকল যবন নিশ্চয়ই এদেশে গ্রীসের আশ্চর্যজনক নাটক সকল অভিনয় করিয়াছিল এবং তাহাদিগের অসাধারণ শিম্পি নৈপুণ্যও প্রদর্শন করিয়াছিল । অনেকে বলেন যে ভারতবর্ষে পূর্বে নাটক রচনা ছিল না । যবনেরা আসিয়া আমাদেরকে সেই শাস্ত্রে শিক্ষা দেয় । এ বিষয়ের সত্যাসত্য নির্ণয় করিবার ক্ষমতা আমাদের নাই । আলেকজান্ডারের মৃত্যুরপর সেলিউকাস নাইকেটর সিরিয়া দেশের রাজা হন । তিনি সিংহাসনারূঢ় হইয়া শুনিলেন যে আলেকজান্ডার তক্ষশিলাতে যে যবন শাসন কর্ত্তা রাখিয়া গিয়াছিলেন তাহাকে সে দেশীয়েরা হত্যা করিয়া ফেলিয়াছে এবং গ্রীক অধীনতা দূর করিয়া দিয়া নিজ স্বাধীনতা সংস্থাপন করিয়াছে । এই শুনিয়া সেলিউকাস সৈন্য সামন্ত লইয়া এদেশকে পুনর্ব্বার গ্রীকদিগের অধীনে আনিবার জন্ত অগ্রসর হইলেন । কিন্তু তাঁহার সমকক্ষ আর একজন রাজা এদেশীয়দিগের নায়ক হইয়া অগ্রসর হইতে ছিলেন । তাঁহার নাম চন্দ্রগুপ্ত । তিনি তখন পার্টিলিপুত্রের প্রবল

পরা কান্ত রাজা। তাঁহাদিগের দুইজনে ঘোর যুদ্ধ উপস্থিত হইল। কিন্তু সেলিউকাস অবশেষে ভাবিলেন যে চন্দ্রগুপ্তের সহিত যুদ্ধ না করিয়া তাঁহার সহিত বন্ধুতা করাই ভাল। এই বিবেচনায় তিনি একটি সন্ধি স্থাপন করিলেন। চন্দ্রগুপ্ত সেলিউকাসকে পাঁচশত হস্তী দান করিলেন। ইহার পরিবর্তে সেলিউকাস চন্দ্রগুপ্তকে পঞ্জাব এবং কাবুল প্রদেশের অনেকাংশ ভূমি দান করিলেন এবং এতদ্ব্যতীত সেলিউকাসের কন্যার সহিত চন্দ্রগুপ্তের বিবাহ হইল। মেগাসথেনিস নামক একজন রাজদূত সেলিউকাসের প্রতিনিধি হইয়া পাটলিপুত্রে বাস করিতে লাগিলেন। সেই মেগাসথেনিসের লিখিত পুস্তক হইতে আমরা চন্দ্রগুপ্তের রাজ্যের বিবরণ সকল প্রাপ্ত হইয়াছি।

নানাদিক হইতে নানা প্রকার শক্তি আসিয়া তখন ভারতের পরিবর্তন করিয়াছিল। আমরা বলিয়াছি যে ক্ষত্রিয় রাজা না হইয়া একজন শূদ্র রাজা হওয়াই এক প্রকাণ্ড ঘটনা। তাহার পর বৌদ্ধ ধর্মের পরাক্রম আসিয়া পুরাতন আচার ব্যবহার এবং বিশ্বাস সমুদয়কে টল মল করিয়া দিল। ইহার উপর আবার গ্রীকদিগের ভাষ্কর্য্যবর্ষ আক্রমণ, তাহাও ধরিতে হইবে। নূতন ধর্ম আসিয়া এদেশীয়দিগের জাতিভাব শিথিল করিয়া দেয়। তার সাক্ষী দেখ চন্দ্রগুপ্ত যবনী স্ত্রীকে বিবাহ করিতে পারিয়াছিলেন। রাজার দৃষ্টান্ত কি প্রজারা অনুসরণ করে নাই? যখন আবার বিবেচনা করি যে গ্রীকেরা এদেশে অনেক বৎসর ধরিয়া রাজত্ব করে, তখন যে হিন্দু এবং যবন রক্ত একত্র হয় নাই ইহা আমরা বিশ্বাস করিতে পারি না।

যদি কেহ বলেন যে এই সকল পরিবর্তন হইতে দেশে কুরীতি এবং কুনীতি আসিয়াছিল তাহা বলিবার উপায় নাই। মেগাসথেনিস যে পুস্তক লিখিয়া যান তাছাতে এদেশীয়দিগের অনেক

প্রশংসা আছে । তিনি বলিয়াছেন যে গ্রীস প্রভৃতি সকল দেশেই তখন দাস ক্রয় বিক্রয় করিবার প্রথা ছিল, কিন্তু এদেশে তাহা ছিলনা । এদেশের পুরুষেরা যেমন সাহসী, স্ত্রীলোকেরা তেমনি সতী ছিল । মেগাসথেনেস বলেন যে এদেশীয়েরা কখন মিথ্যা কথা বলিত না এবং লোকেরা এত সৎ ছিল যে বাটীর দ্বারে কুলুপ লাগাইতে হইত না । তাহারা কখন বিচারালয়ে গিয়া মকদ্দমা করিত না এবং স্ব স্ব রাজার অধীনে কুশলে বাস করিত । মেগাসথেনেস কেবল একাকী নহেন, সেই সময়কার এবং তাহার পরে যে সকল গ্রীক এবং রোমান লেখকেরা ভারতের বিষয় বর্ণনা করিয়াছেন, তাঁহারা সকলেই মুক্তকণ্ঠে এদেশীয়দিগের গুণ কীর্ত্তন করিয়াছেন । কল কথা, যে সময়ের ইতিহাস আমরা লিখিতেছি তাহা একটা পুনর্জীবনের সময় । সেই সময়ে ভারতবাসীরা অনেক কাল সুস্থপ্ত অবস্থায় থাকিয়া আবার জাগিয়া উঠিয়াছিল এবং ভারতের যত কিছু সৌভাগ্য অনেকটা সেই সময় হইতেই আরম্ভ হয় । সকল দেশেই এইরূপ হইয়া থাকে । অনেক কাল এক অবস্থাতে থাকিয়া লোকেরা দেশাচার এবং কুসংস্কারে আবদ্ধ হয় । তখন আর তাহারা অগ্রসর হইতে পারে না । সকল বিষয়েই তাহাদের অধঃপতন হইতে থাকে । কিন্তু যখন পুনর্জীবন আরম্ভ হয় তখন পুরাতন মেঘমালা নূতন সত্যের আলোকে একেবারে বিলুপ্ত হইয়া যায়, এবং বিদ্যা শিক্ষার আলোচনার সঙ্গে সঙ্গে সকল বিষয়ে উন্নতি এবং সৌভাগ্যের উদয় হয় ।

আমাদিগের দেশে গ্রীকেরা অনেক দিন রাজত্ব করিয়াছিল । তাহারা প্রকৃত গ্রীক ছিল না । সেলিউকাস ভূপতি পঞ্জাবের সীমা পর্য্যন্ত রাজত্ব বিস্তৃত করিয়াছিলেন । ভারতের নিকটস্থ দেশকে ব্যাকট্রিয়া বলিত । তথাকার নরপতিরা গ্রীক জাতীয় ছিলেন । গ্রীঃঅন্ধের কিছুকাল পূর্বেই একজন পরাক্রান্ত রাজা পঞ্জাব

দেশ জয় করিয়া মথুরা পর্য্যন্ত রাজত্ব স্থাপন করিয়াছিলেন । তাঁহাকে গ্রীকেরা মিথ্রাণ্ডার বলিয়া ডাকিত এবং এদেশীয়েরা তাঁহাকে মিলিও উপাধি দেয় । ইহঁার রাজধানীর নাম সগল ছিল, এবং ইনি নিজে আলেকজান্দ্রিয়া নগরবাসী ছিলেন । মিলিও একজন বৌদ্ধ ধর্ম্মাবলম্বী । তাঁহার বিষয়ক একটি সুন্দর পুস্তক এখন পর্য্যন্ত দেখিতে পাওয়া যায় । মথুরাতে ভূমি খনন করিতে করিতে কতকগুলি প্রস্তর নিশ্চিত প্রতিমূর্ত্তি পাওয়া গিয়াছে । তাহা স্পষ্ট গ্রীক শিল্পীদিগের দ্বারা নিশ্চিত বলিয়া বোধ হয় । যখন গ্রীস এবং ভারত এই দুই দেশের মধ্যে যে অনেক বিষয়ে ভাবের বিনিময় হইয়াছিল তাহা আমরা পূর্বে আলোচনা করিয়াছি* । যখন ভাবি যে অসভ্য জাতিরা অধিকাংশ গ্রীক পুস্তক অগ্নিতে নষ্ট করিয়া ফেলিয়াছে এবং ভারতের পুস্তক রশ্মিরও অতি অস্পষ্টাংশই জীবিত আছে, তখন হৃদয় শোকে আচ্ছন্ন হয় । যদি এই সকল রচনা বর্ত্তমান থাকিত তাহা হইলে আমরা কি অশোকের জীবন নির্ণয় করিবার জন্য কতকগুলি শিলাস্তম্ভ এবং প্রস্তর ফলকের উপর নির্ভর করিতাম, না কম্পনাকে আশ্রয় করিয়া কতকগুলি উপকথাকে বেদবাক্য বলিয়া গ্রহণ

* তাহার মধ্যে একটি কথা এখানে বলা যাইতে পারে । এই দুই দেশের মধ্যে জ্যোতিষ শাস্ত্র সম্বন্ধে যে অনেক ভাবের বিনিময় হইয়া ছিল তাহার স্পষ্ট প্রমাণ আমরা বরাহমিহির কর্তৃক পঞ্চসিদ্ধান্তিকানামক গ্রন্থে প্রাপ্ত হই । প্রথমতঃ, পাঁচটি সিদ্ধান্তের নাম পাওয়া যায়, যথা পৈতামহ সিদ্ধান্ত, বশিষ্ঠ সিদ্ধান্ত, সৌর সিদ্ধান্ত, পৌলিশ সিদ্ধান্ত এবং রোমক সিদ্ধান্ত । ইহার মধ্যে রোমক কথার অর্থ রোম দেশীয় ইহা স্পষ্ট জানা যাইতেছে । পৌলিশ একজন আলেকজান্দ্রিয়া বাসী । তিনি ভারতে আসিয়া সূর্য্যসিদ্ধান্তের মতের উপর যবনদিগের জ্যোতিষ শাস্ত্র স্থাপনা করিয়া পুরাতন এবং নূতনে মিশাইয়া দিয়াছিলেন । দ্বিতীয়তঃ, রোমকপুর এবং যবনপুর এই দুইটি নগরের নামোল্লেখ আছে । তৃতীয়তঃ, উজ্জয়িনী এবং যবনপুরের প্রকৃত স্থান নির্ণীত আছে । তাহা হইতে যবনপুর যে আলেকজান্দ্রিয়া ইহাই প্রমাণ হইতেছে ।

করিতাম ? হায় ! অশোক একস্থানে অহঙ্কার করিয়া বলিয়া গিয়া-
ছেন যে যতদিন গগনে চন্দ্র সূর্য থাকিবে ততদিন তাঁহার ধর্মও
থাকিবে এবং তাঁহার নামও থাকিবে । চন্দ্র সূর্য এখনও বর্তমান ।
কিন্তু ভারতে তাঁহার ধর্ম কোথা এবং তাঁহার নামই বা কোথা ?

মৌর্য বংশ ।

বিষ্ণুপুরাণে মগধ দেশের সমুদয় রাজবংশের নাম কীর্তিত হইয়াছে । সেই দেশের প্রসিদ্ধ রাজার নাম জরাসন্ধ । জরাসন্ধ শ্রীকৃষ্ণের পরম শত্রু এবং দুর্ঘোষনের বন্ধু । ইহার পুত্রের নাম সহদেব । সহদেব কুরুক্ষেত্রে কুরুদিগের পক্ষে যুদ্ধ করিয়াছিলেন । তাঁহার পর আর ২১ জন রাজার নাম আছে । ইহাদিগের পর প্রদ্যোত বংশের পাঁচজন রাজা হন । তাহার পর নিম্নলিখিত রাজাদিগের নাম পাওয়া যায় — শিশুনাগ, কাকবর্ণ, ক্ষেমধর্ম্মন, ক্ষত্রোজ, বিম্বিসার, অজাতশত্রু, ধবক, উদয়ান, নন্দিবর্দ্ধন, মহানন্দ । মহানন্দের পুত্র একজন শূদ্রীর গর্ভজাত । তাঁহার নাম নন্দ এবং তিনি অতিশয় অর্থপিশাচ ছিলেন বলিয়া লোকে তাঁহাকে মহাপদ্ম বলিয়া ডাকিত । দ্বিতীয় পরশুরাম হইয়া তিনি ক্ষত্রিয় কুলকে ধ্বংস করিয়া ছিলেন । তাঁহার ক্ষমতার প্রভাবে সমস্ত পৃথিবী একছত্র হইয়াছিল । নন্দের সূমাল্য প্রভৃতি নামে আট জন পুত্র ছিল । ইহারা ক্রমান্বয়ে রাজত্ব করিলে পর কোটিল্য নন্দবংশকে বিনাশ করে । ইহাদিগের পর মৌর্যবংশ পৃথিবীর অধিপতি হয় । চন্দ্রগুপ্ত সেই বংশের প্রথম রাজা । তাঁহার পুত্র বিন্দুসার ; বিন্দুসারের পুত্র অশোকবর্দ্ধন ।

এই অশোকের বাল্য ইতিহাস অতিশয় সুন্দর এবং মনোহর । কথিত আছে যে যখন বিন্দুসার পাটলিপুত্রের রাজসিংহাসন অধিকার করিয়াছিলেন তখন চাম্পা নামক একটি গ্রামে এক জন ব্রাহ্মণ অবস্থিতি করিতেন । সেই ব্রাহ্মণের একটি পরমা সুন্দরী কন্যা ছিল । জ্যোতির্বিদ পণ্ডিতেরা এই গণনা করিয়াছিলেন যে সেই কন্যার গর্ভে দুইটি পুত্র জন্মিবে ; তাহার মধ্যে এক জন চক্রবর্তী রাজা

অর্থাৎ পৃথিবীপতি হইবেন এবং আর এক জন অতিশয় ধার্মিক হইয়া মানব মণ্ডলীর সুখ সাধন করিবেন ।

ব্রাহ্মণ এই বাণী শুনিয়া অতিশয় আনন্দিতমনে পার্শ্বপুত্র নগরে কন্যাকে লইয়া গেলেন । নগরে গিয়া বিন্দুসারের সহিত সাক্ষাৎ করিয়া তাঁহাকে বলিলেন,—“মহারাজ, আপনি আমার এই কন্যাটিকে আপনার করিয়া লউন । এটি সর্বদা সুন্দরী, সর্বপ্রকারে মহারাজের উপযুক্ত ।” বিন্দুসার কন্যাটিকে রাজবাটীতে রাখাইয়া দিলেন । তাহার পর অন্তঃপুরের স্ত্রীলোকেরা ভাবিল যে এই কন্যাটি দেখিতেছি অতি সুন্দরী । যদি মহারাজা ইহার মায়ার মুখ হন, তাহা হইলে আমাদের আর কোন ক্ষমতা থাকিবে না । অতএব কোন প্রকারে ইহাকে রাণী হইতে দেওয়া হইবে না । এই মনে করিয়া তাহারা তাহাকে ক্ষৌরকার্যে নিযুক্ত করিয়া দিল । সে প্রতিদিন মহারাজার মস্তকের কেশ বিছা়স করিয়া দিত, এবং ক্ষৌর কার্য করিত । প্রতিদিন এমনি সুন্দররূপে তাঁহার মস্তকে সে হাত বুলাইত যে মহারাজা ঘুমাইয়া পড়িতেন । একদিন বিন্দুসার সম্মুখস্থিত সেই কন্যাকে বলিলেন, “তুমি আমাকে সুন্দর রূপে সেবা করিয়া থাক, তুমি বর প্রার্থনা কর, আমি তোমার কামনা পূর্ণ করিব ।” কন্যা বলিল, “মহারাজ, আমাকে আপনার রাজমহিষী করিয়া লউন ।” বিন্দুসার বলিলেন, “সে কেমন করিয়া হইবে ? আমি হইলাম ক্ষত্রিয়, আর তুমি একজন শূদ্রকন্যা ।” কন্যা বলিল, “আমি ব্রাহ্মণকন্যা, আপনার মহিষীরা আমাকে এইরূপ কার্যে নিযুক্ত করিয়াছেন ।” বিন্দুসার এই কথা শুনিয়া তাঁহার রাণীদিগের উপর বিরক্ত হইলেন এবং সেই কন্যাকে প্রধানা রাজমহিষী করিয়া দিলেন ।

সেই কন্যার গর্ভে ক্রমান্বয়ে দুইটি পুত্র জন্মিল । প্রথমটি ভূমিষ্ঠ হইবার কালে তাহার মাতার কোন কষ্ট হয় নাই বলিয়া তাহার নাম হইল অশোক, এবং দ্বিতীয়টি প্রায় সেই কারণেই বিগতশোক নাম প্রাপ্ত হইল ।

কিন্তু অশোকের প্রতি বিন্দুসার সন্তুষ্ট ছিলেন না । অশোকের শরীর দেখিতে অতি কদাকার ছিল, এবং তাহাকে স্পর্শ করিলে বোধ হইত যেন তাহার অঙ্গময় কুষ্ঠরোগ হইয়াছে । এই কারণে বিন্দুসার তাঁহার সেই পুত্রের মুখ পর্য্যন্ত দেখিতে দেন না । একদিন মহারাজ তাঁহার পুত্রদিগের শিক্ষক পিক্সলকে ডাকাইয়া বলিলেন, একবার “আমার পুত্রদিগের পরীক্ষা লইতে হইবে । আমার মৃত্যু হইলে তাহাদিগের মধ্যে কে সিংহাসনে বসিবে তাহা আমার জানা উচিত ।” পিক্সল বলিলেন, “মহারাজ বাহা মনে করিয়াছেন তাহাই হইবে । অতএব শুভদিন স্থির করুন । আপনার স্বর্ণ মণ্ডপে পুত্রগণ পরীক্ষিত হইবে ।” নির্দিষ্ট দিবসে রাজকুমারেরা স্বর্ণমণ্ডপে গিয়া উপস্থিত হইলেন ।

এদিকে অশোকের মাতা অশোককে ডাকিয়া বলিলেন, “বাছা, রাজকুমারেরা স্বর্ণমণ্ডপে গিয়াছেন । কে রাজা হইবেন আজ তাহা স্থির হইবে । তুমিও সেখানে যাও ।” অশোক বলিলেন, “মা, আমি সেখানে কেমন করিয়া যাইব । মহারাজ আমাকে দেখিতে পারেন না । আমি সেখানে গেলেই তিনি অসন্তুষ্ট হইবেন ।” মা বলিলেন, “বাছা, তথাপি সেখানে যাওয়া উচিত ।” অশোক মাতার অনুরোধ পালনে স্বীকৃত হইলেন । বিন্দুসারের একটি বৃদ্ধ হস্তী ছিল । সেই হস্তীর উপর চড়িয়া অশোক স্বর্ণমণ্ডপে উপস্থিত হইলেন । রাজকুমারেরা নানারূপ স্বর্ণ এবং রত্নখচিত আসনে উপবিষ্ট ছিলেন । অশোককে কেহ বসিতে না বলাতে তিনি ভূমির উপরেই বসিলেন । তৎপরে রাজকুমারেরা অতিশয় উপাদেয় মিষ্ট খাদ্য সকল খাইতে আরম্ভ করিলেন । অশোকের মাতা তাঁহার জন্য দধি চিড়া পাঠাইয়া দিয়াছিলেন, তিনি সেই গরিবের আহারই ভোজন করিলেন ।

বিন্দুসার পিঙ্গলকে ডাকিয়া বলিলেন, “একশে পরীক্ষা আরম্ভ হউক । দেখি ইহার মধ্যে কে রাজা হইবার উপযুক্ত ।” পিঙ্গল চারিদিকে তাকাইয়া মনে করিলেন, আমিও দেখিতেছি ইহার মধ্যে অশোকই সমুদয় রাজচিহ্ন ধারণ করিতেছে । কিন্তু কিরূপে তাহা বলি । অশোকের কথা বলিতে গেলেই নিশ্চয়ই মহারাজা তাহার প্রাণ লইবেন এবং আমারও প্রাণ লইয়া টানাটানি হইবে । এই মনে করিয়া পিঙ্গল বলিয়া উঠিলেন, “মহারাজ, আমি ব্যক্তিনির্বিশেষে বলিয়া দিতেছি, কে রাজা হইবেন ।” বিন্দুসার বলিলেন, “তাহাই হউক ।” পিঙ্গল বলিলেন, “ইহাদের মধ্যে ষাঁহার সর্বোৎকৃষ্ট যান আছে, তিনিই রাজা হইবেন ।” বিন্দুসার বলিলেন, “তার পর ?” পিঙ্গল বলিলেন, “ষাঁহার সর্বোৎকৃষ্ট আসন আছে তিনিই রাজা হইবেন ।” “তারপর ?” “ষাঁহার সর্বোৎকৃষ্ট পানীয় পদার্থ আছে তিনিই রাজা হইবেন ।”

প্রত্যেকেই মনে করিতে লাগিলেন আমার সর্বোৎকৃষ্ট যান ইত্যাদি আছে, সুতরাং আমিই রাজা হইব । এদিকে অশোক ঘরে ফিরিয়া আসিলেন । তাঁহাকে কেহ গ্রাহ করে নাই । কিন্তু তাঁহার মনে ঋব বিশ্বাস হইল যে তিনিই রাজা হইবেন । তাঁহার মাতা জিজ্ঞাসা করিলেন, “কি অশোক ? পরীক্ষায় কিরূপ উত্তীর্ণ হইলে ?” অশোক বলিলেন, “মা, তিনু পিঙ্গল ব্যক্তিনির্বিশেষে নিজমত প্রকাশ করিয়াছেন । কিন্তু বাহা বলিলেন তাহা হইতে আমার ঋব বিশ্বাস হইতেছে যে আমিই রাজা হইব ।” তাঁহার মাতা জিজ্ঞাসা করিলেন, “কেমন করিয়া তোমার এমন বোধ হইল ?” অশোক বলিলেন, “দেখ মা, পিঙ্গল বলিলেন, ষাঁহার সর্বোৎকৃষ্ট যান আছে, তিনিই রাজা হইবেন । আমি দেখিলাম যে অন্যেরা বহুমূল্য রথের উপর আরোহণ করিয়া তথায় উপস্থিত হইয়াছেন । আমি আমার পিতার অতি বৃদ্ধ হস্তীর পৃষ্ঠে চড়িয়া গিয়াছিলাম । সুতরাং আমারই যান সর্বোৎকৃষ্ট

কৃষ্ট । রাজার পক্ষে হস্তী অপেক্ষা উৎকৃষ্ট যান আর কি আছে ? তার পর তিনি বলিলেন, যাঁহার সকলকার অপেক্ষা ভাল আসন আছে তিনিই রাজা হইবেন । অন্তেরা কতবিধ রত্নমণিখচিত সিংহাসনে বসিয়াছিলেন, আর আমি শুদ্ধ মাটিতে বসিয়া ছিলাম । স্বয়ং পৃথিবী আমার আসন হইয়াছিল । তাহা অপেক্ষা উৎকৃষ্ট আসন আর কি হইতে পারে ? তার পর অন্তেরা স্তূর্ণ পাত্রে আহার করিয়াছিলেন । আমার কেবল একমাত্র মুশ্যপাত্র ছিল । আর আমার খাদ্য ছিল পৃথিবীর নূতন ধান্য এবং গাভীর দুগ্ধ ;—যাহা দেবতাদিগের আহার তাহাই । আমার পানীয় শুদ্ধ পরিষ্কার জল । সুতরাং আমার বিশ্বাস হইতেছে যে আমিই রাজা হইব । যেহেতু গজ আমার যান, পৃথিবী আমার আসন, মৃত্তিকা আমার ভোজন পাত্র, ধান্য এবং দুগ্ধ আমার খাদ্য এবং জল আমার পানীয় ।”

অশোকের মাতা পুত্রের কথা শুনিয়া স্তব্ধ হইয়া রহিলেন । অশোকও দিন দিন বৃদ্ধি প্রাপ্ত হইতে লাগিলেন । বাস্তবিক শেষে তাঁহারই কথা ঠিক হইল ।

বৌদ্ধ অশোক

অশোকের বিষয় যত পুস্তক লিখিত আছে সকলেতেই তাঁহার সম্বন্ধে এই এক কথা শুনিতে পাওয়া যায় যে বৌদ্ধ ধর্ম গ্রহণ করিবার পূর্বে তাঁহার প্রকৃতি একরূপ ছিল, পরে আর একরূপ হইয়া দাঁড়ায়। প্রথমে তিনি অতিশয় উদ্ধত, স্বেচ্ছাচারী এবং নির্দয় বলিয়া বর্ণিত হইয়াছেন, এবং পরে যে সকল গুণের দ্বারা লেখকেরা তাঁহাকে ভূষিত করেন সে সকল গুণ যদি সত্য হয় তাহা হইলে তাঁহাকে “দেবানাম প্রিয়” না বলিয়া থাকা যায়না। তাঁহার আকার সুন্দর ছিলনা। তিনি দেখিতে অতিশয় কদাকার ছিলেন। তাঁহার সর্বদা এক প্রকার বিকৃতি ছিল। তাহা দেখিয়া তাঁহার পত্নীগণও তাঁহাকে ঘৃণা করিত। এ সম্বন্ধে তাঁহার সহিত বুদ্ধদেবের স্বর্গমর্ত প্রভেদ।

বুদ্ধের প্রতিমূর্তি দেখিয়া এক সময় পণ্ডিতেরা স্থির করিয়াছিলেন যে তিনি কখনই আর্য্যজাতির লোক হইতে পারেন না। কর্ণদ্বয় আলসিত, মস্তকের কেশরাশি কুঞ্চিত এবং ওষ্ঠদ্বয় স্থূল দেখিয়া তাঁহারা ঠিক করিয়াছিলেন যে তিনি একজন কাফ্রি হইবেন। কিন্তু যখন বৌদ্ধ পুস্তক সকল অনুবাদিত হইতে লাগিল তখন তাহাদিগের মধ্যে বুদ্ধদেবের ৩২টি প্রধান এবং ৮০টি অপ্রধান শারীরিক লক্ষণ বর্ণিত আছে দেখা গেল। তাহা পড়িয়া বুদ্ধ যে কাফ্রি জাতীয় ইহা প্রতিপন্ন হইল না। সম্পূর্ণ আর্য্য লক্ষণ দেখিয়া তাঁহাকে ভারতের লোক বলিয়াই স্থির করা হইল। ইউরোপীয় পণ্ডিতেরা সহজে ভারতের প্রশংসা করিতে চাহেন না। যদি একটা নূতন আবিষ্কৃত্য এখানে হইয়া থাকে, তাহাহইলে তাঁহারা তাহাকে প্রথমতঃ ভিন্ন দেশীয় কিম্বা ভিন্ন জাতীয় বলিয়া প্রতিপন্ন করিতে চেষ্টা করেন। যদি তাহা অনেক দিন আগে হইয়া থাকে, তাহাহইলে তাহা কোন মতে খ্রীষ্টাব্দের পরে

হইয়াছে বলিয়া প্রতিপন্ন করা চাই । শাক্যের ভাগ্যে ইহা ভিন্ন আরও দুর্ঘটনা ঘটিয়াছিল । তিনি ভারতবাসীত নহেন—কাফি না হইয়া যাননা । যে সকল ধীসম্পন্ন পণ্ডিতেরা ইহা অক্লেশে বিশ্বাস করিতে পারিলেন তাঁহারা একথা ভাবিলেননা যে কাফিদিগের মধ্যে এ পর্য্যন্ত কোনপ্রকার সভ্যতার সৃষ্টি হয় নাই । তবে সে জাতির মধ্য হইতে একজন প্রকাণ্ড ধর্ম্ম সংস্থাপক কিরূপে উৎপন্ন হইবেন ? ইহা ছাড়া কেহ কেহ বুদ্ধের অস্তিত্ব পর্য্যন্ত অলীক বলিয়া মনে করিয়াছেন । তিনি সূর্য্যদেব ছিলেন ; কল্পনা সূত্রে কবির। তাঁহাকে একজন মানুষ বলিয়া স্থির করিয়া লইয়াছে । এরূপ কথাও কেহ কেহ বলিয়াছেন । এখন বোধ হয় আর কোন বুদ্ধিমান লোক তাঁহার অস্তিত্ব অস্বীকার করিতে সাহস করিবেন না । শাক্য একজন ঐতিহাসিক পুরুষ—তিনি একটা নূতন ধর্ম্মের প্রবর্ত্তক, বোধ হয় সকলেই এই কথা ধ্রুব সত্য বলিয়া স্বীকার করিয়া লইয়াছেন । পুস্তকের বর্ণনা পড়িয়া আমরা শাক্যের প্রতি-মূর্ত্তি অক্লেশে কল্পনা করিয়া লইতে পারি । তিনি অতিশয় সুন্দর পুরুষ ছিলেন । তল্ল বৌদ্ধেরা তাঁহার শরীরের প্রত্যেক অঙ্গের বর্ণনা করিয়া গিয়াছেন । বৌদ্ধদিগের মধ্যে এই মত প্রচলিত ছিল যে যিনি নূতন ধর্ম্ম সংস্থাপন করিবার জন্য পৃথিবীতে অবতীর্ণ হন তাঁহাকে সুন্দর হইতেই হইবে । কেননা তাঁহাকে লোকের মন আকর্ষণ করিতে হইবে, এবং লোকের মন আকর্ষণ করিতে পারিবেন বলিয়া ভগবান তাঁহাকে সকল প্রকার শারীরিক সৌন্দর্য্যে ভূষিত করিয়া পাঠাইয়া দেন । একথা বোধ হয় সত্য—অস্তুতঃ যে সকল ধর্ম্ম সংস্থাপকেরা জন্মগ্রহণ করিয়াছেন তাঁহাদিগের সম্বন্ধে সত্য । আমাদিগের দেশে রামচন্দ্র, শ্রীকৃষ্ণ, নানক, চৈতন্য, অন্যান্য দেশে ঈশা, মুসা, মহম্মদ, সকলেই অতিশয় সুন্দর পুরুষ বলিয়া বিখ্যাত ছিলেন ।

ধর্ম্মসংস্থাপকেরা সুন্দর বলিয়া প্রসিদ্ধ । কিন্তু অশোক ধর্ম্ম

সংস্থাপক ছিলেন না। তিনি রাজা হইয়া ক্ষমতা প্রদর্শন করিয়া ধর্মরাজ্য বিস্তার করিয়াছিলেন। তাঁহার পক্ষে শারীরিক সৌন্দর্যের বিশেষ আবশ্যকতা ছিলনা বলিয়া বোধ হয়। যাহাই হউক না কেন তিনি একজন কুৎসিত পুরুষ বলিয়া বর্ণিত হইয়াছেন। ইহা ছাড়া সকলেই বলেন যে তিনি অতিশয় নিষ্ঠুর ছিলেন। তাঁহার পিতা বিন্দুসার তাঁহাকে ভাল বাসিতেন না। কিন্তু তিনি নিজ বুদ্ধিবলে রাজা হন। পিতার মৃত্যু হইলে তিনি চারি বৎসর নিজ ভ্রাতৃগণের সহিত যুদ্ধ করেন। সেই যুদ্ধে তিনি জয়ী হইয়া সকলকে বধ করিলেন। রাজা হইয়া উদ্ধত স্বভাব দেখাইয়া সকলকে ভয়ের দ্বারা বশীভূত করেন। লোকে বলে যে তিনি নিজ পত্নীদিগকেও রক্ষা করিতেন না। একদিন তাহার স্বামীর কুৎসিত আকার লইয়া ব্যঙ্গ করিয়াছিল বলিয়া তিনি অগ্নিতে দগ্ধ করিয়া তাহাদিগের প্রাণবধ করিয়াছিলেন। পরে তাঁহার এতদূর অহঙ্কার হইয়াছিল যে তিনি আপনাকে দেবতা বলিয়া মনে করিতে লাগিলেন।

তিনি সর্বদা বিপুল ঐশ্বর্য দ্বারা পরিবেষ্টিত থাকিতেন বলিয়া একদিন মনে করিলেন যে আমিত ইন্দ্র এবং এই পাটলিপুত্র ইন্দ্রপুরী। আমার পুরস্কারে লোকে যেমন স্বর্গ পায় তেমনি আমার দণ্ডে তাহার নরকগ্রস্ত হয়। স্বর্গ আমার বাসভবন, কিন্তু নরক তাই। এই বলিয়া তিনি মনে করিলেন যে আমার রাজ্যে একটি নরক থাকা চাই। যেমন মনে হইল তেমন তাহা তখনি কার্য্যেও পরিণত হইল। এক প্রকাণ্ড অট্টালিকা নিৰ্ম্মাণ করাইয়া তাহার মধ্যে একজন বিকটাকার পুরুষকে রাখিয়া তাহাকে বলিলেন যে “ইহার মধ্যে যে একবার প্রবেশ করিবে তাহাকে তখনি বধ করিবি; সে আর বাহিরে আসিতে পারিবে না।” এইরূপে মহা হত্যাকাণ্ড আরম্ভ হইল। কত লোকের যে প্রাণ গেল তাহার সংখ্যা নাই। একদিন একজন বৌদ্ধ ভিক্ষু সেই গৃহে ভিক্ষা প্রার্থনা করিবার মানসে উপস্থিত হইল। ভিক্ষা তাহাইল না, বরং সেই বিকটাকার পুরুষ তাহাকে বলিয়া উঠিল যে “তুই আর বাহিরে

যাইতে পারিবি না।” ভিক্ষু চারিদিক অন্ধকার দেখিয়া নরকরক্ষককে বলিল, “অন্ততঃ আমাকে চারিদিন সময় দাও। তাহার পর আমি মৃত্যুর সম্মুখীন হইতে পারিবা।” তাহার প্রার্থনা গ্রাহ হইল। চারি দিনের মধ্যে, ভিক্ষু ঘোরতর সাধন আরম্ভ করিল। মৃত্যুর করাল বদন ভাবিতে ভাবিতে তাহার জ্ঞান চক্ষু প্রস্ফুটিত হইল। আর সে মৃত্যুকে ভয় করিল না। দিব্য পদার্থ পাইয়া সে স্থির চিত্তে মৃত্যুর স্থানে উপস্থিত হইল। নরকরক্ষক তাহাকে মারিবার জন্ত প্রকাণ্ড অগ্নি জ্বালাইয়া রাখিয়াছে। তাহার উপর একটা বৃহৎ তাম্র নিশ্চিত পাত্র আছে। তাহাতে তৈল পড়িয়াছে। ভিক্ষু সেই তৈলে পড়িয়া প্রাণত্যাগ করিবে। বিকটাকার নরকরক্ষক বিকট হাস্য করিয়া ভিক্ষুকে বলপূর্বক সেই তাম্র পাত্রের উপর বসাইতে চেষ্টা করিল। কিন্তু ভিক্ষু সমাধি অবস্থাতে নিমগ্ন ছিল। তাহাকে তাম্র পাত্রে বসাইতে পারিল না। সে বিস্মৃত পক্ষ পক্ষীর ন্যায় অগ্নি হইতে অনেক উচ্চে উড়িতে লাগিল। ইহা দেখিয়া নরকরক্ষক আশ্চর্যান্বিত হইয়া এই সম্বাদ দ্বারা অশোকের নিকট প্রেরণ করিল। মহারাজ তৎক্ষণাৎ সেখানে উপস্থিত হইয়া সমস্ত ব্যাপার শুনিলেন এবং দেখিলেন। তাঁহার হৃদয় আর্জ হইল এবং তখনই সেই ভিক্ষুকে নিকৃতি দিবার অনুমতি করিলেন। তাহার পর তিনি নিজে নরকধাম হইতে বাহিরে আসিতে প্রস্তুত হইতেছেন এমন সময় সেই নরকরক্ষক মহারাজার সম্মুখে দণ্ডায়মান হইয়া বলিল, “মহারাজ এখান হইতে ত কাহারও বাহিরে যাইবার অনুমতি নাই।” অশোক মহাক্রুদ্ধ হইয়া বলিয়া উঠিলেন—“কি ? আমাকে মারিবার ইচ্ছা ? তবে তুই ত ভিতরে আসিয়াছিস ? তোর আর বাহিরে যাওয়া হইবে না। কে ওখানে ?” এই বলিয়া তিনি সেই নরকরক্ষককে অগ্নির উপরিস্থ তৈল পূর্ণ তাম্র পাত্রের মধ্যে নিক্ষেপ করিবার নিমিত্ত ভূত্যবর্গকে অনুমতি দিলেন। মহারাজ বাহিরে আসিয়াই সেই অট্টালিকাকে চূর্ণ বিচূর্ণ করিবার আদেশ দিলেন। গৃহে প্রত্যাগমন করিয়াই তিনি সেই ভিক্ষুকে ডাকাইলেন ও তাহার মুখে

বুদ্ধ এবং বৌদ্ধধর্মের বিষয় সকলই শুনিলেন । তাঁহার হৃদয়ে এক আশ্চর্য্যজনক পরিবর্তন হইল । তিনি বুদ্ধকে বিশ্বাস করিলেন এবং তাহার পরই সেই নূতন ধর্মের রক্ষক, প্রচারক এবং প্রতিপালক হইলেন ।

এই গম্পটি একটি উপকথা মাত্র । কিন্তু ইহার শিক্ষা আছে । যে নৃপতি এত উদ্ধতস্বভাব তিনিও বৌদ্ধধর্মের অমায়িক ভাব দেখিয়া একেবারে নূতন মানুষ হইয়া গেলেন । ইহা যে সেই নবধর্মের গৌরবের কথা তাহাতে আর সন্দেহ নাই । বৌদ্ধেরা বোধ হয় তাহা-দিগের ধর্মের গৌরব বৃদ্ধি করিবার জন্তই অশোককে এইরূপ ভাবে অন্ধিত করিয়াছে । যাহা হউক অশোক নূতন ধর্ম গ্রহণ করিয়া আর নিশ্চিন্ত থাকিতে পারিলেন না । কি উপায়ে তাহা চারিদিকে বিস্তৃত হইবে ইহাই তাঁহার চিন্তা হইল । তাঁহার অভিষেকের চারি বৎসর পরে সেলিউকাস নাইকেটারের পৌত্র আন্তিয়োকাস নৃপতি তাঁহার সঙ্গে সন্ধি স্থাপন করিবার জন্ত সিঙ্কুনদ পর্য্যন্ত অগ্রসর হইলেন । এই সন্ধি হইতে ধর্ম প্রচারের অনেকটা সুযোগ হইল । কিন্তু ধর্ম প্রচারের অগ্রে ধর্মটা কি ইহা সূক্ষ্মভাবে স্থিরীকৃত হওয়া আবশ্যক হইয়াছিল ।

বৌদ্ধদিগের মহাসভা ।

অশোক বৌদ্ধ ধর্মের আশ্রয় গ্রহণ করিবার পর ষাঠাতে সেই ধর্মের নানা মতে জীবদ্ধি হয় তাহার চেষ্টা করিতে লাগিলেন। ভিক্ষু ও ভিক্ষুনীদের প্রতি তাঁহার অগাধ অনুগ্রহ ছিল। নানা প্রকারে তাহাদিগকে অর্থদান করিয়া সাহায্য করিতেন, এবং তাঁহার দৃষ্টান্ত দেখিয়া তাঁহার অনুচর বর্গও সেইরূপ আচরণ করিতে লাগিলেন। এই সকল ব্যাপার দেখিয়া ব্রাহ্মণেরা মহা ভয় পাইল, কারণ দিন দিন তাহাদিগের উপার্জন কমিয়া যাইতেছিল এবং অবশেষে জীবিকা নির্বাহ পর্য্যন্ত তাহাদিগের পক্ষে কষ্টকর হইয়া উঠিল। ধর্মের জয় ধর্মকাষ্য দ্বারা সম্পাদন না করিয়া তাহারা সামান্য কৌশল অবলম্বন করিয়া স্বধর্মকে ঘৃণিত ও অবমানিত করিয়া ফেলিল। অন্য কোন প্রকার উপায় স্থির করিতে না পারিয়া তাহারা অনেকে গৈরিক বস্ত্র পরিধান করিয়া বিহার সমূহে উপস্থিত হইয়া আপনাদিগকে বৌদ্ধ ভিক্ষু বলিয়া স্বীকার করিল। যথা সময়ে অন্যান্য ভিক্ষুদিগের সহিত তাহারা নিত্য ভিক্ষা দ্রব্য পাইতে লাগিল বটে, কিন্তু তাহাদিগের ব্যবহারে কোন প্রকার উচ্চতাব দেখাইতে পারিল না। বৌদ্ধ মণ্ডলীর মধ্যে তাহারা ব্রাহ্মণ ধর্মের আচার সকল অনুষ্ঠান করিতে লাগিল। কেহ কেহ অগ্নি দ্বারা বেষ্টিত হইয়া যাগ যজ্ঞের অনুষ্ঠান করিত; কেহ বা সমস্ত দিবস সূর্যের প্রতি এক দৃষ্টিতে তাকাইয়া থাকিত। লোকে যদি প্রতিবাদ করিত, তাহা হইলে তাহারা বলিয়া উঠিত যে এ সকল ব্যবহার শাস্ত্র সন্মত এবং একরূপ আচরণ না করিলে ভিক্ষুব্রত রক্ষা করা যায় না। প্রকৃত বিশ্বাসীরা এই সকল কুৎসিত কার্য দেখিয়া অখোবদন হইয়া থাকিতেন। সমুদয় বিহারে ঘোর অন্যায়াচার এবং অরাজকতা চলিতে

লাগিল । এমন কেহ নাই যাহার কথা শুনিয়া লোকে বিশুদ্ধ পথ অবলম্বন করিতে পারে । এইরূপে সাত বৎসর চলিয়া গেল । মঙ্গলী পুত্র তিষ্য তখনকার ভিক্ষু সঙ্ঘের সভাপতি ছিলেন । তিনি কোন প্রকার প্রতিবিধান করিতে না পারিয়া বিরক্ত হইয়া স্বদেশে গিয়া নির্জ্জনতা অবলম্বন করিয়া রছিলেন ।

এই সকল ব্যাপার অবশেষে মহারাজার কর্ণে প্রবেশ করিল । তিনি তৎক্ষণাৎ একজন কৰ্মচারীকে ভিক্ষু মণ্ডলীর মধ্যে প্রেরণ করিলেন এবং তাঁহাদিগকে শীঘ্র সমস্ত বিবাদের মীমাংসা করিয়া লইবার আজ্ঞা প্রদান করিলেন । সেই কৰ্মচারী তরবারি হস্তে তথায় উপস্থিত হইয়া ভিক্ষুদিগকে বলিল যে মহারাজা এইরূপ আজ্ঞা করিয়াছেন এবং অতঃপর যদি কেহ সেই আজ্ঞা লঙ্ঘন করেন আমি তাহার শিরশ্ছেদন করিব । কিন্তু তাহার কথা শুনিয়া যথেষ্টাচারী ভিক্ষুদিগের মধ্যে কেহই ভয় পাইল না । তাহাদিগের মধ্যে একজন এতদূর উদ্ধত হইয়া পড়িয়াছিল যে কৰ্মচারী ক্রোধ সঞ্চরণ করিতে না পারিয়া তখনই তরবারি দ্বারা তাহার মস্তক ছেদন করিয়া ফেলিল । গোলযোগ আরও বাড়িল ; মীমাংসা দূরের কথা, তখন হইল না ।

মহারাজা এই দারুণ সম্বাদ শুনিয়া কৰ্মচারীকে যৎপরোনাস্তি ভৎসনা করিতে লাগিলেন এবং একজন দেবচরিত্র ভিক্ষুর প্রাণ বধ হইয়াছে শুনিয়া তাঁহার মনে অতিশয় আত্মশ্রানি আসিয়া উপস্থিত হইল । তিনি বুদ্ধসঙ্ঘের প্রধান প্রধান ভিক্ষুদিগকে জিজ্ঞাসা করিলেন যে এই প্রাণ হানির জন্ত তিনি দায়ী কি না । তাঁহাদিগের মধ্যেও মতভেদ হইতে লাগিল । কেহ কেহ বলিলেন যে এ বিষয়ে মহারাজের কোন দোষ নাই, কেহ কেহ বলিলেন যে মহারাজের যথেষ্ট দোষ হইয়াছে এবং তাহার জন্ত সম্যক প্রায়শ্চিত্ত আবশ্যক । অশোক ভয়ে এবং শোকে অস্থির হইয়া অবশেষে মঙ্গলীপুত্র তিষ্যের নিকট লোক পাঠাইলেন । মঙ্গলীপুত্র

ভিক্ষুদিগের আচার ব্যবহারে অত্যন্ত বিরক্ত হইয়াছিলেন এই জ্ঞাতি তিনি আসিতে চাহিলেন না। পরে বার বার বহু সংখ্যক দূত প্রেরণ করিলে পর তিনি পাটলিপুত্রে আসিতে সম্মত হইলেন। অশোক অনুচরবর্গ দ্বারা বেষ্টিত হইয়া গঙ্গাতীরে তাঁহাকে অভ্যর্থনা করিবার জ্ঞাতি উপস্থিত হইলেন এবং মঙ্গলীপুত্রকে সঙ্গে করিয়া এক মনোরম উদ্যানে তাঁহার বাসস্থান স্থির করিয়া দিলেন।

অবশেষে অশোক একটি সামান্য শিষ্যের ন্যায় মঙ্গলীপুত্রের চরণ বন্দনা করিয়া করষোড়ে তাঁহাকে সমুদয় ব্যাপার অবগত করাইলেন। অশোক অনুতপ্ত হৃদয়ে জিজ্ঞাসা করিলেন—“আর্য্য, এই প্রাণ বধের জন্য আমার কি কোন অপরাধ হইয়াছে?” মঙ্গলীপুত্র বলিলেন—“মহারাজ, যখন আপনি কর্মচারী প্রেরণ করেন, তখন কি কাহারও প্রাণ দণ্ড করিবার আজ্ঞা ছিল?” অশোক বলিলেন “না।” “তাহা হইলে, হে মহারাজ, আপনারও কোন দোষ নাই, যে হেতু আপনি প্রাণদণ্ড মানসে কর্মচারীকে পাঠান নাই। মনের উপরই কর্ম সকলের ধর্ম্মাধর্ম্ম নির্ভর করে, এবং পাপ পুণ্যের বিচার তাহা হইতেই হয়।” অশোক নিশ্চিত হইলেন এবং যাহাতে বুদ্ধ সঙ্কের বিরোধ দূর হইয়া যায় তাহার জন্য মঙ্গলীপুত্রকে একান্ত হৃদয়ে অনুরোধ করিলেন।

এই সকল ঘটনার সাতদিন পরে পাটলিপুত্র নগরে বৌদ্ধদিগের এক মহা সভা হয়। মঙ্গলীপুত্র তিষ্য যে উদ্যানে বাস করিতেন তথায় একটি বৃহৎ মণ্ডপ নির্মিত হইল। মণ্ডপের একধারে অশোকের জন্য একটি রাজ সিংহাসন স্থাপিত হইল এবং সভ্যেরা পদ অনুসারে নিজ নিজ নির্দিষ্ট আসনে মণ্ডপের চারিদিকে উপবিষ্ট হইলেন। মঙ্গলীপুত্র তিষ্য এই সভার সভাপতি হইলেন। ভিক্ষুদিগকে পরীক্ষা করাই সভার প্রথম কার্য্য ছিল। এক একজন ভিক্ষু সভাপতির নিকট উপস্থিত হইলে তিনি তাহাদিগকে ধর্ম্ম

বিষয়ে কতকগুলি প্রশ্ন করেন। তাহাদিগের মধ্যে যাহাদিগের মত এবং আচার ব্যবহার ত্রিপিটক শাস্ত্রের বিরোধী বলিয়া বোধ হইল তাহাদিগকে তৎক্ষণাৎ সঙ্গ হইতে বহিষ্কৃত করিয়া দেওয়া হইল। তাহারা অধোবদন হইয়া সভার সম্মুখে গৈরিক বস্ত্র পরিত্যাগ করিয়া ব্রাহ্মণের দ্বৈত বস্ত্র পরিধান করিল। মহারাজ নিজে সভায় উপস্থিত থাকায় কাহারও কোন প্রকার ক্রোধসূচক বাক্য বলিবার সাধ্য হইল না। এই প্রকারে যথেষ্টাচারীদিগকে বহিষ্ঠৃত করিয়া দিয়া প্রকৃত বিশ্বাসীরা নির্ভয়ে ধর্ম পালন করিতে লাগিলেন। •

ধর্ম স্থির করা সভার দ্বিতীয় কার্য ছিল। সেই সময়ে পাটলিপুত্র নগরে যে সকল বিশ্বাসী দল ছিল তাহাদিগের মধ্যে এক সহস্র ভিক্ষু মনোনীত করিয়া মঙ্গলীপুত্র তাহাদিগের সাহায্যে ত্রিপিটক শাস্ত্র স্থির করিয়া লইলেন। বুদ্ধের মৃত্যুর পর মহা কাশ্যপ যে প্রথম সভা আহ্বান করিয়াছিলেন তাহাতে সূত্র, বিনয় এবং অভিধর্ম এই তিনটি বৌদ্ধ শাস্ত্রের প্রধান অঙ্গ বলিয়া স্থিরীকৃত হয়। সেই তিনটি শাস্ত্র ত্রিপিটক বলিয়া বিখ্যাত। অশোকের সময় এই ত্রিপিটক পুনর্ববার বিচারিত এবং স্থিরীকৃত হয়। এই সভার এক বৎসর কাল অধিবেশন হয়।

অশোকের সময় বৌদ্ধধর্মের যে সকল মত স্থিরীকৃত হয় তাহাই এখন সিংহল দেশে প্রচারিত আছে। তাহার মৃত্যুর পরে তাহার রাজ্য ছিন্ন ভিন্ন হইয়া যায় এবং তাহার ধর্মও অনেকটা বিকৃত হইয়া পড়ে। কুসংস্কার আসিয়া বৌদ্ধধর্মকে যে ভাবে পরিণত করিয়াছিল সেই ভাব সমস্ত উত্তর ভারতবর্ষে এবং তথা হইতে চীন, জাপান, তাতার এবং তিব্বতে বিস্তারিত হয়। সুতরাং ইহা বলা যাইতে পারে যে যদি অশোকের সময় বৌদ্ধ ধর্মের ভাব ঠিক কি ছিল তাহা বুঝিতে ইচ্ছা করি, তাহা হইলে তাহা ব্রহ্মদেশে, শ্রাম এবং সিংহল দ্বীপে যে সকল পুস্তক সংরক্ষিত আছে তাহা

হইতে জানিতে পারা যাইবে । আর কালের গতিতে বৌদ্ধধর্ম শাখা প্রশাখা বিস্তারিত করিয়া এশিয়া মহাভাগের অধিকাংশ দেশকে ঘে ছায়া বিতরণ করিয়াছিল তাহার আভাস তিব্বত, নেপাল প্রভৃতি দেশে প্রাপ্ত হওয়া যায় । এই প্রকৃত বৌদ্ধ ধর্ম বিকৃত হইয়া অবশেষে অনেক প্রকার কুসংস্কারকে প্রশ্রয় দেয় । তন্ত্র মন্ত্র আশিয়া ইহাকে একেবারে বিকৃত করিয়া ফেলে । সে সমুদয় অশোকের পর হইয়াছিল ।



প্রচারক প্রেরণ।

মহাসভা দ্বারা ধর্ম স্থিরীকৃত হইলে অশোক চারিদিকে প্রচারক পাঠাইতে আরম্ভ করিলেন। দ্বীপবংশ পুস্তকে কোন্ কোন্ দেশে কোন্ কোন্ প্রচারককে পাঠান হইয়াছিল তাহার উল্লেখ আছে। নিম্নলিখিত তালিকাটি পড়িলে মনের মধ্যে একটি অপূর্ব ভাবের উদয় হয়। প্রথম স্তম্ভে দেশগুলির নাম এবং দ্বিতীয় স্তম্ভে সেই সেই দেশে যে যে প্রচারককে পাঠান হইয়াছিল তাহা-দিগের নাম পাওয়া যাইবে। যথা

- | | | |
|-------------------------|--------|--|
| (১) কাশ্মীর এবং গান্ধার | | মজ্জিমস্তিক |
| (২) মহিষা মণ্ডল | | মহাদেব |
| (৩) বনবাসী | | রক্ষিত |
| (৪) অপরাস্ত | | যোন ধর্ম রক্ষিত (ইনি
ব্যাকট্রিয়া নিবাসী) |
| (৫) মহারাষ্ট্র | | মহাধর্ম রক্ষিত |
| (৬) যোন লোক | | মহারক্ষিত |
| (৭) হিমবস্ত | | মজ্জিম, ছরভিসার, সহ-
দেব এবং মূলকদেব। |
| (৮) সুবর্ণ ভূমি | | সেন এবং উত্তর |
| (৯) লঙ্কা | | মহেন্দ্র প্রভৃতি। |

(১) কাশ্মীরের নাম তখনও যাহা অর্ধনও তাহাই। গান্ধারকে এখন কান্দাহার বলে। মুসলমানদিগের আক্রমণের সময় পর্যন্ত কাবুল হিন্দু রাজ্যের অন্তর্গত এবং তথায় হিন্দু ধর্ম এবং বৌদ্ধ ধর্ম উভয়ই একত্র বিদ্যমান ছিল। বৌদ্ধদিগের অনেক কীর্তিস্তম্ভ এবং বিহার এখনও ভূমি খনন করিলে কাবুলে পাওয়া যায়।

(২) এদেশ গোদাবরী নদীর দক্ষিণ প্রান্তে।

(৩) এটি কোথায় এখনও ঠিক হয় নাই।

(৪) অপরাণ্ত সিন্ধুনদের পশ্চিমদিকে যে সকল ভারতের বহির্ভূত দেশ। ইহা বলিলে ব্যাকট্রিয়া, পারস্ত, প্রভৃতি দেশ বুঝিতে হইবে।

(৫) মহারাজ বোম্বাই দেশের প্রায় ৭০ ক্রোশ উত্তর পূর্বে, গোদাবরী নদীর উৎপত্তি স্থলে অবস্থিত।

(৬) যোন লোক। ইহাকে গ্রাস বলিতে হইবে। আইওনিয়া এবং যোন এই দুই শব্দের সৌশাদৃশ্য আছে। বোধ হয় যোন এবং যবন এই দুইয়েরই অর্থ গ্রীক। মহাবংশ পুস্তকের লেখক বলেন যে মহারক্ষিত যোন দেশে এক লক্ষ সপ্ততি সহস্র লোককে বুদ্ধের নির্দিষ্ট মার্গে আনয়ন করিয়াছিলেন, এবং তাঁহার উপদেশের প্রভাবে দশ সহস্র লোক ভিক্ষুব্রত অবলম্বন করিয়াছিল।

(৭) হিমবন্তকে মধ্য হিমালয় বুঝায়। মজ্জিম প্রচার কার্য সমাপ্ত করিয়া ভারতে ফিরিয়া আসিয়াছিলেন। তাঁহার সমাধি সাঞ্চি নামক স্থানে সম্প্রতি পাওয়া গিয়াছে।

(৮) ইহার নিরূপণ অদ্যাপি হয় নাই। কেহ কেহ বলেন ইহার দ্বারা মলয় উপদ্বীপ, সিঙ্গাপুর, রেঙ্গুন প্রভৃতি দেশ বুঝাইতেছে।

(৯) লঙ্কা। ইহার বিবরণ অতিশয় হৃদয়গ্রাহী। পরে বলা যাইতেছে।



লক্ষা ।

রামায়ণের সময় হইতে ভারতের সহিত এই দ্বীপের বিশেষ
যনিষ্ঠ সম্বন্ধ আছে। দ্বীপংশ পুস্তকেও বলে যে অগ্রে ইহা রাক্ষসাদি
দ্বারা পূর্ণ ছিল। পরে ভারতবর্ষের সুসভ্য জাতিরা সেই দ্বীপ
জয় করিয়া তথায় সভ্যতার আলোক প্রজ্বালিত করে। অশোকের
সময় সিংহলের রাজার নাম তিস্য ছিল। ইনিও অশোকের দেখা-
দেখি “দেবানাং প্রিয়” নাম লইয়াছিলেন। অশোক মহারাজ
হইবার পূর্বে উজ্জয়িনী প্রদেশের শাসনকর্তা ছিলেন। তখন তাঁহার
একটি পুত্র এবং একটি কন্যা হয়। পুত্রের নাম মহেন্দ্র এবং কন্যার
নাম সঙ্গমিত্রা। এই মহেন্দ্র তাঁহার পিতার অভিষেকের ছয়
বৎসর পরে ভিক্ষুব্রত অবলম্বন করেন। খ্রীঃ অব্দের ২৪৩ বৎসর
পূর্বে যখন চারিদিকে প্রচারক প্রেরিত হয়, তখন মহেন্দ্র মঙ্গলীপুত্র
তিষ্যের অনুরোধে সিংহল দ্বীপে প্রেরিত হন। তখন সমুদ্র দিয়া
যাতায়াত প্রথা প্রচলিত ছিল। বড় বড় নৌকা করিয়া বণিকেরা সমুদ্র
উত্তীর্ণ হইয়া বিদেশে যাইত। এইরূপে জাভা দ্বীপ পর্যন্ত ভারতবাসীরা
দেশীয় ধর্ম, সাহিত্য এবং পণ্য দ্রব্য সকল লইয়া যাইত।
পঞ্চম খ্রীঃ অব্দে ফাহিয়ান নামক চীন দেশীয় একজন ভ্রমণকারী
বঙ্গদেশ হইতে নৌকা করিয়া সিংহল দ্বীপে যান এবং তথা হইতে
অনেক যাত্রী সমভিব্যাহারে জাভা দ্বীপ দিয়া চীন দেশে উপস্থিত
হন। প্রকাণ্ড প্রকাণ্ড ঝড় মাথার উপর দিয়া বহিয়া যাইত। তথাপি
তখনকার লোকেরা নিরুদ্যম বা ভগ্নোৎসাহ হইত না। মহেন্দ্র
অনেক ভিক্ষু বর্গকে সঙ্গে লইয়া তাম্রলিপ্তের* বন্দরে জাহাজে উঠিয়া

* তাম্রলিপ্তকে এখন তমলুক বলে।

লঙ্কা দ্বীপে গমন করেন। মহা সভা দ্বারা স্থাপিত ত্রিপিটক শাস্ত্র এবং তাহার উপর যত ভাষা ছিল তাহা সঙ্গে লইয়া যান।

লঙ্কার রাজা “দেবানাম প্রিয়” তিষ্য তাঁহাকে অতি সাদরে অভ্যর্থনা করেন। ইহা বলা বাহুল্য যে তিষ্য অনতিবিলম্বে বৌদ্ধধর্মের আশ্রয় গ্রহণ করিলেন। তাহার পরই চারিদিকে ‘অতি সুন্দর সুন্দর বিহার এবং স্তূপ সকল নির্মিত হইতে লাগিল। অমুরাধাপুর নগরের অনতিদূরে মহেন্দ্রের জন্য একটি বিহার নির্মিত হয়। সে গৃহ এখনও বর্তমান আছে। স্থানটি মনোরম এবং সুন্দর। চারিদিকে পর্বত। সূর্যের কিরণে তাহা উত্তপ্ত হয় না। লোকের জনস্রব সেখানে পৌঁছে না। সেই খানে মহেন্দ্র ধ্যান করিতেন, কাষ্য করিতেন, এবং লোক দিগকে শিক্ষা দিতেন। সেই খানেই তিনি মানবলীলা সম্বরণ করেন এবং সেই খানেই তাঁহার ভ্রম্ম এখনও একটি স্তূপের নিম্নে সঞ্চিত আছে। লঙ্কাকে অনেকবার ভারতবর্ষ হইতে আক্রমণ সহ্য করিতে হইয়াছে। কিন্তু ভারতবর্ষে মুসলমানেরা আসিয়া যেমন সুন্দর সুন্দর অট্টালিকা এবং পুস্তক সমূহ নষ্ট করিয়া ফেলে, সিংহল দেশে তদ্রূপ হয় নাই। সুতরাং দুই সহস্র বৎসর পূর্বের যে সকল কীর্তি সেখানে প্রতিষ্ঠিত হইয়াছিল সে সমুদয়ই এখনও তথায় বর্তমান আছে।

লঙ্কার রাজা বৌদ্ধ ধর্ম গ্রহণ করিলেন দেখিয়া মহারাজী অনুলা এবং তাঁহার সখীরা ভিক্ষুণী হইবার মানস প্রকাশ করিলেন। মহেন্দ্র তাহা শুনিয়া বলিলেন যে ‘স্ত্রীলোকদিগকে ধর্মব্রতে দীক্ষা দান আমার দ্বারা হইবেন’। পাটলিপুত্র নগরীতে আমার সঙ্গমিত্রা-নায়া ভগিনী আছেন; তাঁহাকে আনিতে পারিলে সকল কার্য সুসিদ্ধ হইতে পারে। মহারাজ তিষ্য ইহা জানিতে পারিয়া তৎক্ষণাৎ অশোকের নিকট লোক প্রেরণ করিলেন, এবং কিছুকাল পরে মহেন্দ্রের ভগিনী সঙ্গমিত্রা, উত্তরা, হেমা, মালাগঞ্জা

অগ্নিমিত্রা, তপা, পর্বতচ্ছিন্না, মল্লা, এবং ধর্মদাসী নামী আট জন ভিক্ষুণী দ্বারা পরিবেষ্টিতা হইয়া লঙ্কায় গমন করিলেন। সঙ্গমিত্রা ও নিজে একজন ভিক্ষুণী ছিলেন। তিনি সঙ্কে করিয়া আর একটি বহুমূল্য পদার্থ লইয়া গিয়াছিলেন। বুদ্ধ গয়াতে যে অশ্বথ বৃক্ষের তলায় শাক্যসিংহ দিব্য জ্ঞান পাইয়া বুদ্ধ হন, সেই বোধি বৃক্ষের একটি শাখা লইয়া গিয়া তিনি অনুরাধাপুর নগরে পুঁতিয়া দেন। সেই ক্ষুদ্র শাখা বৃদ্ধি পাইয়া একটি প্রকাণ্ড বৃক্ষে পরিণত হয় এবং সেই বৃক্ষ এখনও জীবিত আছে। পাঠকেরা মনে ভাবুন ইহার আজ বয়স কত হইল। খ্রীঃ অব্দের ৫২৩ বৎসর পূর্বের শাক্য এই অশ্বথের নীচে সিদ্ধি লাভ করেন। তখন সেই বৃক্ষ শাখা প্রশাখা লইয়া জীবনের পূর্ণাবস্থা প্রাপ্ত হইয়াছিল। বৌদ্ধদিগের মধ্যে এক প্রবাদই আছে যে যে দিন বুদ্ধ জন্ম গ্রহণ করিয়াছিলেন সেই দিন এই বৃক্ষও জন্ম লাভ করে। অতএব সেই সময়ে ইহার বয়স ৩৫ বৎসর হইয়াছিল। মহেন্দ্র খ্রীঃ অব্দের ২৪৩ বৎসর পূর্বের সিংহলে যাত্রা করেন। তাহার পরবৎসরে সঙ্গমিত্রা অনুরাধাপুরে সেই শাখা স্থাপন করেন। খ্রীঃ অব্দের পূর্বের ২৪২ বৎসর এবং আজ খ্রীঃ অব্দের ১৮৯২ বৎসর। সেই জন্য অনুরাধাপুরের বোধিবৃক্ষের বয়স আজ ২,১৩৪ বৎসর হইল। পৃথিবীতে ইহা অপেক্ষা অধিক বয়স্ক ঐতিহাসিক বৃক্ষ আর কোথায় আছে? একটি প্রকাণ্ড ধর্মের ইতিহাসের সঙ্কে এই বৃক্ষটি সংযুক্ত আছে। ধর্মও একটি বৃক্ষ স্বরূপ। ইহার বীজ বপন করা হয়, পরে ইহা অকুরিত হয়, এবং ক্রমে বর্দ্ধিত হইয়া শাখা প্রশাখা রূপে পরিণত হয়। কোন রাজার আদেশে ইহার জন্ম ও হয় না লোপও হয় না। ইহা স্বর্গের পদার্থ; ইহার জন্ম, বৃদ্ধি, হ্রাস প্রাকৃতিক নিয়মের অধীন। বৌদ্ধ লেখকেরা বলিয়া গিয়াছেন যে এ বৃক্ষ চিরকাল থাকিবে। ইহার পত্র সকল চিরকাল হরিৎবর্ণ থাকিবে। সিংহল দ্বীপ সম্বন্ধে একথা সত্য। সেখানে ঐ বৃক্ষও

আছে এবং বৌদ্ধ ধর্মও আছে। কিন্তু ভারতে উভয়ের কোনটাই নাই।

বুধ গয়াতে সেই বৃক্ষের অবশিষ্ট অংশ ১৮৬৬ খ্রীঃ অব্দ পর্য্যন্ত বর্তমান ছিল। চীন দেশীয় ভ্রমণকারীরা তাহার বর্ণনা রাখিয়া গিয়াছেন। ব্রহ্মদেশে হইতে ১৮৩৩ খ্রীঃ অব্দে রাজদূতেরা এদেশে আগমন করেন। তাঁহারা এই বৃক্ষ দেখিয়া ইহাকে পূজা করেন এবং ইহার শাখা ব্রহ্মদেশে লইয়া যান। বৎসরের পর বৎসর, শতাব্দীর পর শতাব্দী চলিয়া গিয়াছে—দেশ দেশান্তর হইতে তীর্থ যাত্রীরা আসিয়া ইহার মূলে আতর সোলাপ প্রভৃতি সুগন্ধ সামগ্রী সেবন করিয়াছে। যখনই শিকড় সমূহ বাহির হইয়া পড়িয়াছে, তখনই ইহাকে ইষ্টক নির্মিত ভিত্তি দ্বারা বেষ্টিত করা হইয়াছে। মুসলমান দিগের আগমনে বৌদ্ধ ধর্ম এদেশ হইতে একপ্রকার নিস্কূল হইয়া যায়। তাহার পর ও পাঁচ ছয় শত বৎসর পর্য্যন্ত কোন প্রকারে এই বৃক্ষ জীবিত ছিল। কিন্তু যে ধর্মের চিহ্ন হইয়া ইহা প্রবর্তিত হইতে ছিল, সে ধর্ম যখন গেল সে চিহ্নও তখন লোপ পাইল।

বোধি বৃক্ষ বা বোধিভূমি রাজাদিগের বিশেষ কৃপার পাত্র ছিল। অশোকের জীবন ইহার জীবনের সঙ্গে একপ্রকার গ্রথিত ছিল বলিতে হইবে। অশোকের প্রথমা পত্নীর বিয়োগ হইলে তিনি দ্বিতীয়া পত্নী গ্রহণ করেন। তাঁহার নাম তিষ্যরক্ষিতা ছিল। এই মহিষী দেখিতে অতিশয় সুন্দরী ছিলেন। কিন্তু তাঁহার স্বভাবে দোষ ছিল। অশোকের কুনাল নামে একটি সন্তান ছিল—তিষ্যরক্ষিতা তাঁহাকে মন্দদৃষ্টিতে দেখিয়া তাঁহার সর্বনাশ করিয়াছিল। সে যখন কুনালকে আপন ছুরভিসন্ধি প্রকাশ করিয়া বলিল, তখন কুনাল তাহা শুনিয়া কর্ণে হস্ত দিয়া জননীকে নিরস্ত হইতে অনুরোধ করেন। সেই অপমান জননী ভুলিতে পারিল না। কুনাল যখন তক্ষশিলা দেশ শাসন করিবার জন্য প্রেরিত হন, তখন তিষ্যরক্ষিতা অশোকের নাম জাল করিয়া

তক্ষশিলার লোকদিগকে এই আদেশ প্রেরণ করেন যে সেই পত্র পাইবা মাত্র যেন তাহারা কুনালের চক্ষুদ্বয় উৎপাটন করিয়া ফেলে । কি আশ্চর্য্য অসাধারণ পিতৃভক্তি ও বৈরাগ্য সহকারে কুনাল পিতৃ আজ্ঞা পালন করিয়াছিলেন এবং তৎপরে কি উপায়ে তিনি পাটলিপুত্রে প্রত্যাবর্তন করিয়া পিতার নিকটে উপস্থিত হন, তাহা আমার “অশোক চরিত নাটকে” বিস্তৃত রূপে বর্ণিত আছে । তিস্যরক্ষিতার এই দোষে প্রাণদণ্ড হয় । তাহার হৃদয় সঁদা দুঃখভিসন্ধিতে পূর্ণ থাকিত । একদা সে দেখিল যে অশোক বোধিবৃক্ষকে অগাধ ভক্তির সহিত পূজা করিতেছেন এবং এই বৃক্ষের জন্ত তিনি অগণ্য অর্থও ব্যয় করিতেছেন । তিস্যরক্ষিতার মনে হইল “তবে বুঝি আমার স্বামী এই বৃক্ষকে আমা অপেক্ষা অধিক ভাল বাসেন । এমন সপত্নীকে থাকিতে দেওয়া উচিত নহে ।” এই বলিয়া সে একজন স্ত্রীলোককে ডাকিয়া জিজ্ঞাসা করিল—“তুই গয়াতে গিয়া এই গাছটাকে মারিতে পারিস্ ?” সে বলিল “পারি ।” গল্পে লিখিত আছে যে সেই স্ত্রীলোকটা সেখানে যাইয়া গাছের কাছে মন্ত্র পড়িতে লাগিল এবং তাহার পর একটা সূত্র দিয়া তাহাকে বেটন করিয়া ফেলিল । তাহার পরেই বোধিবৃক্ষ শুষ্ক হইতে লাগিল । যখন অশোকের কর্ণে এই সমাচার প্রবেশ করিল তখন তিনি একেবারে মুচ্ছিত হইলেন । গয়াতে আসিয়া দেখিলেন যে বৃক্ষ মৃতপ্রায় হইয়াছে । তখন তিনি রোদন করিয়া বলিতে লাগিলেন—‘এই বৃক্ষ দেখিলেই যে আমি স্বয়ম্ভুবৃক্ষকে দেখিতে পাই । ইহা মৃত হইলে আমারও প্রাণ চলিয়া যাইবে ।’ তিস্যরক্ষিতা দেখিল যে তাহার স্বামীর প্রাণ লইয়া টানাটানি । বিপদ দেখিয়া সেই স্ত্রীলোককে ডাকিয়া পুনর্ব্বার বলিল—“তুই ইহাকে আবার সচেতন করিতে পারিস্ ?” সে বলিল “পারি ।” এই বলিয়া সে সেইস্থানে গিয়া সূত্রটি খুলিয়া লইল এবং বৃক্ষের চারিদিক খনন করিয়া সহস্র পাত্রপূর্ণ দুগ্ধ দিয়া তাহাতে সেচন করিল । ক্রমে বৃক্ষ পুনর্জীবিত

হইতে লাগিল। এই সংবাদ পাইয়া অশোক আনন্দ সাগরে যগ্ন হইয়া তৎক্ষণাৎ বোধি বৃক্ষকে বথোচিত পূজা করিবার মানস প্রকাশ করিলেন। স্বর্ণ রৌপ্য এবং স্ফটিক নির্মিত সহস্র পাত্র জল সেই বৃক্ষের মূলে বর্ষিত হইল। এতদ্ব্যতীত নানাপ্রকার খাদ্য দ্রব্যও বিতরিত হইল, সুগন্ধপূর্ণ জলে সেই স্থান সিক্ত, ও পুষ্পের মালা দিয়া সমস্ত বৃক্ষ বিভূষিত হইল। বোধিদ্রুম এইরূপে অসংখ্য নৃপতি এবং ধনাঢ্য ব্যক্তি দ্বারা সেবিত হইয়া আসিয়াছে। এখন সে বৃক্ষটি আর নাই। তবে তাহার একটি শাখা তাহার পার্শ্বেই রোপিত হইয়াছিল। তাহা এখন বর্দ্ধিত হইয়া একটি বৃহৎ বৃক্ষে পরিণত হইয়াছে।

স্তূপ এবং বিহার নির্মাণ ।

গোরকপুরের নিকট কুশিনগর নামে এক নগর ছিল সেই স্থানে শাক্য বুদ্ধের মৃত্যু হয় । কুশিনগর তখন মল্লজাতিদিগের রাজধানী ছিল। যখন শাক্যের শেষ মুহূর্ত্ত উপস্থিত হয় তখন তাঁহার নিকটে তাঁহার প্রিয় শিষ্য আনন্দ এবং অন্ত কতিপয় বন্ধু উপস্থিত ছিলেন । মৃত্যু হইলে পর আনন্দ মল্লদিগের কর্তৃপক্ষীয়দিগকে সংবাদ দেন । তাঁহারা মদলে আসিয়া একটি শরশয্যা নির্মাণ করিয়া তাহার উপর ভগবতের মৃতদেহ স্থাপন করিলেন এবং উহা স্কন্ধে লইয়া নানাবিধ বাদ্য ও সঙ্গীত করিতে করিতে কুশিনগরের যেস্থলে মল্লদিগের রাজসভা এবং উৎসব হইত তথায় আসিয়া উপস্থিত হইলেন । অশ্রোক্তি ক্রিয়া সম্পন্ন হইতে না হইতে বুদ্ধের মৃত্যু সংবাদ নানা দেশে প্রচার হইয়া গিয়াছিল । প্রথমে রাজগৃহের রাজা অজাতশত্রু, তাহার পর ক্রমান্বয়ে বৈশালীর রাজপুরুষেরা, কপিলাবস্তুর শাক্যেরা, রামগ্রাম এবং পাব নগরের নৃপতিদ্বয় এবং বিশ্বদীপের রাজ পুরুষেরা সেইস্থানে আসিয়া মৃত দেহের অবশেষগুলি পাইবার জন্য ইচ্ছা প্রকাশ করিলেন । মল্ল রাজ পুরুষেরা তাহা শুনিয়া বলিয়া উঠিলেন—“কেন? আমরা শবের অবশেষ তোমা-দিগকে দিব কেন? আমাদিগের রাজ্যে ভগবত নির্বাণ প্রাপ্ত হইয়াছেন, অতএব অস্থি এবং ভস্ম সমূহ আমাদিগেরই প্রাপ্য ।” অন্যান্য রাজ পুরুষেরা ইহা শুনিয়া বলিয়া উঠিলেন—“আমরা ক্ষত্রিয়। আমাদিগের সঙ্গে ভগবতের বিশেষ সম্বন্ধ ছিল। অবশেষ গুলি আমাদিগেরই প্রাপ্য । যদি আমরা তাহা না পাই তাহা হইলে আমরা যুদ্ধ করিব ।” এইরূপ ঘোর বিবাদ হইতে হইতে যুদ্ধ হইবার বিলক্ষণ উপক্রম হইল । অবশেষে একজন ব্রাহ্মণ সম্মুখে আসিয়া

সকলকে ধৈর্য্য অবলম্বন করিতে অনুরোধ করিলেন । তিনি বলিলেন, “যিনি শাস্তি প্রচার করিয়া গিয়াছেন তাঁহার অবশেষ লইয়া অশাস্তি আনয়ন করা উচিত নহে । আমার বিবেচনায় আপনারা সকলেই ভস্ম এবং অস্থিগুলি ভাগ করিয়া লউন ।” সকলে এই কথায় সম্মত হইলে তাঁহারা সেই ব্রাহ্মণের উপর ভাগ করিবার ভার অর্পণ করিলেন । ব্রাহ্মণ সমুদয় অবশেষগুলিকে সাত ভাগে বিভক্ত করিলেন । ‘তাঁহার মধ্যে চারিটি সম্মুখস্থ দন্ত এবং দুইটি স্কন্ধের অস্থি ছিল । ভাগ হইয়া যাইবার পর কতকগুলি মৌর্য্য বংশের রাজ পুরুষেরা আসিয়া উপস্থিত হইলে, গল্পেরা বলিলেন—“দেখুন, সকলই ভাগ হইয়া গিয়াছে । আপনারা এই ভস্মগুলি লইয়া যান ।”

রাজ পুরুষেরা আপন আপন ভাগ লইয়া আপনাদিগের রাজধানীর মধ্যে একটি একটি চৈত্য নির্মাণ করাইয়া তন্মধ্যে রাখিয়া দিলেন । আটটি স্থানে চৈত্য নির্মিত হইয়াছিল । তাহাদিগের নাম এই—রাজগৃহ, কুশিনগর, বৈশালী, কপিলাবস্তু, মল্লকপোত, রামগ্রাম, পাব, এবং বিশ্বদ্বীপক ।

অনেক বৎসর পরে মহা কাশ্যপ মনে করিলেন যে ভগবতের দেহাবশেষ আটটি স্থানে গচ্ছিত আছে এবং এই আট দেশেরই রাজ পুরুষেরা পরস্পরের সহিত যুদ্ধ এবং বিবাদ করিয়া উৎসন্ন যাইতে পারেন । তাহা হইলে তাঁহাদিগের রাজ্য, রাজধানী এবং এই সকল স্তূপই বা কোথায় থাকিবে । এই ভাবিয়া তিনি মহারাজ অজাতশত্রুর নিকটে গিয়া নিবেদন করিলেন যে এই সকল দেহাবশেষ একস্থানে থাকা উচিত । তৎপরে তিনি মহারাজের সম্মতি লইয়া উক্ত রাজ পুরুষদিগের নিকট উপস্থিত হইয়া নিজ অভিপ্রায় ব্যক্ত করিলেন । তাঁহারা দেহাবশেষের যৎকিঞ্চিৎ রাখিয়া অবশিষ্ট অংশ সকল কাশ্যপকে প্রদান করিলেন । কেবল রামগ্রামের স্তূপ যেমন তেমনি রহিল । অনেক বৎসর পরে এখানকার অস্থিগুলি সিংহল দেশে প্রেরিত হয় ।

মহা কাশ্যপ দেহাবশেষগুলি লইয়া রাজগৃহ হইতে দক্ষিণ পূর্বদিকে গমন করিয়া একটি স্থানে উপস্থিত হইলেন । সেখানে অজাতশত্রুর আজ্ঞায় ৮০ হাত গভীর একটি কূপ খনন করান হইল । সেই গহবর মধ্যে একটি মন্দিরও নির্মিত হইয়াছিল । অবশেষে ছয়টি স্বর্ণ নির্মিত কোষের মধ্যে দেহাবশেষ গুলি সঞ্চিত করিয়া সেইখানে রাখাইয়া দিলেন । প্রত্যেক কোষ এক একটি রৌপ্য নির্মিত কোষের মধ্যে নিহিত, এবং এই রৌপ্য নির্মিত কোষ 'জ্বাবার এক একটি বহুমূল্য প্রস্তর নির্মিত কোষের মধ্যে রক্ষিত । এইরূপে আটটি কোষ একটির ভিতর আর একটি ছিল । বহু সংখ্যক বুদ্ধের প্রতিমূর্তি এবং বুদ্ধের শিষ্যদিগের এবং তাঁহার পিতা ও মাতার প্রতিমূর্তি সকলও ক্রমান্বয়ে সেইস্থানে স্থাপিত হইল । সেই মন্দিরে পাঁচ শত দীপ সর্বদাই জ্বলিত । কাশ্যপ একটি স্বর্ণ পত্রের উপর এই কয়েকটি কথা লিখিয়া তথায় রাখিয়া দিলেন—“ভবিষ্যতে প্রিয়দর্শী নামে একজন রাজা এই সকল দেহাবশেষ জম্বুদ্বীপে বিতরণ করিবেন ।” তাহার পর দ্বারগুলি দৃঢ়ভাবে বন্ধ করিয়া মন্দিরের চারিদিকে ছয়টি প্রস্তর এবং ইষ্টকের প্রাচীর নির্মিত করিয়া দেওয়া হইল । অনন্তর কাশ্যপ অজাতশত্রুর আজ্ঞায় এই সমস্ত ভূগর্ভে নিহিত করিয়া তাহার উপর একটি ক্ষুদ্র স্তূপ নির্মাণ করাইয়া দিলেন । বাহিরের কোন লোক হঠাৎ দেখিয়া বুঝিতে পারিত না যে ইহার ভিতরে এত কাণ্ড আছে ।

বৎসরের পর বৎসর চলিয়া গেল, একজন রাজার পর আর এক জন রাজা আসিলেন, এবং এক রাজবংশ লুপ্ত হওয়ার আর এক রাজবংশ আসিল । অবশেষে অশোক জম্বুদ্বীপের রাজাধিরাজ হইলেন । বৌদ্ধদিগকে লক্ষ লক্ষ টাকা দিয়াও তিনি তৃপ্ত হইলেন না । তিনি বলিলেন—“জম্বুদ্বীপের প্রত্যেক নগরে একটি করিয়া স্তূপ নির্মাণ করাইয়া তাহার ভিতর ভগবতের দেহাবশেষ রক্ষিত করিব । কিন্তু দেহাবশেষ পাই কোথা ?” এই

তাবিয়া তিনি সকলকে দেহাবশেষ অনুসন্ধান করিতে আজ্ঞা দিলেন। বৈশালী, কপিলাবস্তু প্রভৃতি স্থানে যে সমস্ত স্তূপ নির্মিত ছিল তাহা সকলই তিনি ভূমিসাৎ করিলেন। কিন্তু কোথাও দেহাবশেষ পাওয়া গেল না। সেই সকল স্তূপ পুনঃ নির্মিত করাইয়া তিনি রাজগৃহে আসিলেন। তথায় যত ভিক্ষু ছিল সকলকে ডাকাইয়া জিজ্ঞাসা করিলেন। কেহই কিছু বলিতে পারিল না। অবশেষে একজন বৃদ্ধ ভিক্ষু অগ্রসর হইয়া বলিলেন—“আমার বয়স এখন এক শত বৎসরের অধিক। আমার যখন সপ্তদশ বর্ষ বয়ঃক্রম ছিল, তখন একদিন আমার গুরু ফুল এবং স্নগন্ধ লতা সংগ্রহ করিবার জন্য আমাকে একস্থানে লইয়া গেলেন। তথায় একটা ক্ষুদ্র স্তূপ দেখাইয়া তিনি আমাকে বলিলেন, এইখানে প্রণাম কর এবং এস্থান কখন ভুলিও না। সেই স্তূপটি কি, এবং তাহা কাহার জন্য নির্মিত হইয়াছে সে বিষয়ে তিনি আমাকে কিছুই জ্ঞাত করাইলেন না।” অশোক এই কথা শুনিয়া বলিলেন—“এই স্থানই আমি অনুসন্ধান করিতেছি।” সকলে সেই স্থানাভিমুখে গমন করিলেন। ভূমি খনন করিতে করিতে মন্দিরের দ্বার উদঘাটিত হইয়া গেল। সকলেই দেখিলেন তাহার তিতর তখনও দীপ জ্বলিতেছে, ফুলগুলি প্রস্ফুটিত রহিয়াছে এবং চারি দিকে স্নগন্ধ বহিতেছে। অশোক একটা স্বর্ণ পাত্র উঠাইয়া দেখিলেন তাহাতে এই কয়েকটা কথা লিখিত আছে—“ভবিষ্যতে প্রিয়দর্শী নামে একজন রাজা এই সকল দেহাবশেষ জম্বুদ্বীপে বিতরণ করিবেন।” তখন তিনি উৎফুল্ল হৃদয়ে দেহাবশেষ গুলি লইয়া মন্দিরটি যে ভাবে ছিল ঠিক সেইভাবেই রাখিয়া সেখান হইতে প্রস্থান করিলেন।

জম্বুদ্বীপের প্রত্যেক নগরেই স্তূপনির্মাণ আরম্ভ হইল। সেই সকল স্তূপ নির্মাণ করিতে পাঁচ বৎসর লাগিল। অবশেষে তাহাদিগের প্রতিষ্ঠার দিন আগত হইল। অশোক সকল স্থানেই

এই আদেশ পাঠাইলেন যে সেই দিবসে শাক্য পুত্রেরা সর্ব প্রকার নিত্য ও নৈমিত্তিক ক্রিয়া করিবেন। অশ্ব রথ ও হস্তী কাতারে কাতারে গমন করিবে এবং তন্মধ্যে এক বৃহৎ হস্তীর পৃষ্ঠে দেহাবশেষ আরোপিত হইবে। এতদ্ব্যতীত পুষ্পমালা এবং দীপমালাদ্বারা নগর সকল স্তূশোভিত হইবে এবং লক্ষ লক্ষ মুদ্রা ত্রাক্ষণ শ্রমণদিগের মধ্যে বিতরিত হইবে। সেই দিন জম্বুদ্বীপের পক্ষে এক বৃহৎ দিন হইয়া গিয়াছে। অশোক এই আদেশ পর্বত পৃষ্ঠে খোদিত করিয়া গিয়াছেন। এখনও তাহা পাঠ করিয়া আমরা স্তম্ভিত এবং পুলকিত হই।

তীর্থ দর্শন ।

অশোক বৌদ্ধ হইলেন এবং বৌদ্ধ হইয়াই শাক্য, গৌতম যে যে স্থানে কীর্ত্তি রাখিয়া গিয়াছিলেন সেই সেই স্থান দর্শন করিতে বহির্গত হইলেন । লম্বিনীর উদ্যান, যেখানে বুদ্ধের জন্ম হয় ; কপিলাবস্তু তাঁহার পিতার রাজধানী, যেখানে তিনি লালিত পালিত হইয়াছিলেন এবং বয়ঃপ্রাপ্ত হইলে বিবাহ শৃঙ্খলে বদ্ধ হইয়া সংসার কার্য্য করিতেন ; অনোমা নদীর কূল, যেখানে তিনি নিজ অনুচরের হস্তে সমস্ত অলঙ্কার এবং রাজবেশ অর্পণ করিয়াছিলেন এবং অবশেষে তুরবারি দ্বারা কেশ মুণ্ডন করিয়া বৈরাগ্য অবলম্বন করেন ; রাজগৃহ, যেখানে বুদ্ধের সমবয়স্ক রাজা বিম্বিসার রাজত্ব করিতেছিলেন এবং যেখানকার পর্বত গুহার মধ্যে নানা মুনি ঋষিরা তপস্যা করিতেন এবং যে ঋষিদিগের আশ্রয় তিনি গ্রহণ করিয়াছিলেন ; বুদ্ধ গয়ার সন্নিকটস্থ উক্কেবেলের জঙ্গল, যেখানে তিনি ঋষিদিগের সাধনপ্রণালীর প্রতি অসম্ভুত হন ও পাঁচজন শিষ্য দ্বারা বেষ্টিত হইয়া ছয় বৎসর কাল ঘোর তপস্যা এবং সাধন করেন ; নৈরঞ্জন নদীর কূল, যেখানে তিনি তপস্যা বৃথা এবং অনর্থক বিবেচনা করিয়া পুনর্ব্বার তাঁহার শীর্ণ শরীরকে আহ্নার দ্বারা পুনর্জীবিত করিয়াছিলেন এবং যেখানে প্রতিদিন প্রাতে জনৈক গ্রামবাসীর স্নজাতা নান্নী কন্যা তাঁহাকে পর-মাম্ন ভোজন করাইতেন ; বুদ্ধ গয়া, যেখানে একটি অশ্বখের তলায় তিনি সিদ্ধি লাভ করেন ; কাশীর মৃগদাব কানন, যেখানে সিদ্ধি লাভ করিয়া তিনি ধর্ম্ম প্রচার আরম্ভ করেন ; অবশেষে কুশিনগর, যেখানে ৮০ বৎসর বয়ঃক্রমে তিনি মানবলীলা সম্বরণ করেন । এই সকল স্থান দর্শন করিয়া তিনি প্রত্যেক স্থানে একটি একটি স্তূপ কিম্বা

বিহার নির্মাণ করাইয়াছিলেন । কথিত আছে যে তাঁহার আধিপত্য
কালে সর্ব্বশুদ্ধ ৮৪,০০০ স্তূপ নির্মিত হইয়াছিল এবং প্রত্যেক
স্তূপের মধ্যে দেহাবশেষের কিছু কিছু রক্ষিত হইয়াছিল । কেবল
তাহা নহে । বাহাতে লোকে ধর্ম্মের কথা শুনিতে পায় এই জন্ত
তিনি ৮৪,০০০ আদেশ প্রচার করেন ।

বিবিধ আদেশ প্রচার ।

এই সকল আদেশের বিষয় মনে করিলে বিস্ময়াপন্ন হইতে হয় । অশোক ধর্ম্মার্থে লক্ষ লক্ষ টাকা ব্যয় করিয়াও পরিতৃপ্ত হইলেন না । কেবল সেই সময়কার লোকেরাই মুক্তি পাইবে ইহাতে তাঁহার কামনা পূর্ণ হইল না । ভবিষ্যতের লোকেরা যাহাতে তাঁহার কথা পাঠ করিয়া ধর্ম্মের পথে থাকিতে পারে তৎবিষয়েও তাঁহার যত্ন হইল । এই জন্য তিনি প্রধান প্রধান স্থানে প্রকাণ্ড প্রকাণ্ড প্রস্তরস্তম্ভ নির্মাণ করাইলেন এবং তদুপরি এক একটি আদেশ ক্ষোদিত হইল । কিন্তু প্রস্তর ও কালক্রমে বিনষ্ট হইতে পারে । এই জন্য অচল চিরস্থায়ী পর্ব্বতের পৃষ্ঠেও কতকগুলি আদেশ ক্ষোদিত হইল । ইহার মধ্যে অনেকগুলি আদেশ লোপ পাইয়াছে । কিন্তু অনেকগুলি এখনও বর্ত্তমান আছে । তাহাদিগের অনুবাদ হইয়াছে এবং সেই সকল অনুবাদ হইতেই আমরা অশোকের বিষয় অনেক কথা অবগত হইতে পারিয়াছি ।

স্তম্ভ সকলের স্থান বিবেচনা করিলে দেখিতে পাওয়া যায় যে রাজ্যের যে অংশ দিয়া অনেক লোকের যাতায়াত ছিল সেই সেইস্থানে অশোক তাঁহার কীর্ত্তি স্তম্ভ সকল স্থাপন করিয়াছিলেন । পাটলিপুত্র তাঁহার রাজধানী ছিল । ইহার নাম গন্ধকুও এখন আর নাই । তবে মেগাশথেনেস এবং চীন দেশের দুই জন পর্য্যটক যাহা লিখিয়া গিয়াছেন তাহা পাঠ করিলে বুঝা যায় যে পাটলিপুত্র এখন কার পাটনা সহর যেখানে সেইখানে অবস্থিত ছিল । ঠিক সেইখানে নহে । আসল পাটলিপুত্র এখন গঙ্গার বক্ষে নিমগ্ন । যদি গঙ্গার গতি পরিবর্ত্তিত হইয়া যায় তাহা হইলে বোধ হয় অশোকের নগরের অনেক চিহ্ন পাওয়া যাইতে পারে । অশোকের সময় গঙ্গার গতি আর একদিক দিয়া ছিল । ইতিহাসে এরূপ উল্লেখ আছে যে পাটলিপুত্র নগর

জলপ্লাবনে নষ্ট হয়। বোধ হয় তাহাই ঠিক। এই নগরের চতুর্দিকে বিহার সকল নির্মিত ছিল। তাহাদিগের যৎকিঞ্চিৎ চিহ্ন এখনও পাওয়া যায়। মুসলমানেরা যখন এদেশ জয় করে, তখন বেহার প্রদেশের রাজধানী বেহার ছিল। তখন পাটলিপুত্র নগর বর্তমান ছিল না। মুসলমানেরা পাটনা সহর নির্মাণ করে। গঙ্গা নদী ক্রমে ক্রমে গতি ফিরাইয়া পাটলিপুত্র নগরকে গ্রাস করিয়া ছিল। সেই জন্য ইহার চিহ্ন পর্য্যন্ত ও পাওয়া যায় না।

পাটলিপুত্রে মধ্যস্থান করিয়া করিলে দেখিতে পাওয়া যায় যে সেই স্থান হইতে ভারতে চারিটি প্রধান রাস্তা ছিল। তাহার মধ্যে একটি দিয়া নেপাল পর্য্যন্ত যাওয়া যাইত। আর একটি গয়া হইয়া ছোটনাগপুরের পর্বত শ্রেণী ভেদ করিয়া উড়িষ্যা পর্য্যন্ত গিয়াছিল। অশোক যোর যুদ্ধ করিয়া উড়িষ্যা দেশকে নিজরাজ্যের অন্তর্গত করিয়াছিলেন। আর একটি পথ প্রয়াগ এবং উজ্জয়িনী দিয়া সুরাষ্ট্র দেশে শেষ হইয়াছিল। চতুর্থটি দিয়া পঞ্জাব, পাক্কার প্রভৃতি স্থানে যাওয়া যাইত। যাহাতে অনেক লোকেই আদেশগুলি পড়িতে পারে ইহাই তাঁহার উদ্দেশ্য ছিল। সেই জন্ত স্তম্ভ গুলি এই চারিটি রাস্তার ধারে ধারে স্থাপিত হয়। স্তম্ভ গুলি বিশেষ বিদ্যা এবং কোশলের পরিচয় দেয়। তাহাতে শিম্পনৈপুণ্যের যথেষ্ট প্রমাণ পাওয়া যায়। যে সকল প্রতিমূর্তি উহাতে ক্ষোদিত আছে তাহা দেখিলে বোধ হয় যে তৎকালে ভারতে ক্ষোদনশিল্প উৎকর্ষের পরাকাষ্ঠা লাভ করিয়াছিল। পাঠকেরা যখন পশ্চিম প্রদেশে ভ্রমণ করিতে যাইবেন তখন যেন তাঁহারা অশোকের একটি স্তম্ভও ভাল করিয়া দেখেন। তাহা হইলেই তাঁহারা বুঝিতে পারিবেন যে অশোকের সময় ভারতের পক্ষে একটি বিশেষ পুনর্জীবনের সময় হইয়াছিল কিনা। সেই সময়ে এদেশে বিদ্যার যৎপরোনাস্তি অনুশীলন হয়। নূতন ভাবে অট্টালিকা গঠন, নূতন প্রকারে প্রস্তরের প্রতিমূর্তি নির্মাণ ইত্যাদি বিষয়ের আরম্ভ সেই

সময়েই হয় । গ্রীস দেশের সহিত বহুবিধ ভাবের বিনিময় হওয়ায় এখানে সভ্যতা এবং বিদ্যার আলোক আরও সতেজ হইয়া উঠে ।

অশোকের ধর্ম্মাদেশ তিন শ্রেণীতে বিভক্ত । প্রথমতঃ, কতকগুলি পর্বতের পৃষ্ঠে ক্ষোদিত । দ্বিতীয়তঃ, কতকগুলি স্তম্ভোপরি লিখিত । তৃতীয়তঃ, অতি অল্প আদেশ পর্বত গুহা মধ্যে লিপিবদ্ধ । তন্মধ্যে ১৪টি আদেশ, পাঁচটি পর্বতপৃষ্ঠে পাঁচ প্রকার বিভিন্ন ভাষায় লিখিত আছে । দুইটি রাজ্যের উত্তর পশ্চিম প্রান্তে, দুইটি পূর্ব প্রান্তে এবং আর একটি একেবারে পশ্চিম প্রান্তে, এই পাঁচ প্রান্তের পাঁচ ভাষা । ভারতের ঐ পাঁচ বিভাগে পাঁচ প্রকার প্রাকৃত ভাষা প্রচলিত ছিল এবং ঐ পাঁচ প্রকার প্রাকৃতেই এই আদেশ গুলি লিখিত । ইহাদের মধ্যে কতকগুলি এখানে অনুবাদিত হইল, যথা।—

প্রথম আদেশ ।

দেবতাদিগের প্রিয় প্রিয়দর্শী এই আদেশ প্রচার করিতেছেন । এই স্থানে পূজার্থে কিস্বা আমোদ প্রমোদের উদ্দেশ্যে কোন প্রকার জীব হত্যা হইবেনা । এই সকল উপলক্ষ করিয়া অনেক প্রকার নিষ্ঠুর ব্যবহার হইয়া থাকে । দেবতাদিগের প্রিয় প্রিয়দর্শী তাঁহার প্রজাদিগের পিতৃস্বরূপ । দেবতাদিগের প্রিয় প্রিয়দর্শী রাজার উপাসক গুলীতে পূজা একইপ্রকার হওয়া উচিত । পূর্ব দেবনাম্ প্রিয় প্রিয়দর্শীর মন্দির এবং রন্ধনশালাতে আহারের উদ্দেশ্যে প্রত্যহ শত সহস্র জীবের বলিদান হইত । এখনও আহারের জন্য একটা কিস্বা দুইটা জীবের হত্যা হয় । কিন্তু আজ ঐ আনন্দের ধ্বনি পুনঃ পুনঃ প্রতিধ্বনিত হইতেছে যে আজ হইতে একটা জীবেরও প্রাণবধ হইবে না ।

দ্বিতীয় আদেশ ।

দেবতাদিগের প্রিয় প্রিয়দর্শীর বিজিত বিভাগের প্রত্যেক স্থানে এবং চোডা, পাণ্ডিয়, সত্যপুত্র, কেতলপুত্র, তম্বপাণি পর্য্যন্ত যে যে স্থানে বিশ্বাসীরা বাস করেন এবং গ্রীক রাজ আর্টিওকাসের

রাজ্যে যেখানে তাঁহার সেনাপতিরা শাসন করেন, সর্বত্রই দেবতাদিগের প্রিয় প্রিয়দর্শী রাজার চিকিৎসার দ্বিবিধ পদ্ধতি স্থাপিত হইয়াছে—মনুষ্যের জন্ম চিকিৎসা এবং পশুদিগের জন্ম চিকিৎসা। এতদ্ব্যতীত মনুষ্যদিগের উপযোগী এবং পশুদিগের উপযোগী সর্বপ্রকারের ঔষধ ও বিতরিত হয়। এবং যে যে স্থানে ঔষধের আয়োজন নাই, সেই সেই স্থানে এখন হইতে ঔষধ সকল থাকিবে এবং বৃক্ষ সকল রোপিত হইবে। লতা এবং মূল সকল স্থানে সংরক্ষিত কিম্বা রোপিত হইবে। রাজ্যের প্রধান প্রধান বয়ো মনুষ্য ও পশুদিগের জন্ম কুপ সকল খনন করান হইবে এবং বৃক্ষ সকল রোপিত হইবে।

তৃতীয় আদেশ।

দেবতাদিগের প্রিয় প্রিয়দর্শী বলিতেছেন,—আমার রাজ্য-ভিষেকের দ্বাদশ বৎসর পরে এই আদেশ লিখিতেছি। বিজিত প্রদেশের সর্বস্থানে যেখানে বিশ্বাসীরা বাস করে, তাহারা আমার প্রজাই হউক বা বিদেশীই হউক, সকলকার মধ্যে পঞ্চম বর্ষ গত হইলেই একটি করিয়া সাধারণ প্রায়শ্চিত্ত (অনুশরণ) সম্পাদিত হইবে। ধর্মের সংস্থাপন এবং জঘন্য ক্রিয়ার দমন ইহার উদ্দেশ্য। আচার্য্য ভিক্ষু সঙ্ঘের সম্মুখে নিম্নলিখিত বিষয়গুলি টীকা এবং দৃষ্টান্ত সহ বুঝাইয়া দিবেন। যথা, পিতা মাতার অনুগত হওয়া কর্তব্য; বন্ধু এবং কুটুম্ব, ব্রাহ্মণ এবং শ্রমণদিগকে দান করা সাধু কার্য্য; জীব হিংসা, অপব্যয় এবং ঈর্ষাপূর্ণ গ্লানি এ সকল অতিশয় গহিত কর্ম্ম।

চতুর্থ আদেশ।

পূর্বকালে শত শত বৎসর ধরিয়া নরবলি, পশুবলি, পিতামাতার প্রতি অসম্মান এবং ব্রাহ্মণ ও শ্রমণের প্রতি ভক্তির অভাব সর্বদাই দৃষ্ট হইত। অদ্য দেবতাদিগের প্রিয় প্রিয়দর্শীর আদেশে ভেরি রব আকাশে উথিত হইল। অগণ্য রথ এবং হস্তী পথের

উপর দিয়া কাতারে কাতারে গমন করিতেছে। আকাশে হাওয়াই প্রভৃতি অগ্নি বাজি প্রদর্শিত হইতেছে এবং লোকেরা নানাবিধ দৈব বিষয়ক অভিনয় করিতেছে। প্রিয়দর্শীর দূতেরা প্রিয়দর্শীর ধর্ম ঘোষণা করিতেছে। যে ধর্ম পালন শত শত বৎসর ধরিয়া কখনই হয় নাই তাহা আজ প্রিয়দর্শীর আদেশে সূচাক-রূপে সম্পন্ন হইতেছে। জীব হিংসার নিবৃত্তি, কুটুম্বদিগের প্রতি সম্মান, পিতামাতার অনুগমন, ব্রাহ্মণ ও শ্রমণদিগের প্রতি ভক্তি এই সকল সদগুণ এবং অন্যান্য প্রকার ধর্ম সাধনা এখানে বর্দ্ধিত হইয়াছে। দেবতাদিগের প্রিয় প্রিয়দর্শী এই সকল ধর্ম কার্য্য আরও বর্দ্ধিত করাইবেন। তাঁহার পুত্র, পৌত্র এবং প্রপৌত্রেরা প্রলয় কাল পর্য্যন্ত এই সকলের উত্তরোত্তর উন্নতি সাধন করাইবেন। ধর্ম সম্বন্ধে পর্ব্বত সদৃশ অটল হইয়া তাহার। নীতির নিয়ম সকল পালন করিবে। যে হেতু নীতি এবং ধর্ম এই দুয়ের যোগ সকল অপেক্ষা উৎকৃষ্ট। যাহার নীতি নাই তাহার পক্ষে ধর্ম পালনও নাই। এই উদ্দেশ্য সিদ্ধ হউক; ইহা যেন নির্জীব না হয়। সেই জন্যই এই আদেশটি দেবতা-দিগের প্রিয় প্রিয়দর্শীর রাজ্যাভিষেকের দ্বাদশবর্ষে লিখিত হইল।

পঞ্চম আদেশ।

দেবতাদিগের প্রিয় প্রিয়দর্শী বলিতেছেন,—বিপদ হইতে সম্পদ আসে এবং প্রত্যেক লোক সম্পদ পাইবার মানসে উপস্থিত বিপদ ঘটায়। সেই জন্যই আমি অনেক সমৃদ্ধি পাইয়াছি এবং আমার পুত্র পৌত্রেরা ও সেইরূপ কার্য্য চিরকাল করিবে। প্রত্যেকে তাহার কর্ম্মের পুরস্কার পায়। যে এইরূপ আচরণ ত্যাগ করিলে সে নরকে পাপীদিগের সহিত দণ্ড ভোগ করে।

অনেক দিন এমন কোন ধর্ম্মমহামাত্রা নিযুক্ত হন নাই যাহারা অবিবাসী পাষণ্ডদিগের সহিত মিশিয়া তাহাদিগকে ধর্ম্ম-

পথে আনয়ন করিতে পারিয়াছেন। আমি এই সকল ধর্ম মহামাত্রাদিগকে নিযুক্ত করিলাম। তাঁহারা যোন, কাম্বোজ, গান্ধার, রাস্তিক, পেতেনিক প্রভৃতি দেশ মধ্যে এবং অসভ্য জাতিদিগের দেশের এক সীমা হইতে সীমান্তর পর্য্যন্ত প্রবেশ করিয়া সকল শ্রেণীর লোকদিগের হিত সাধন করিবেন, বিশ্বাসীদিগকে রিপু সংযম শিখাইবেন এবং পাপের শৃঙ্খলে বদ্ধ যে সকল লোক তাহাদিগকে উদ্ধার করিবেন। পাটলিপুত্র এবং অপরাস্ত প্রভৃতি দেশে যাহাদিগকে লোকেরা ভয় করে এবং যাহাদিগকে লোকে সম্মান করে, এ সকলের সঙ্গে তাঁহারা আলাপ রাখিবেন এবং সকল স্থানেই তাঁহারা প্রবেশ করিবেন। সকলকেই তাঁহারা উচ্চতর বিষয়ে শিক্ষা দিবেন। অবশেষে যাহারা ধর্মের বিঘ্নকারী তাহারাও ধর্ম প্রচারক হইয়া উঠিবে।

ষষ্ঠ আদেশ ।

সকল সময়ে, সকল কার্যের সংবাদ রাজসমীপে উপস্থিত করা পদ্ধতি অনেক দিন হইতে প্রচলিত হইয়া আসিতেছে। এখন আমি এই অনুষ্ঠান দিতেছি যে আমি ভোজনে বসি বা রাজ ভবনে থাকি, অন্তঃপুর মধ্যে থাকি বা কথাবার্তায় নিযুক্ত থাকি, লৌকিকতা করি বা উদ্যানে বিশ্রাম করি, প্রতিবেদকেরা প্রজাবর্ণ কি করিতেছে ইহার সংবাদ আমাকে সর্বদা দিবে। প্রজারা কি মানস করে ইহা আমি সর্বদা শুনিতে চাই। দণ্ডই হউক বা পুরস্কারই হউক যাহা আমি আদেশ করিব তাহা কার্যে পরিণত করিবার ভার প্রতিবেদকদিগের হস্তে দিলাম। প্রতিবাসীরা যেন সকল সময় এবং সকল স্থানে আমাকে সংবাদ দেয়। ইহা আমার আশ্রয়। আমি যে অর্থ বিতরণ করি তাহা পৃথিবীর উপকারার্থ এবং সেই উপকারের জন্য আমি সদা তৎপর। যে প্রজাবর্গকে আমি শাসন করি তাহাদিগকে আমি ইহলোকে সুখ দান করিব এবং পরলোকে তাহারা বাহাতে স্বর্গ পায় তাহা করিব। এই উদ্দেশ্যে আদেশটি

লিখিত হইল। ইহা দীর্ঘকাল স্থায়ী হউক এবং আমার পুত্র, পৌত্র, প্রপৌত্রেরা আমার পর যেন অধিকতর পরিশ্রম সহকারে মানব-জাতির হিতসাধনে তৎপর থাকে।

অষ্টম আদেশ।

পুরাকালে নৃপতিদিগের আমোদ কেবল পাশক্ৰীড়া, যুগয়া প্রভৃতি-তে ছিল। কিন্তু দেবতাদিগের প্রিয় প্রিয়দর্শী তাঁহার রাজ্যাভিষেকের এই দশম বৎসরে, জ্ঞানিগণের আনন্দবর্দ্ধনহেতু একটি নূতন ধর্মোৎসবের স্থাপ্তি করিয়াছেন। সে উৎসবটি কি? ব্রাহ্মণ ও শ্রমণদিগের সহিত সাক্ষাৎ করা, দান করা, বৃদ্ধ এবং শ্রদ্ধেয় লোকদিগের সঙ্গে দেখা করা, প্রচুর স্বর্ণ বিতরণ করা, এই জগৎ এবং জগতবাসীদিগের বিষয় সদা চিন্তা করা, ধর্মের অনুজ্ঞা সকল পালন করা, এবং ধর্মকে সর্বাপেক্ষা উৎকৃষ্ট পদার্থ বলিয়া বিবেচনা করা। এই সকল উপায় দ্বারা তিনি আমোদ প্রমোদ করেন এবং পরলোকেও এই সকল অমিশ্রিত আমোদ দেবতাদিগের প্রিয় প্রিয়দর্শীর থাকিবে।

দ্বাদশ আদেশ।

দেবতাদিগের প্রিয় প্রিয়দর্শী সকলধর্মকে আদর করেন। পরিত্রাজক হউন, বা গৃহস্থ হউন, ভিক্ষা দিয়া বা অন্যান্য উপায়ের দ্বারা তিনি সকলকে সম্মান করেন। কিন্তু দেবানাম প্রিয় যাহাতে প্রকৃত ধর্মের বৃদ্ধি হয় ইহা যেমন ভাল বাসেন, ততটা ভিক্ষা দান কিম্বা অন্য প্রকারে সম্মান প্রদর্শন করাকে ভাল বাসেন না। তিনি যে সকলপ্রকার ধর্মকেই উৎসাহদেয় তাহার মূলে একটি কারণ আছে। সে কারণটি এই যে সকলে আপনাপন ধর্মকে বিশ্বাস করিবে, কিন্তু কখন অন্য ধর্মকে নিন্দা করিবে না। এমন অবস্থা ঘটে যখন অন্যদিগের ধর্মকে আদর করা উচিত। এইরূপে আর্ষ্যধর্মকে আদর করিলে আপনার ধর্মের বৃদ্ধি হইবে এবং আর্ষ্যধর্মেরও উন্নতি হইবে। যে অন্যপ্রকার আচরণ করে সে আপনার ধর্মকে ক্ষীণ করে এবং অন্যের প্রতি অন্যায়

ব্যবহার করে। যে লোক আপনার ধর্মকে আদর করে এবং অন্য ধর্মকে নিন্দা করে, যে বলে যে “আমাদিগের ধর্মই উজ্জ্বল হউক,” সে নিজ ধর্মকে বিশেষরূপে ক্ষতিগ্রস্ত করে। সেই জন্যই বলিতেছি যে সম্ভাব সর্বাপেক্ষা উত্তম পদার্থ। লোকেরা পরস্পর পরস্পরের ধর্মকথা শ্রবণ করুক। যে হেতু দেবানাম-প্রিয়ের এই ইচ্ছা। সকল ধর্মের বিশ্বাসীরা জ্ঞানে এবং ধর্মে উন্নত হউক, এবং সকলে এই বলুক যে দেবানাম প্রিয় ধর্মের সার পদার্থকে যেমন ভাল বাসেন ততটা ভিক্ষা দান কিস্বা সমাদর চিহ্নকে ভাল বাসেন না। ইহাই ধর্মের সার কথা। সেই জন্য ধর্ম প্রচারার্থ তিনি ধর্ম মহামাত্রা সকল নিযুক্ত করিয়াছেন। তাঁহারা সদা প্রজাদিগের নীতির উপর চক্ষু রাখিবেন, স্ত্রীলোকদিগের তত্ত্বাবধান করিবেন এবং যত গোপনীয় স্থান আছে সে সকলই অনুসন্ধান করিবেন। এই সকল মন্ত্রী নিযুক্ত হইলে সকল ধর্মই শীঘ্র উন্নতি লাভ করিতে পারিবে এবং সদ্ধর্ম সর্বতোভাবে উজ্জ্বল রূপ ধারণ করিবে।

ত্রয়োদশ আদেশ।

এই আদেশটির কথা গুলি স্থানে স্থানে লোপ পাইয়াছে। কিন্তু সর্বোৎকৃষ্ট অংশটি যথাস্থানে আছে। তাহার অনুবাদ এই—
“গ্রীক রাজ আণ্টিয়োকাসের রাজ্যে এবং তুরময়, আণ্টিকিনি, মক এবং আলিকন্দর, এই চারিজন রাজার রাজ্যে এবং অন্যান্য স্থানে দেবতাদিগের প্রিয় প্রিয়দর্শীর ধর্মের অনুজ্ঞা সকল, যেখানে প্রচারিত হইতেছে, সেইখানেই লোকদিগকে ধর্ম ভুক্ত করিতেছে। দেশ বিজয় বহু প্রকারের হইতে পারে। কিন্তু যে জয় সুখদায়ক ভাবমূলক আনন্দ আনিয়া দেয়, সেই জয়ই আনন্দে পরিণত হয়। ধর্মের জয় সর্বাপেক্ষা অধিক আনন্দ প্রদ। তাহা সুখের জয়—তাহাকে কেহ পরাভব করিতে পারে না, যে হেতু

তাহার মূলে ধর্ম আছে এবং ধর্ম থাকিলেই স্বপ্ন হইবে । ঐহিক এবং পার্শ্বাত্মিক সকল পদার্থে এই প্রকার জয়ই বাঞ্ছনীয় ।

১৪টি আদেশের মধ্যে ৯টির অনুবাদ এখানে প্রকাশিত হইল । এই কয়েকটি পাঠ করিয়া পাঠকেরা বুঝিবেন অশোক কিরূপ উদারচেতা ও মহাশয় ব্যক্তি ছিলেন । তিনি ভক্ত বৌদ্ধ ছিলেন এবং ধর্মের জন্য অতুল অর্থ, রাজ্য, পরিবার, এমন কি আপনাকে পর্যন্ত পণ করিয়াছিলেন । তাহার ইচ্ছা ছিল, যে কেবল তিনি নহেন, কিন্তু তাহার পরিবার, প্রজাবর্গ, মানব জাতি, তখনকার এবং সমুদয় ভবিষ্যতের লোকেরা পর্যন্ত তাহার ধর্ম গ্রহণ করিয়া ইহকালে প্রীতি এবং পরকালে মুক্তি লাভ করিবে । এই জন্য তিনি মহাধর্ম-মাত্রা এবং প্রতিবেদক বলিয়া মন্ত্রী সকল নিযুক্ত করিয়াছিলেন । প্রজাদিগের নীতি সম্বন্ধে তত্ত্বাবধারণ করাই তাহাদিগের কার্য ছিল । এতদ্ব্যতীত তিনি অতিশয় দূরদেশ পর্যন্ত প্রচারক পাঠাইয়া ছিলেন । দক্ষিণে লঙ্কা এবং মাত্রাজ প্রদেশ, উত্তরে হিমালয়, এবং পশ্চিমে মিসর দেশ পর্যন্ত সর্ববিস্থানেই এই ধর্ম প্রচারিত হইয়াছিল । পাঠকেরা মিসর দেশের কথাটি বিশেষ করিয়া মনে রাখিবেন, যেহেতু এই দেশে, আলেকজান্দ্রিয়া নগরীতে, খ্রীষ্টান এবং বৌদ্ধ ধর্মের প্রথম সাক্ষাৎ হইয়াছিল এবং এখান হইতেই ভারতের দর্শন এবং ধর্মশাস্ত্র ইউরোপ মহাখণ্ডে প্রচারিত হয় । অশোক বলিয়াছেন—“যেখানেই তাহার ধর্মাদেশ প্রচারিত হইয়াছে সেখানেই তাহা লোকদিগকে ধর্মভূক্ত করিয়াছে ।” এটি বড় সহজ কথা নহে । গ্রীস এবং মিসর দেশে বৌদ্ধ ধর্ম লোকদিগকে ধর্মভূক্ত করিয়াছিল । সুতরাং সেখানকার দর্শন শাস্ত্র যে আমাদের দর্শন শাস্ত্রের সঙ্গে মিলিত হইয়াছিল, ইহার জন্য অধিক প্রশংসা অনুসন্ধান করিতে হইবে না । দুর্ভাগ্য বশতঃ তখনকার অধিকাংশ পুস্তক সকল নষ্ট হইয়া গিয়াছে । তথাপি এমন স্তূপি কয়েক লেখক মধ্যে মধ্যে দৃষ্ট হয় যাহারা ভারতের কথা বলিয়া

গিয়াছেন। তাঁহার মধ্যে একজনকার নাম এখানে উল্লিখিত হই-
তেছে। খ্রীঃ অব্দের দ্বিতীয় শতাব্দীতে মিসর দেশের রাজধানী
আলেকজান্দ্রিয়া নগরীতে নিও-প্লেটোনিক দর্শন বলিয়া এক নূতন
শাস্ত্র রচিত হয়। তাহার সংস্থাপকের নাম অ্যামোনিয়াস। তিনি
বলিয়া গিয়াছেন যে তাঁহার দর্শন তত্ত্ব তিনি ভারতবর্ষ হইতে পা-
ইয়াছেন।* এ একটি বৃহৎ কথা। ইহাতে অশোকের কথার যথেষ্ট
প্রমাণ হইতেছে। এতদ্ব্যতীত অশ্বাস্থ লেখকদিগেরও নাম বলিতে
পারা যায়। অনেক লিখিতে হইবে বলিয়া সে বিষয় বিস্তৃত ভাবে
বর্ণনা করা অনাবশ্যক বোধ করিলাম। পাশ্চাত্য বিভাগে বিদ্যার
আদর দুই স্থানে ছিল—এক মিসর দেশে আলেকজান্দ্রিয়া নগরীতে,
এবং আর এক গ্রীস দেশে আথেনস নগরে। ইউরোপের জ্ঞানা-
লোক এই দুই স্থান হইতেই বিকশিত হয়। ধর্ম্মের চর্চা প্যালেস-
টাইন দেশের জেরুসালেম নগরে ছিল। এই স্থান ইহুদিদিগের
পীঠস্থান ছিল এবং সেই খানেই মহর্ষি ঈশার লীলা হয়। সেই
প্যালেসটাইন দেশ সিরিয়ার অন্তর্গত, এবং সেই সিরিয়ার অধিপতি
আর্টেম্যোকাস ছিলেন। এই নৃপতি অশোক রাজার সঙ্গে সন্ধি স্থাপন
করিবার মানসে সিন্ধু নদ পর্য্যন্ত অগ্রসর হইয়াছিলেন। অশোকের
স্তুপে তাঁহার নাম উল্লিখিত আছে। এই কতকগুলি ব্যাপার হইতে
পাঠকেরা যাহা ভাবিবার তাহা ভাবিয়া লইবেন।

আর একটি বিষয় আমরা এই স্তম্ভ সকল হইতে জানিতে
পারিতেছি। অশোক একজন অসাধারণ উদারপ্রকৃতি লোক
ছিলেন। তিনি বৌদ্ধ হইয়াও ব্রাহ্মণদিগকে বধোচিত
সম্মান করিতেন। তিনি বিশ্বাস করিতেন যে সকল ধর্ম্মেতেই সত্য
আছে, এবং যে অশ্ব ধর্ম্মকে নিন্দা করে সে নিজের ধর্ম্মের গৌরব
হানি করে। তাঁহার ভাব এইরূপ ছিল যে সকল ধর্ম্মকে উন্ন-
তির পথে চলিতে দেওয়া উচিত, যে হেতু স্বাভাবিক পথে থাকিলে

সকলকার ভিতরে যে সর্বোৎকৃষ্ট অংশ আছে তাহা আরও প্রস্ফু-
 টিত হইবে। এই চমৎকার মত উনবিংশতি শতাব্দীতে লোকে
 কিয়ৎ পরিমাণে উপলব্ধি করিতে পারিয়াছে। দুই সহস্র বৎসর
 ধরিয়া পৃথিবীতে কেবল ধর্মের জ্ঞাত্ত বিবাদ, পীড়ন, যুদ্ধ এবং
 রক্তপাত হইয়া আসিতেছে। ভারতবর্ষে আকবার কেবল এইরূপ
 উদার মত চালাইতে পারিয়াছিলেন। কিন্তু পৃথিবীতে আর কয় জন
 নৃপতি এরূপ উদারতার পরিচয় দিতে পারিয়াছেন ?

প্রস্তুক ফলকের স্থান।

ইহার অগ্রে বলা হইয়াছে যে ১৪টি আদেশ পাঁচটি ভিন্ন ভিন্ন স্থানে পর্বত পৃষ্ঠে ক্ষোদিত আছে। প্রতি পর্বত পৃষ্ঠেই ঐ ১৪টি আদেশ আছে। সেই পাঁচটি পর্বতের নাম এখন বলা যাইতেছে।

১। সাহাবাজগর্হি। পেশোয়ারের উত্তর পূর্বে ২০ ক্রোশ দূরে উজ্জ্বলাই বিভাগের মধ্যে সুদাম নামক উপত্যকার মধ্যে ইহা দেখিতে পাওয়া যায়। সিন্ধু নদের উপর আটক নামে যে এক স্থান আছে সেখান হইতে ১২৥০ ক্রোশ চলিয়া গেলেও এই স্থানে যাওয়া যায়।

২। খালসি। যমুনা যেখানে পর্বত পরিত্যাগ করিয়া ক্যাদাঁ এবং ডেরা এই দুই উপত্যকার মধ্যবর্তিনী হইয়া চলিতে আরম্ভ করিয়াছেন, সেই খানে সেই নদীর পশ্চিম কূলে এই স্থান।

৩। গির্গার। গুজরাট প্রদেশে কাটিয়াবাদ বিভাগে জুনগর নামে এক স্থান আছে, তাহার নিকটে গির্গার। ইহা সোমনাথ নামে যে প্রসিদ্ধ স্থান আছে সেখান হইতে ২০ ক্রোশ উত্তরে।

৪। ধৌলি। ইহা উড়িষ্যাতে। কটকের ১০ ক্রোশ দক্ষিণে এবং পুরীর ১০ ক্রোশ উত্তরে।

৫। জৌগদ। ইহা গ্যাঞ্জাম বিভাগে দেখিতে পাওয়া যায়।
এতদ্ব্যতীত আর তিনটি পর্বতপৃষ্ঠে অশোকের আদেশ সকল প্রকাশিত হইয়াছে। তাহার মধ্যে একটি সাহাসারাম স্থানে আছে।

এস্থানটি বজ্জার কিম্বা দুমরাও হইতে প্রায় ২৫ ক্রোশ দক্ষিণে । দ্বিতীয়টি বিরাট নামক স্থানে । এটি জয়পুর মহারাজার রাজ্যে দেখিতে পাওয়া যায় । জয়পুর হইতে ২০০ ক্রোশ উত্তরে ভীম-গুফা পর্বত শ্রেণীর মধ্যে ইহা স্থিত । তৃতীয়টি ও বিরাটে । এই প্রস্তর কলকটি পাঠকেরা আজ এসিয়াটিক সোসাইটির গৃহে দেখিতে পাইবেন । এ পর্য্যন্ত প্রায় ১৭টি লেখা গুহা মধ্যে পাওয়া গিয়াছে । তাহাদিগের মধ্যে ৩টি অশোকের আদেশ বরাবর পর্বতের মধ্যে কোদিত আছে ।

অশোকের স্তম্ভ সংখ্যাই অধিক । কিন্তু তাহাদিগের মধ্যে অতি অল্পই বর্তমান আছে । কেবল ছয়টি পাওয়া গিয়াছে । তাহার মধ্যে পাঁচটিতে ছয়টি আদেশ লিখিত আছে । দিল্লীতে দুইটি দেখা যায় । কিন্তু অশোকের সময় দিল্লীর আধিপত্য ছিলনা । সেখানে এই দুই স্তম্ভ স্থাপিত হয় নাই । মুসলমান বাদশা ফিরোজ টোগ্লাক সিবানিক এবং মিরাত হইতে ইহাদিগকে স্থানান্তরিত করিয়া দিল্লীতে রাখিয়া দেন । তৃতীয় স্তম্ভ প্রয়াগের দুর্গ মধ্যে আজও দেখা যায় । চতুর্থ এবং পঞ্চম স্তম্ভ বেটিয়ার নিকটস্থ লোরিয়া গ্রামে প্রতিষ্ঠিত আছে ।

এই আদেশগুলির সম্পূর্ণ অনুবাদ আমরা দিলাম না । কিন্তু প্রিন্সেপ সাহেব সমুদয়ের সার তত্ত্ব প্রকাশ করিয়া গিয়াছেন । বোধ হয় তাহার অনুবাদ দিলে পাঠকেরা আদ্যোপান্ত বুঝিতে পারিবেন । প্রথম আদেশ ধর্ম্মার্থে কিম্বা আহ্বারার্থে জীবহত্যা নিষেধ করিতেছে ।

দ্বিতীয় আদেশ বলিতেছে যে প্রিয়দর্শীর রাজ্যে মনুষ্য এবং পশুদিগের উপযোগী দ্বিবিধ চিকিৎসাপদ্ধতি সংস্থাপিত হইয়াছে । তৃতীয় আদেশে একটি পাঞ্চবার্ষিক অনুশরণ কিম্বা প্রায়শ্চিত্তের নির্দেশ আছে । এই সময়ে প্রচারকেরা উপাসকমণ্ডলীতে বৌদ্ধ ধর্ম্মের প্রধান প্রধান মত শিক্ষা দিতেন । পিতা মাতার প্রতি

সম্মান, কুটুম্ব, প্রতিবেশা ব্রাহ্মণ ব্রহ্মণদিগকে অর্থ দান, জীবে দয়া, পরিষিদ্ধাচার, এবং পরনিন্দা ত্যাগ এই সকল বিষয়ে শিক্ষা দেওয়া হইত ।

চতুর্থ আদেশে পূর্বকার অনিয়ম এবং যথেষ্টাচারিতা এবং দেবা-
নামপ্রিয়ের ধর্ম্মরূলে দেশের পুনরুদ্ধার এই দুই অবস্থার তুলনা
বর্ণিত আছে । নূতন ধর্ম্মের সমাচার প্রজাতিগকে বিশেষ আড়-
ম্বরের সহিত জ্ঞাত করান হইতেছে ।

পঞ্চম আদেশে নূতন ধর্ম্মমন্ত্রী এবং প্রচারক দিগের নিয়োগ
বিজ্ঞাপিত হইতেছে । যে সকল দেশে গিয়া তাঁহার প্রচার করি-
বেন সে সকল দেশের নাম বর্ণিত হইতেছে । এই আদেশে
পাটলিপুত্রের নাম প্রথম উল্লিখিত আছে ।

ষষ্ঠ আদেশে প্রতিবেদক বর্গ নিযুক্ত হইল এই কথা প্রজাবর্গকে
জ্ঞাপিত করা হইতেছে । প্রজারা খাইবার সময়, সংসার করিতে
করিতে, পরিবারের সঙ্গে ব্যবহারে, কথা বার্তাতে, মৃত্যুর সময় কিম্বা
সাধারণতঃ কিরূপ আচরণ করিতেছে এই সকল সংবাদ প্রতিবেদকেরা
মহারাজার নিকট আনিয়া দিবে । অস্তিত্বারিক বলিয়া একশ্রেণী
কর্ম্মচারী (ম্যাজিস্ট্রেট) নিযুক্ত হইল । দুষ্কর্ম্মের জন্য দণ্ড দান করাই
তাহাদিগের কার্য ছিল ।

সপ্তম আদেশে মহারাজা ইচ্ছা প্রকাশ করিতেছেন যে তাঁহার
প্রজারা এককালে ধর্ম্মের মতভেদ ভুলিয়া যায় । সকল প্রকার
ভেদাভেদ সম্বরণ করিতে পারিলে “ভাবশুদ্ধি” অর্থাৎ প্রকৃত জ্ঞান
এবং বিশ্বাস হইতে হৃদয়ের যে শান্তি উৎপন্ন হয় তাহাই হইবে ।

অষ্টম আদেশে অশোক বলিতেছেন যে পূর্বকালে রাজারা
যে সকল আয়োদ প্রণোদ করিতেন তিনি তাহা করিবেন না ।
পূর্বের ২ আয়োদ করিতে হইলে নানাপ্রকার “বিহার যাত্রা” হইত ।
এখন অশোক তাহার পরিবর্তে “ধর্ম্ম যাত্রার” সৃষ্টি করিয়াছেন ।
ধর্ম্মযাত্রার অর্থ সাধুদিগের নিকট গমন, দরিদ্রদিগকে দান, গুরু
ভক্তি প্রদর্শন ইত্যাদি ।

নবম আদেশে প্রকৃত সুখ কি রূপে হয় তাহার বর্ণনা আছে। বিবাহ করিলে, কিস্তি সম্ভান প্রতিপালন করিলে, কিস্তি বিদেশে ভ্রমণ করিলে প্রকৃত সুখ হয় না। কিন্তু “ধর্ম মঙ্গল” দ্বারা, অর্থাৎ অনুচরদিগের প্রতি ককণা দেখাইলে, ধর্মযাজকদিগের প্রতি শ্রদ্ধা করিলে, লোকের সহিত কুশলে বাস করিলে, প্রচুর দান করিলে, ভগবানের প্রকৃত কৃপাপাত্র হওয়া যায়। তাহা হইলেই প্রকৃত সুখ হইল।

দশম আদেশ মানুষের কার্য্য হইতে যে যশ উৎপন্ন হয় তাহার বিষয় বলিতেছে। ক্ষণিক উদ্দেশ্যে যে সকল কার্য্য হয় তাহার যশও ক্ষণিক। কিন্তু অশোকের উদ্দেশ্য সকল উচ্চতর। তিনি পরলোকের জন্য আগ্রহ সহকারে কার্য্য করিয়া থাকেন।

একাদশ আদেশে ধর্মদানের মহিমা কীর্ত্তিত হইতেছে। ধর্মদানই পরম দান। এ দানে সংকর্ম্ম সকল উৎপন্ন হয় এবং তাহাতে লোকের ইহকালে সুখ হয় এবং পরকালের জন্য অনন্ত ধর্ম্ম সঞ্চিত থাকে।

দ্বাদশ আদেশ অবিশ্বাসীদিগের সম্বন্ধে লিখিত হইয়াছে। দুই প্রকার “পাষণ্ড” অর্থাৎ অবিশ্বাসী আছে—“আপ্তপাষণ্ড,” যাহারা নূতন ধর্ম্ম গ্রহণ করিবার উপযুক্ত, এবং “পরপাষণ্ড,” যাহারা ধর্ম্মের কোন কথা শুনে না এবং বিশ্বাস করিতে একেবারে চাহে না। ইহাদিগের হিতার্থে অশোক তিন প্রকার মন্ত্রিশ্রেণী নিযুক্ত করিতেছেন—যথা, “ধর্ম্ম মহামাত্রা,” স্তৈর্য্য মহামাত্রা” এবং “কর্ম্মিকা”। ইহারা অবিশ্বাসীদিগকে ধর্ম্মভুক্ত করিবে এবং নূতন ধর্ম্মের স্থায়িত্ব সাধন করিবে।

ত্রয়োদশ আদেশে গ্রীক রাজাদিগের এবং অন্যান্য দেশের নামের উল্লেখ আছে।

চতুর্দশ আদেশে উক্ত সকল আদেশের চুম্বক এবং সার। এই আদেশ হইতে আমরা জানিতে পারিতেছি যে অশোক তাঁহার

আদেশ গুলি কোন পণ্ডিত দ্বারা রচিত করাইয়া তাহাদিগের একটি একটি নকল কোদকদিগের হাতে সমর্পণ করিয়াছিলেন । কতকগুলি পর্বত পৃষ্ঠে “লিপিকারের” নাম পর্য্যন্ত কোদিত আছে । কিন্তু “লিপিকার” এই কথাটি পরিষ্কার আছে, অথচ ‘লিপিকারের’ নাম কে বেন তুলিয়া লইয়াছে ।

দেব দেবীতে বিশ্বাস ।

এই সকল আদেশ ভিন্ন অন্য কৰ্তকণ্ডলি অনুজ্ঞার কথাও আমরা উল্লেখ করিয়াছি। তাহার মধ্যে কয়েকটির অনুবাদ এখানে দিতেছি; যথা—

সাহাসারাম—“দেবানাম প্রিয় বলিতেছেন—সাদ্ধ দ্বাত্রিংশৎ বৎসর হইল আমি বুদ্ধোপাসক হইয়াছি। কিন্তু আমি এত দিন আগ্রহের সহিত কার্য্য করি নাই। এক বৎসর কিম্বা তদপেক্ষা কিছুদিক কাল আমি উৎসাহের সহিত কার্য্য করিতেছি। ইত্যবসরেই জম্বুদ্বীপে যে সকল দেবতা সত্য বলিয়া পরিচিত ছিল তাহারা মনুষ্য বলিয়া এবং মিথ্যা বলিয়া প্রমাণিত হইয়াছে। দৃঢ় বিশ্বাসের এই পুরস্কার—ইহা আমার মহত্বের ফল নহে। যে হেতু অতিশয় ক্ষুদ্র মনুষ্যও চেষ্টা করিলে স্বর্গে পুরস্কার পাইতে পারিবে। এই জন্তই একটি বক্তৃতা হইয়াছিল, যাহার মর্ম্ম এই—‘ক্ষুদ্র এবং মহৎ সকল লোকেরই কার্য্য করা উচিত। তাহা হইলে তাহারা প্রকৃত জ্ঞান পাইবে এবং উন্নতি ক্রমশঃ অধিকতর হইতে থাকিবে।’ এই বক্তৃতাটি স্বর্গীয় পুরুষ (বুদ্ধ) দুইশতের অধিক ছাপান, অর্থাৎ ২৫৬ বৎসর পূর্ব্বে দিয়া গিয়াছেন। ইহা আমি পর্ব্বত পৃষ্ঠে স্ফোদন করাইয়াছি।”

এই স্থানে অশোক জম্বুদ্বীপের দেবতাদিগের কথা বলিতেছেন। পাঠকেরা জানিবেন যে বৌদ্ধধর্ম্ম দেবতাদিগকে মিথ্যা বলে না।

তাহারা দেবতা একথা মিথ্যা । কিন্তু তাহারা মানুষ এ কথা সত্য । পৃথিবীতে কর্ম নামে প্রকৃতির এক প্রকাণ্ড নিয়ম আছে । সে নিয়মটি এই যে লোকেরা যেরূপ কর্ম করে সেইরূপ ফল লইয়া আর এক জন্মে জন্মগ্রহণ করে । আমি যদি ইহলোকে ভাল কর্ম করি, তাহা হইলে সেই কর্মের গুণে আমি আর এক জন্মে অতিশয় সাধু বা মহৎ লোক বা দেবতা হইয়া জন্মিব । আর আমি যদি কুকর্ম করি তাহা হইলে তাহারই দোষে আমি কোন প্রকার নিকৃষ্ট জীব হইয়া জন্মিব । এ প্রকার রূপান্তর স্বভাবের নিয়মে আপনাপনি হয় । মনুষ্য মরণের সময় স্বীয় কর্মফল সঙ্গে লইয়া যায়, এবং অন্য জন্মে তাহারই অনুরূপ জন্মলাভ করে । কেঁদেরা বিশ্বাস করিতেন যে দেবত্ব পূর্বজন্মের পুণ্য ফল এবং দেবতারা কুকর্ম করিলে আবার নিকৃষ্টরূপ ধারণ করিয়া জন্মাইতে পারেন । বুদ্ধ কেবল নির্ব্যাণ পাইয়াছিলেন বলিয়া জন্ম মরণ হইতে মুক্ত হইয়াছেন । তিনি দেবতাদিগের অপেক্ষা উচ্চ এবং শ্রেষ্ঠ । ইন্দ্র, বরুণ, কুবের, বিষ্ণু, শিব এই সকল দেবতাদিগকে তিনি মানিতেন । কিন্তু ইহাও বলিতেন যে ইহারা তাঁহার সেবক । যে হেতু দেবতারাও নির্ব্যাণ প্রাপ্ত হন নাই ; তাঁহাদিগের মনে কামনা আছে । সুতরাং তাঁহারাও কর্মফলনিয়মের অতীনস্থ এবং তাঁহারাও এক জন্মে কীট হইয়া জন্মিতে পারেন । সাহাসারামের আদেশটি বুঝিবার সময় পাঠকেরা এই মতটি যেন মনে রাখেন ।

জম্বুদ্বীপের দেবতাদিগের সম্বন্ধে আরও কিছু বলা উচিত । বুদ্ধের সময়, এবং অশোকের সময়েও বোধ হয়, ভারতবর্ষে বৈদিক দেবতাদিগের পূজা প্রচলিত ছিল । তখন পৌরাণিক ধর্ম প্রবল ছিল বলিয়া বোধ হয় না । ইহা অবশ্য স্বীকার করিতে হইবে যে মহাভারতের ইতিহাস বুদ্ধের বহুকাল পূর্বে অভিনীত হইয়া গিয়াছে । কুষোর কথা বুদ্ধদেবের সময় পবিচিত ছিল ইহা ললিতবিস্তরে অস্বগত হওয়া যায় । কিন্তু হরিবংশের কৃষ্ণ, বিষ্ণু পুরাণের কৃষ্ণ, ভাগবত

বতের কৃষ্ণ, অর্থাৎ পুরাণের কৃষ্ণ—তাহার অনেক পরে ভারতবর্ষে উপাস্ত দেবতা বলিয়া অবতীর্ণ হন । পূর্বে পূর্বে কৃষ্ণ চতুর্ভুজ বিষ্ণুরূপে পূজিত হইতেন । কৃষ্ণ রাধিকার প্রতিমূর্তিস্থাপন অতিশয় আধুনিক । পৌরাণিক দেব দেবীকেও আধুনিক বলিতে হইবে । বৌদ্ধ গ্রন্থে বৈদিক দেবতাদিগের নাম সর্বদা পাওয়া যায় । ব্রহ্মা এবং ইন্দ্রের অনেক স্থানে উল্লেখ হইয়াছে । কিন্তু কার্তিক, জগদ্ধাত্রী, লক্ষ্মী, স্বরস্বতী, ইহার তখনও ভারত গগনে উদয় হন নাই বলিয়া প্রতীতি হয় । আমাদের বিশ্বাস এই যে বৌদ্ধধর্ম অতিশয় প্রবল হইলে তাহার বিরোধেই পুরাণ প্রকলতর হইয়া উঠে । বৌদ্ধধর্মকে এক প্রকার নিরীশ্বর বলিলেও বলা যায় । সেই নিরীশ্বরত্ব দূর করিবার জন্যই ভারতে তেত্রিশ কোটি দেব দেবীর প্রয়োজন হয় । বৌদ্ধ ধর্ম বলিত যে ঈশ্বর না থাকিলেও মানুষ নিজ চেষ্টায় জন্ম মরণের শৃঙ্খল হইতে মুক্ত হইতে পারে । ঈশ্বর নাই একথা ইহা কখন বলে নাই । তবে ইহা বলিত যে মানুষের ভাল হইবার ভার মানুষের হাতে । মানুষের নিজ দেহতেই নীতির নিয়ম সকল লিখিত আছে । কর্মকল লইয়া দেহধারী হয় । সেই কলের অবশ্যভাবী শক্তিতে কেহ মানুষ হয়, কেহবা পশু হয়, কেহ কেহ বা দেবতা হইয়া জন্ম গ্রহণ করে । এই প্রকারে বৌদ্ধধর্ম নীতির তত্ত্ব পরিষ্কার রূপে প্রচার করিয়া গিয়াছে । ইহা সত্য যে ঘোর তপস্যা কর, বা উপাসনা কর, বা সম্পূর্ণরূপে ঈশ্বরে বিশ্বাসী হও, ভক্তকণ পর্য্যন্ত না মন হইতে রিপু সকলের নির্বাণ হইবে, ভক্তকণ তোমার মুক্তি হইবেনা । একথাটি পরম সত্য । কিন্তু ইহাও আবার সত্য যে ভক্তিহীন নীতি শীত্র শুষ্ক এবং কঠোর হইয়া যায় এবং মানুষ ঈশ্বর তত্ত্ব না পাইলে কেবল নীতির পথে থাকিতে পারে না । যদি ঈশ্বরের আবশ্যকতা না থাকে, তাহা হইলে আমি কেনই বা ভাল হইব ? ভাল হইয়া আমার কি হইবে ? ভক্তির পথে চলিলে নীতি না থাকিতে পারে । কিন্তু

ভক্তির পথের পথিক বিদ্যাস করিতে পারে, আশা করিতে পারে, বিপদপরীক্ষার সময় দেব দেবীর উপর নির্ভর করিতে পারে। আর কৰ্ম্ম কলের কঠোর প্রণালীতে মানুষ নিরাশ হইয়া দুঃস্থ হুগান্তর কেবল কষ্ট পায়। সুতরাং বৌদ্ধ ধর্ম্ম লোকের মনকে শূন্য করিয়া দিয়াছিল এবং কাহাকেও অধিক কাল নীতির অধীন রাখিতে পারে নাই। স্বাভাবিক নিয়মের অধীন হইয়া ইহাকেও কুসংস্কার মানিতে হইল। বুদ্ধ নিজেই ঈশ্বরবৎ হইলেন। তাঁহার ধর্ম্মে তন্ত্র মন্ত্র আসিয়া একেবারে তাহাকে জঘন্য করিয়া ফেলিল।

পুরাণ সকল ঠিক কোন সময়ে এদেশে অবতীর্ণ হয় তাহা বলিবার কোন সম্ভাবনা নাই। ইহারা যে আধুনিক তাহার প্রমাণ আছে, এবং ইহারা যে বৌদ্ধ ধর্ম্মের প্রতিবাদ স্বরূপ তাহা এক প্রকার বিশ্বাস করা যায়। ইহারা যে আধুনিক তাহার এক প্রমাণ এই যে বিষ্ণু, ভাগবত, মৎস্য প্রভৃতি কতকগুলি প্রসিদ্ধ পুরাণে অশোকের নাম আছে। অশোকের পর মৌর্য্য বংশের সাতজন রাজার নাম আছে, এবং মৌর্য্য বংশের পর শুঙ্গ বংশ, তাহার পর কাণ্ণ বংশ, তাহার পর অন্ধভূত্য বংশ, এই তিন বংশের নাম আছে। বিষ্ণু পুরাণে ইহাও লিখিত আছে যে, এই সকল বংশের পর আভীর, গর্দভ, শক, যবন, তুষার, মুণ্ড, মৌন প্রভৃতি অসভ্য জাতিরা রাজত্ব করিবে। তাহা হইলে অশোকের কত শত বৎসর পরে বিষ্ণু পুরাণ, ভাগবত পুরাণ এবং মৎস্য পুরাণ রচিত হইয়াছে তাহা পাঠকেরা সহজেই উপলব্ধি করিতে পারিবেন। প্রথমে বেদ, তৎপরে উপনিষৎ, তাহার পর দর্শন এবং বৌদ্ধ ধর্ম্ম এবং তাহার পর পৌরাণিক ধর্ম্ম, ইহাদিগের রাজত্ব ভারতবর্ষে ক্রমান্বয়ে হইয়া আসিতেছে। ভারত ধর্ম্মের দেশ। আরও কত প্রকার ধর্ম্ম এখানে ক্রমশঃ উদয় হইবে তাহা কে বলিতে পারে ?

বৌদ্ধ সঙ্গ এবং শাস্ত্র ।

বিরাট পর্বত পৃষ্ঠে এই আদেশটি লিখিত আছে:—“প্রিয়দর্শী রাজা মগধে সমাগত ভিক্ষু সঙ্ঘকে অভিবাদন করিতেছেন। শ্রদ্ধেয় মহাশয়গণ, বুদ্ধ, ধর্ম, ও সঙ্ঘের প্রতি আমার কত ভক্তি এবং স্নেহ তাহা আপনারা অবগত আছেন। ভগবত যাহা যাহা বলিয়াছেন তাহা উৎকৃষ্ট কথা। সেই জন্য যে কথা গুলি তিনি বলিয়াছেন এবং কোথায় সে গুলি সংরক্ষিত আছে ইহা নির্ণয় করা উচিত। যে হেতু ইহা স্থির হইলে সঙ্ঘ অনেক কাল স্থায়ী হইবে। হে মহাশয়গণ, আমি নিম্নলিখিত রচনাগুলিকে ধর্ম শাস্ত্র বলিয়া শ্রদ্ধা করি, যথা, ‘বিনয়,’ ‘আর্য্যদিগের অনৈসর্গিক ক্ষমতা,’ ‘অনাগত (ভবিষ্যৎ) ভয়,’ ‘মুনিগাথা,’ ‘উপতিষ্য সম্বন্ধে প্রশ্ন’ এবং ‘রত্নত্বের প্রতি ভগবতকথিত মিথ্যাবিষয়ক উপদেশ।’ হে মহাশয়গণ, আমার ইচ্ছা যে ভিক্ষু, ভিক্ষুনী এবং সাধারণ বৌদ্ধমণ্ডলী নিজ হিতার্থে এই সকল উক্তি যত্নের সহিত চর্চা করেন এবং স্মরণ করিয়া রাখেন। সেই জন্য এই আদেশ লিখিত হইল।”

এই আদেশ সম্বন্ধে কতকগুলি কথা বলা আবশ্যিক। অশোক যে সময়ে এই অনুজ্ঞাটি লিখিয়াছিলেন সেই সময়ে ভিক্ষুমহাসঙ্গ পাটলিপুত্র নগরে সমাহৃত হইয়াছিল। সভার কারণ পূর্বেই বর্ণিত হইয়াছে। এই সভার অধিবেশন সময়ে অশোক উপস্থিত সভ্যগণকে ধর্ম সম্বন্ধে নিজ অভিপ্রায় জানাইতেছেন। বুদ্ধের উক্তি সম্বন্ধে

অনেকানেক লোক অনেক প্রকার মত চালাইয়াছিল। তাহারই জন্ত বৌদ্ধদিগের মধ্যে আঠারটি সম্প্রদায় হইয়াছিল। প্রভেদ এবং বিচ্ছেদ নিরাকরণার্থ অশোক বলিয়া দিতেছেন যে কোন্ কোন্ পুস্তক ধর্ম শাস্ত্র বলিয়া গণ্য করিতে হইবে। সকল বৌদ্ধেরাই তিনটি জিনিশকে মানিত—বুদ্ধ, ধর্ম, এবং সঙ্গ। এই তিনটিকে তাহাদিগের আরাধ্য ত্রিমূর্তি বলিলেও বলা যাইতে পারে। বুদ্ধের জীবনকে তাহারা আদর্শ বলিয়া মানিত। তাঁহার বচন এবং বিশ্বাস তাহাদিগের ধর্ম। বুদ্ধের মৃত্যুর পর সেই ধর্ম স্থিরীকরণের জন্ত, মতভেদ হইলে সন্ধেহ ভঞ্নের জন্ত এবং আবশ্যক হইলে নূতন নূতন নিয়ম স্থাপনের জন্য সঙ্ঘের আবশ্যক হইয়াছিল। ভিক্ষু ভিক্ষুণীদিগের দলের নাম সঙ্গ। তাহারা একত্র হইয়া যাহা স্থির করিতেন তাহাই পালনীয় এবং তাহা অতিক্রম করিলেই মহাপাপ হইত। সেই জন্য বৌদ্ধ ধর্ম গ্রহণ করিতে হইলে বুদ্ধ, ধর্ম এবং সঙ্গ এই তিনকেই মানিতে হয়। অন্য সকল পুস্তক অগ্রাহ করিয়া অশোক গুটি কয়েক রচনাকে শাস্ত্র বলিয়া নির্দেশ করিতেছেন। সেই রচনাগুলির নাম এই আদেশ মধ্যে বলা হইয়াছে। সর্বাপেক্ষা উচ্চ শাস্ত্র বিনয়। বিনয় অর্থে বৌদ্ধমণ্ডলীর শাসন এমং নিয়ম প্রণালী। বুদ্ধের জীবন কালে যখন যেরূপ অবস্থা ঘটিত তখন তাহা তাঁহার সম্মুখে উপস্থিত হইলে তিনি তৎসম্বন্ধে একটি একটি নিয়ম আদেশ করিতেন। সেই সকল নিয়ম একত্রিত হইয়া বিনয় নামে অভিহিত হয়। বুদ্ধের মৃত্যু হইলে এক প্রকাণ্ড সভা রাজগৃহে আহূত হইয়াছিল। সেই সভাতে আনন্দ সূত্র, উপালি বিনয় এবং কাশ্যপ অভিধর্ম এই তিন বৌদ্ধ ধর্মের অংশ উচ্চারণ করেন। বুদ্ধের বচন সূত্র নামে প্রসিদ্ধ। বিনয় শাসন এবং নিয়ম প্রণালীকে বলে এবং অভিধর্মের অর্থ ধর্মদর্শন। কাশ্যপ শাক্য মুণির প্রধানতম শিষ্য ছিলেন; গুরুর অন্তর্ধানে তিনি তাঁহার পদে অভিষিক্ত হন। উপালি জাতিতে নাপিত ছিলেন। কপিলবস্তুর

বহু সংখ্যক ভদ্র লোকের সহিত তিনিও সংসার পরিত্যাগ করিয়া ভিক্ষুব্রত অবলম্বন করেন। আনন্দ শাক্যের খুল্লাভাতের সন্তান এবং প্রিয়তম শিষ্য। এই তিন জন যে তিন শাস্ত্র একত্রিত করিয়াছিলেন তাহা ত্রিপিটক নামে বিখ্যাত হইয়াছে। ইহার মধ্যে বিনয় শাস্ত্র অতিশয় আশ্চর্য্য বলিয়া বোধ হয়। ইহা পাঠ করিলে বৌদ্ধদিগের নীতির শাসন কত তীব্র ছিল তাহা বুঝা যায়। অন্যান্য যে সকল পুস্তক আদেশে উল্লিখিত হইয়াছে তাহার বিষয় অধিক বলা অনাবশ্যক। কেবল রহস্যের কথা এই পর্য্যন্ত বলা উচিত যে তিনি বুদ্ধের সন্তান ছিলেন। বৌদ্ধ ইতিহাসে দেখিতে পাওয়া যায় যে ইহাঁকে লইয়াও একটি দল হইয়াছিল।

প্রস্তর ফলক ।

দিল্লীতে যে স্তম্ভ দে খিতে পাওয়া যায় তাহার দক্ষিণদিকে নিম্নোক্ত আদেশটি লিখিত আছে । যথা,

“ দেবানাম প্রিয় প্রিয়দর্শী বলিতেছেন—আমার অভিষেকের সপ্তবিংশ বর্ষে নিম্নলিখিত জীবদিগকে কেহই হত্যা করিতে পারিবে না—শুক, শারিকা, চক্রবাক, হংসী, নন্দিমুখ পেচক, শকুনি, বাহুড়, অম্বকপিল্লিক, দাঁড়কাক, কাক, বেদবেয়ক, হাড়গিল্লা, শকুজব, কফতশয়ক, পনশশেসিমন, সন্দক, ওকপদ, এবং যাহারা যুগলভাবে থাকে, যথা, শ্বেতকপোত, গ্রাম্যকপোত ইত্যাদি । চতুষ্পদ পশুদিগের মধ্যে বিবিধ শ্রেণীর ছাগী, মেঘী, ও শুকরী, গর্ভবতী কিস্মা পয়স্বিনী হইলে, তাহাদিগকে কেহ আহারের জন্ত বধ করিবে না । পক্ষিমাংসভোজনার্থে পক্ষী সকল বিনাশিত হইবে না । অকার্য্যকর বলিয়া কিস্মা আমোদার্থ কোন পক্ষীকেই কেহ নাশ করিতে পারিবে না । হিংস্রক পশুদিগকে কেহ পোষণ করিবে না । চাতুর্মাসিক সময়ে পূর্ণিমার গোধূলিতে, তিন পুন্যাহে, অর্থাৎ চতুর্দশী, অমাবস্যা এবং প্রতিপদ তিথিতে, উপোষত অর্থাৎ উপবাস কালে কেহই বাজারে মৎস্য বিক্রয় করিতে পারিবে না । এমন কি এই সকল দিবসে সর্প জাতি, কিস্মা কুস্তীর জাতি, কিস্মা কোন প্রকার জীবই নষ্ট হইবে না । ”

“চাতুর্মাসিক সময়ে, অক্টোবর, চতুর্দশী, পূর্ণিমা কিস্মা অমাবস্যা

তিথিতে, যখন চন্দ্র তিষ্য কিস্বা পুনর্বস্তু নক্ষত্রে অবস্থিতি করিবেন, তখন বৃষ, ছাগ, মেষ এবং শূকর শাবক কেহই গৃহে রাখিতে পারিবে না । চাতুর্মাসিক সময়ে যখন তিষ্য এবং পুনর্বস্তু নক্ষত্রে চন্দ্র অবস্থিতি করিবেন এবং প্রতিপদে কেহই অশ্ব কিস্বা বৃষ শকট কিস্বা অন্য কোন যানে চালনা করিতে পারিবে না ।

এতদ্ব্যতীত, আমার অভিষেকের সপ্তবিংশ বর্ষে ২৫ জন বন্দী কারাগার হইতে উন্মুক্ত হইয়াছে ।”

দিল্লীর স্তম্ভের পূর্বপার্শ্বে নিম্নোক্ত আদেশটি আছে ;—

“দেবানাম প্রিয় প্রিয়দর্শী বলিতেছেন—মনুষ্যদিগের মধ্যে ধর্ম্মের উন্নতি কিরূপে হইবে ? নিম্নজাতীয় লোকেরা ধর্ম্মভুক্ত হইলে নিশ্চয় ধর্ম্মের বৃদ্ধি হইবে ।

“দেবানাম প্রিয় প্রিয়দর্শী বলিতেছেন—অনেক আশায় বৎসর সকল চলিয়া গিয়াছে । রাজবংশোদ্ভূত লোকদিগকে ধর্ম্মভুক্ত করিলে ধর্ম্মের কিরূপ উন্নতি হইবে ? যদি নির্দীনদিগকে ধর্ম্মে দীক্ষিত করিলে ধর্ম্মের এতদূর বৃদ্ধি হয়, তাহা হইলে উচ্চশ্রেণীস্থ লোক দিগকে ধর্ম্মে আনিলে আমার ধর্ম্মের যে কতই বৃদ্ধি হইবে তাহা বলা যায়না।”

আর একটি আদেশ এই ;—

“দেবতাদিগের প্রিয় প্রিয়দর্শী বলিতেছেন—বড় বড় রাজ-মার্গে মনুষ্য এবং জীব সকল ছায়া পাইবে বলিয়া বটবৃক্ষ সকল রোপিত হইয়াছে । আত্মবৃক্ষ সকলও পথে পথে রোপণ করাইয়াছি । অর্দ্ধক্রোশ অন্তর একটি একটি কূপ খনন করাইয়াছি এবং রাত্রিকালের জন্ত বিশ্রাম স্থানও নির্মিত হইয়াছে । শত শত অতিথিশালা মনুষ্য এবং পশুদিগের জন্য আমি নির্মাণ করাইয়াছি । আমার প্রজাবর্গ যেমন সকল প্রকার সুখ সমৃদ্ধিতে থাকিয়া আমার রাজত্বে সুখ ভোগে করিতেছে, ঠিক সেই ভাবে তাহারা যেন আমার দয়ার প্রণালীকে প্রশংসা করিয়া জিহবার অশুকরণ করে ।”

আর অধিক অনুবাদ করিবার প্রয়োজন নাই । অশোক কোন্ শ্রেণীর রাজা ছিলেন তাহা এই সকল অনুজ্ঞা পাঠ করিলেই কথ-
কিত পরিমাণে উপলব্ধি করিতে পারা যায় । তাঁহার ক্ষমতার
সীমা ছিল না । যে রাজার রাজত্ব সমুদয় উত্তর এবং মধ্য ভারত-
বর্ষে বিস্তৃত ছিল, এবং যাহার সঙ্গে বন্ধুতা করিবার জন্ত সিরিয়া,
মিসর, গ্রীস দেশের প্রবল পরাক্রান্ত রাজারা পর্য্যন্ত আকুল থাকিতেন,
সেই রাজা তাঁহার অসীম ক্ষমতা কেবল জীবে দয়া' এই ব্রতে
নিয়োগ করিয়াছিলেন । ইহা বলিলে অত্যাক্তি হয় না যে তাঁহার
সময়ে এমন দিন প্রায়ই সূর্যবদা হইত যে দিনে সমুদয় ভারতময় একটি
জীবেরও হত্যা হইত না । তিনি ছায়াদান করিবার জন্ত যে সকল
বৃক্ষ রোপিত করিয়াছিলেন কে জানে যে তাহার মধ্যে অনেকগুলি
এখনও এই দেশে অসংখ্য জীবকে ছায়া দান করিতেছে না ?
দয়াই পৃথিবীতে আশ্চর্য্য ধর্ম্ম । যে রাজা এই ধর্ম্মকে অবলম্বন
করেন তাঁহার নাম করিলেও পুণ্য হয় । দুইটি প্রবল ধর্ম্ম দুইজন
রাজার সহায়ে পৃথিবীর ধর্ম্ম হইতে পারিয়াছিল । একটি জৈশাই ধর্ম্ম
—ইহা কন্সটানটাইনের সাহায্যে রাজধর্ম্ম হইয়াছিল ; এবং অপরটি
বৌদ্ধধর্ম্ম—ইহা অশোকের গুণে ভারত, সমুদয় মধ্য এশিয়া, চীন,
তাতার, ব্রহ্মদেশ, শ্যাম, লঙ্কা প্রভৃতি স্থানে বিস্তৃত হইয়াছে ।
কন্সটানটাইন এবং অশোক এই দুইজনকে নিরপেক্ষ ন্যায়ের তুল্য
দণ্ডে তুলনা করিলে অশোকের গুণত্ব দশগুণ অধিক বলিয়া
বোধ হয় । অশোকের তুল্য রাজা এদেশে ত অনেক হন নাই—
পৃথিবীতেও অনেক হইয়াছেন কিনা সন্দেহ ।

জীবে দয়া ।

অশোক আর একটি মহৎ কার্য্য করিয়াছিলেন, তাহা এ পর্য্যন্ত .
পৃথিবীতে কেহ কখন করে নাই । মনুষ্য এবং পশু উভয়ের জন্য
চিকিৎসাপ্রণালী এবং উভয়ের জন্য চিকিৎসালয় তিনিই প্রথম
প্রতিষ্ঠা করেন । একজন খ্রীষ্টান লেখক অহঙ্কার করিয়া বলিয়াছেন
যে খ্রীষ্টান ধর্ম্ম পৃথিবীতে চিকিৎসালয় করিবার প্রথার প্রথম সূত্রপাত
করে । লেখক বোধ হয় জানিতেন না যে ঈশা জন্মগ্রহণ করিবার
পাঁচশত বৎসর পূর্ব্বে শাক্য গৌতম জন্মগ্রহণ করিয়াছিলেন এবং
পাঁচ শত বৎসর পূর্ব্বে তিনি জীবের প্রতি দয়া প্রচার করিয়া যান ।
তাহার পর অশোক আসিয়া সেই মতটিকে কার্য্যে পরিণত করেন ।
ঈশাই ধর্ম্ম দ্বারা চিকিৎসালয় অর্থাৎ হাসপাতাল স্থাপিত হয় ইহা
সত্য বটে । কিন্তু তাহা কেবল মনুষ্যের জন্য । খ্রীঃ অব্দের আড়াইশত
বৎসরপূর্ব্বে অশোক মনুষ্য এবং পশুদিগের জন্য প্রথম হাসপাতাল
পৃথিবীতে প্রতিষ্ঠিত করেন । ইহা একটি আশ্চর্য্য কথা যে ভারত-
ভিন্ন অন্য কোন দেশে কেহ কখন পশুদিগের প্রতি কর্তব্য ব্যবহার
দেখাইয়া দেন নাই । নিকৃষ্ট জীবদিগের যে কোন অধিকার আছে,
তাহারা যে জীবন সম্ভোগ করিবার অধিকারী, তাহাদিগের প্রতি
আমাদিগের যে অনেকগুলি কর্তব্য কার্য্য আছে—এ কথা অন্য
কোন ধর্ম্মে বলে না । ইহার একটি কারণ এই, যে ভারত ভিন্ন অণু
দেশের লোকেরা এখন পর্য্যন্ত আমিষভক্ষক । ইহুদি এবং মুসল-

মানধর্ম্যে কতকগুলি পশুর মাংসভক্ষণ নিষিদ্ধ । কিন্তু খ্রীষ্টান ধর্ম্য এত উদার হইয়াও মনুষ্য ব্যতীত আর কোন জীবেরই অধিকার স্বীকার করে নাই । সমস্ত নিকৃষ্ট জীব মানুষের খাদ্য এবং তাহার মানুষের সেবার জন্য সৃষ্ট খ্রীষ্টানধর্ম্য এই রূপ কথা বলে । সুতরাং খ্রীষ্টানদের মধ্যে আমিষ ভোজনের প্রথা দিন দিন উন্নত হইতেছে । কেবল মনুষ্য মাংস নিষিদ্ধ । এতদ্ব্যতীত বাহাতে পুষ্টিসাধন হয় তাহা খাইলে হানি নাই, ইহাই খ্রীষ্টান শাস্ত্র এবং খ্রীষ্টান বিজ্ঞানের কথা । আজকাল ইংলণ্ড দেশে পশুদিগের প্রতি নিষ্ঠুরতা নিবারণী সভা অনেক হইয়াছে । কিন্তু তাহারও কি বলে? তাহার বলে যে পশুদিগের মাংস ভক্ষণ করিবে, কিন্তু তাহাদিগকে মারিবার সময় কষ্ট দিও না । পশুর মাংসাহার বিধিসঙ্গত, কিন্তু নিষ্ঠুর হইয়া পশু বধ করা নিষেধ । এটি একটি মহৎ কার্য্য বলিতে হইবে । কিন্তু ইহাতে জীব হত্যা বন্ধ হইতেছে না । কেবল এই মাত্র আশা করা যাইতে পারে যে ভবিষ্যতে পশুদিগকে মারিবার সময় তাহার মৃত্যুবন্ত্রণা অনুভব করিবে না । ফরাশি দেশে রাজবিদ্রোহের সময় যেমন গিলটিন বস্ত্র দ্বারা এক মুহূর্ত্তে লোকদিগের মুণ্ড ছেদন হইয়া যাইত, তেমনি বোধ হয় বিজ্ঞানবিৎ পণ্ডিতেরা এমন একটি আশ্চর্য্য বস্ত্র রচনা করিবেন যাহাতে পশুরা মারিবার সময় তাহাদিগের মুণ্ড শরীর হইতে বিচ্ছিন্ন হইতেছে অনুভব করিতে পারিবে না । ইউরোপ মহাখণ্ডে জীবের প্রতি ইহা অপেক্ষা অধিক দয়া আশা করা যাইতে পারে না । সেখানে অনেকে নিরুদ্ভিষ ভোজন আরম্ভ করিয়াছেন ইহা সত্য । কিন্তু তাহা কি অনেকে অনুসরণ করিবে ? ধর্ম্মের আদেশ না হইলে আমিষ ভোজনের প্রলোভন অতিক্রম করা কঠিন । ভারতে আমিষভক্ষণ অনেক দিন হইতে প্রচলিত ছিল । ধর্ম্মার্থে ধলিদানপ্রথা ত ছিলই, এতদ্ব্যতীত আহারের জন্য অনেক প্রকার জীবহিংসা হইত । বুদ্ধ সর্ব্বপ্রথমে জীবহত্যার বিরুদ্ধে আদেশ প্রচার করেন । তাঁহার পর বৈষ্ণব ধর্ম্ম

সেই আদেশটি আপনার করিয়া লয়। মাংসের সঙ্গে সুরা পান ও এদেশে অধিক পরিমাণ প্রচলিত ছিল। কিন্তু প্রথমে বৌদ্ধ ধর্ম, এবং তাহার পর বৈষ্ণব ধর্ম ইহারও নিষেধ করিয়া যায়। শাক্য জীবহত্যা এবং সুরাপান উভয়কেই গুরু পাপ বলিয়া নির্ণয় করিয়াছিলেন। বৌদ্ধ ধর্ম ও বৈষ্ণব ধর্ম এদেশকে নিরামিষ ভোজী করিয়াছে। শাক্তেরা আমিষ ভক্ষণ করে ইহা সত্য। কিন্তু যদি বৌদ্ধ ধর্মের নিষেধ না থাকিত, তাহা হইলে বোধ হয় শাক্তদিগের মধ্যে এরূপ অনেক প্রকার পশু মাংস ভক্ষণ প্রথা প্রচলিত হইত যাহা এখন শাক্ত বিরুদ্ধ বলিয়া নির্ণীত আছে। জীবদিগকে বধ করা পাপ, এই বিশ্বাস এদেশে বহু দিন হইতেই আছে। কিন্তু পৃথিবীর অন্য কোন দেশে তাহা নাই, ইহার অর্থ কি? ভারতের লোকেরা কি অন্যান্য জাতিদিগের অপেক্ষা অধিক দয়ালু? এদেশীয়দিগের হৃদয়ে ভগবান কি অধিকতর দয়া দিয়াছেন? তাহাই বা কিরূপে বলিব? ইউরোপে দয়ার কার্য এত আছে যে তাহা দেখিলে আশ্চর্য্যান্বিত হইতে হয়। তবে এ ভাবটি কেবল ভারতের ভাব কিসে হইল বলিতে পারি না। তবে একথা বলিতে পারি যে এদেশের ধর্ম জীব হত্যাকে একটি পাপ বলিয়া নির্দেশ করিয়া গিয়াছেন, এবং অল্প দেশের কোন ধর্মই সে কথা বলে নাই। যদি কেহ জিজ্ঞাসা করেন যে ধর্ম পুরাকালে ইহাকে পাপ বলে নাই কিন্তু পরে তাহা বলিল কেন? আমরাদিগের বোধ হয় ইহার উত্তর এই যে এদেশে পূর্ব জন্ম এবং পুনর্জন্ম মতটি প্রচলিত আছে। বুদ্ধ এই মতকে তাহার ধর্মের মূল মত করিয়াছিলেন। আমরাদিগের দেশের সকল লোকেরাই এই কর্ম ফলকে বিশ্বাস করে। তাহার বলে যে মানুষেরা কর্মফল বশতঃ ভিন্ন ভিন্ন জীবের রূপ ধারণ করে। নিকট জীব সকল মনুষ্য ছিল, এখন তাহারা কর্মফলে নিকট জীবন ধারণ করিয়াছে। কর্মফল বশতঃ এই রূপ অনেক বার জন্মাইতে হইবে। সুতরাং প্রাণিসকলের জীবন

আছে এবং আস্রা ও আছে । অগ্ন্যান্ত ধর্মে তাহা বলে না । প্রাণী-
দিগের আস্রা আছে ইহা আমরা কোথাও দেখি নাই । একটি
সামান্য কীটেরও যখন আস্রা আছে, এবং যখন এমন হইতে
পারে যে সেই কীট পূর্ব জন্মে আমার পিতা, মাতা কিম্বা অন্যতর
নিকটস্থ আত্মীয় ছিল, তখন আমি যদি তাহাকে বিনাশ করি, তাহা
হইলে সে কার্যের দায়িত্ব আমাকে পর কাল পূর্য্যন্ত বহন
করিতে হইবে । বোধ হয় এই কারণেই এখানে জীব হত্যা পাপ
বলিয়া গণ্য হইয়াছে । এতদ্ব্যতীত অন্য কোন কারণ আমাদের
নিকট প্রকৃত কারণ বলিয়া বোধ হয় না ।

বার্দ্ধক্য এবং মৃত্যু ।

অশোকের বয়ঃক্রম এখন অধিক হইয়া আসিতেছে ।
বয়সের সঙ্গে সঙ্গে সংসারে যে সকল শোক ভোগ করিতে
হয় তাহাও তাঁহার ভাগ্যে আসিয়া পড়িল । প্রথমতঃ, তাঁহার এক
মাত্র ভাই, বীতশোক, ভিক্ষু বেশে পথি মধ্যে এক আত্মীর
হাতে প্রাণ ত্যাগ করেন । তাহার পর তাঁহার একমাত্র ঔরসপুত্র
কুণাল মহারানী তিষ্যরক্ষিতার চক্রে পড়িয়া দুই চক্ষু হইতে বঞ্চিত
হন । তিনিও সংসার ত্যাগ করিয়া ভিক্ষু ব্রত অবলম্বন করিলেন ।
তাঁহার পুত্র মহেন্দ্র এবং তাঁহার কন্যা সঙ্গমিত্রা কোনও মহিষীর গর্ভে
জন্ম গ্রহণ করেন নাই । সুতরাং তাঁহাদিগের রাজ্যে কোন অধি-
কার ছিল না এবং তাঁহারা উভয়েই ধর্ম্মজীবন গ্রহণ করিয়াছিলেন ।
সুতরাং বৃদ্ধ বয়সে অশোকের আপনার বলিবার আর কেহই রহিল
না । কুণালের এক পুত্র ছিলেন তাঁহার নাম সম্পাদি । সেই
সম্পাদি তাঁহার উত্তরাধিকারী হইলেন । বীতশোকের মৃত্যু এবং
কুণালের অন্ধতা প্রাপ্তি এই দুইটি বিশেষ কারণে অশোকের হৃদয়ে
সংসারের প্রতি বিরাগ জন্মে । অবশেষে তিনিও ভিক্ষু ব্রত লই-
লেন । এই ঘটনাটির একটি চমৎকার বিবরণ পুস্তক মধ্যে
সন্নিবিষ্ট আছে । একদিন অশোক উপগুপ্ত নামক একজন আচার্য্য-
কে জিজ্ঞাসা করিলেন যে বৌদ্ধদিগের মধ্যে কে সর্ব্বাপেক্ষা ধর্ম্মার্থে
অধিক দান করিয়াছেন ? উপগুপ্ত বলিলেন, গৃহস্থ অনাথপিণ্ডিক

ইনি অবশিষ্ট নগরে বাস করিতেন । যখন বুদ্ধ সেখানে গিয়াছিলেন, তখন অনাথপিণ্ডিক তাঁহার বাসের জন্য জেতবেন নামক একটি উদ্যান তাঁহাকে উপহার দেন । বুদ্ধ বর্ষাকালে সেই খানে শিষ্য সম-ভিব্যাহারে চাতুর্মাস্য করিতেন । অশোক জিজ্ঞাসা করিলেন, তিনি কত অর্থ দান করিয়াছিলেন ? উপগুপ্ত বলিলেন, একশত কোটি স্তূবর্ণ ! ইহা শুনিয়া অশোক বলিলেন, আমিও তবে একশত কোটি স্তূবর্ণ দিব । আমি ৮৪,০০০ ধর্ম্মাদেশ প্রচার করিয়াছি, যে-যে স্থানে স্তূপ নির্মিত হইয়াছে সেই সেই স্থানে একশত সহস্র স্তূবর্ণ দান করিয়াছি ; এবং যেখানে শাক্যমুনি জন্ম গ্রহণ করিয়াছিলেন, যেখানে তিনি বুদ্ধ হন, যেখানে তিনি ধর্ম্মচক্র ঘূর্ণায়মান করেন, এবং যেখানে তিনি নির্বাণ প্রাপ্ত হন, সেই সেই স্থানেও আমি সেই পরিমাণে অর্থ দিয়াছি । বর্ষার পাঁচমাস ভিক্ষু এবং ভিক্ষুগীগণ আমার নিকটে আতিথ্য গ্রহণ করেন এবং এবার আমি তজ্জন্য চারি শত সহস্র স্তূবর্ণ ব্যয় করিয়াছি । আমি তিন শত সহস্র ভিক্ষুদিগকে প্রতিপালন করি । আমি আর্য্য সঙ্ঘকে আমার পত্নী-দিগের ভূমি সম্পত্তি, আমার মন্ত্রীবর্গের, কুনালের এবং আমার নিজের ভূমি সম্পত্তি পর্য্যন্ত দান করিয়াছি । কেবল নগদ টাকা আমার হাতে রাখিয়াছি । আমি এই সকল ভূমি সম্পত্তি আবার চারি শত সহস্র স্তূবর্ণ দিয়া পুনর্ব্বার ক্রয় করিয়া লইয়াছি । এই রূপে আমি সর্ব্বশুদ্ধ ৯৬,০০০ কোটি স্তূবর্ণ ভগবতের ধর্ম্মার্থ দান করিয়াছি ।” এই বলিতে বলিতে অশোক শ্রান্ত এবং বিমর্ষ হইয়া পড়িলেন । তিনি বলিলেন “আমি আর অধিক দিন বাঁচিব না ।”

অশোকের মন্ত্রীর নাম রাধাগুপ্ত ছিল । তিনি মহারাজকে বিমর্ষ দেখিয়া তাঁহাকে সাক্ষাৎ প্রণিপাত করিয়া করষোড়ে বলিলেন—“মহারাজ, আপনি অশ্রুপাত করিতেছেন কেন ?”

অশোক বলিলেন—“রাধাগুপ্ত, আমার ধন-গেল বলিয়া, কি আমার রাজত্ব গেল বলিয়া, কি সংসার পরিত্যাগ করিতেছি বলিয়া

আমি কাঁদিতেছি না । আমি কাঁদিতেছি এই জন্য যে আমি আর্থ্য সঙ্গ হইতে চিরকালের জন্য বিযুক্ত হইব । আমি আর সে সঙ্গকে আহাৰ দিয়া কিম্বা পান দিয়া সম্মান করিতে পারিব না । রাধাগুপ্ত, তুমি বোধ হয় জান যে আমি ভগবতের ধর্মের জন্য এক শত কোটি স্তবর্ণ দিব মানস করিয়াছিলাম । কিন্তু আমি সে অভিশ্রায় এখনও সিদ্ধ করিতে পারি নাই । এখনও চারি কোটি স্তবর্ণ দিলে তবে একশত কোটি পূর্ণ হইবে ।”

সেই মুহূর্ত্ত হইতে অশোক কুকুটআরামনামক আশ্রমে স্বর্ণ এবং রৌপ্য পাঠাইতে আরম্ভ করিলেন ।

তখন কুনালাপুত্র সম্পদী যুবরাজ ছিলেন । মন্ত্রীরা মহারাজের ব্যবহার দেখিয়া সম্পদিকে গিয়া বলিলেন—“ধর্মাবতার, মহারাজের আর অধিক দিন বাঁচিবার নাই । অথচ তিনি সমস্ত ধন কুকুট আরামে পাঠাইয়া দিতেছেন । মহারাজ নিজের সর্বনাশ করিতেছেন, ইহা আপনার নিবারণ করা উচিত ।” তাহা শুনিয়া সম্পদী ধনাধ্যক্ষকে বলিলেন, “আর মহারাজকে স্তবর্ণ দিও না ।” অশোক প্রত্যহ স্বর্ণ পাত্রে ভোজন করিতেন । এক্ষণে তিনি ভোজন শেষ হইলেই, সেই স্বর্ণ পাত্রগুলি কুকুট আরামে পাঠাইতে লাগিলেন । ধর্ম্যাধ্যক্ষ আর স্বর্ণপাত্র দিলেন না । রৌপ্য পাত্রে ভোজন আরম্ভ হইল । অশোক আহারান্তে সেই রৌপ্য পাত্রগুলিও কুকুট আরামে পাঠাইতে লাগিলেন । রৌপ্য পাত্র বন্ধ হইল । অশোক লৌহ পাত্রে আহাৰ করিতে লাগিলেন এবং সে গুলিও আশ্রমে পাঠাইতে আরম্ভ করিলেন । তাহাও বন্ধ হইল । অবশেষে তিনি মুষ্ণু পাত্রে আহাৰ করিতে লাগিলেন । তখন অশোক একটি আমলকের অর্দ্ধাংশ হস্তে লইয়া মন্ত্রিবর্গকে ডাকাইয়া অতি সঙ্কট ভাবে বলিলেন, “বল দেখি, হে মন্ত্রিগণ, এখন এদেশের রাজা কে ?” মন্ত্রীরা আসন পরিত্যাগ করিয়া দণ্ডায়মান হইয়া করবোড়ে বলিলেন, “প্রভু, আপনি এই দেশের রাজা ।” অশোকের চক্ষু অশ্রুপূর্ণ হইল ।

তিনি বলিলেন, “তোমরা যাহা সত্য নহে তাহা বলিতেছ কেন ? আমি রাজ্যচ্যুত হইয়াছি । দেখ, এই আমলকের অর্দ্ধাংশ ভিন্ন আমার আর কিছুই নাই । রাজরাজেশ্বর হইয়াও আমার এখন এই অর্দ্ধ ফলটি মাত্র অন্যকে দিবার আছে । ধিক সেই জঘন্য প্রভুবকে যাহা তরঙ্গের গতির ন্যায় অস্থায়ী । দেখ, আমি লোকপতি, অথচ দুঃখ আসিয়া আমাকে গ্রাস করিয়াছে । বহুস্করাকে একভাসূত্রে বদ্ধ করিয়া, যুদ্ধ সমূহে জয়লাভ করিয়া, অরাজকতাকে দমন করিয়া, সহস্র সহস্র অহঙ্কারী শত্রুদলকে বিনাশ করিয়া, দীন দরিদ্রদিগকে সাহসুনা দিয়া, দেখ রাজ্যচ্যুত অশোক গৌরবহীন হইয়া দুঃখে বাস করিতেছে । বৃক্ষের পত্র কিম্বা পুষ্প বৃন্তচ্যুত হইলে যেমন শুষ্ক হইয়া যায়, সেইরূপ আজ অশোক গৌরববিহীন ও সৌন্দর্য্যবিহীন হইয়া শীর্ণ এবং শুষ্ক হইয়া গিয়াছে ।”

তাহার পর অশোক একজন লোককে সমীপে ডাকাইয়া বলিলেন—“বন্ধো, আমি ক্ষমতা হইতে বঞ্চিত হইয়াছি সত্য, কিন্তু আমার এই শেষ আভাটি তোমাকে পালন করিতে হইবে । তুমি কুক্কুট আরামে গিয়া এই আমলকখণ্ডটি আশ্রমকে উপহার দিও । আমার নাম করিয়া আচার্য্যদিগের পদধূলি লইয়া তাঁহা-দিগকে বলিও যে জম্বুদ্বীপের রাজাধিরাজের ঐশ্বর্য্যের এই টুকু মাত্র অবশিষ্ট আছে । এইটি তাঁহার শেষ দান । আপনারা দেখিবেন যেন এই ফলটি সমুদয় সঙ্গ মধ্যে বিতরিত হয় ।”

তাহার পর অশোক রাধাগুপ্তকে বলিলেন—“বলদেখি রাধাগুপ্ত, এদেশের এখন রাজা কে ?” রাধাগুপ্ত অশোকের চর ধরিয়া বলিলেন—“প্রভু, আপনি এদেশের রাজা ।” এই কথা শুনিয়া অশোক আসন পরিত্যাগ করিয়া আকাশের চারিদিকে নেত্রক্ষেপ করিয়া, উচ্চৈঃস্বরে বলিলেন—“আজ আমি ভগবত্তে সঙ্গকে আমার ধন ভাণ্ডার ব্যতীত এই সসাগরা পৃথিবী দান করিলাম । যে পৃথিবীকে সমুদ্র ঘরকতমণি খচিত পরিচ্ছদ সদৃশ

ভূষিত করিয়া রহিয়াছে, যে পৃথিবীর মুখ নানা রঙে বিভূষিত থাকে, যে পৃথিবী অগণ্য জীবকে ধারণ করিয়া রহিয়াছে এবং বাহার বক্ষে মন্দরপর্বত দণ্ডায়মান, সেই সমাগরা, নানা বেশে অলঙ্কৃত। পৃথিবী আমি বুদ্ধসঙ্গকে দান করিলাম। এই কর্মের ফল যেন আমি পাই। আমি এই কর্ম করিয়াছি বলিয়া রাজ্য স্মৃৎ চাহি না, ইন্দ্রের রাজ্য ভবন প্রার্থনা করি না এবং ব্রহ্মলোকও কামনা করি না; এসকলই জলবিশ্বের ন্যায় ক্ষণস্থায়ী। আমার পূর্ণ বিশ্বাসের পুরস্কার স্বরূপ কেবল এই বাঞ্ছা করি যে আমি যেন আত্মসংযম করিয়া আত্মার উপর প্রভুত্ব স্থাপন করিতে পারি। পৃথিবীর উপর প্রভুত্ব চিরদিন থাকে না, কিন্তু আপনার উপর প্রভুত্ব চিরস্থায়ী এবং তাহার পরিবর্তন কখন হয় না।”

পরে তিনি মন্ত্রীকে এই বিষয়ের দানপত্র লিখিতে বলিলেন এবং তাহা লিখিত হইলে তাহার উপর নিজের মোহর স্থাপন করিয়া কুকুট আরামে প্রেরণ করিলেন। ইহাও কথিত আছে যে বুদ্ধসঙ্গকে সমাগরা ধরা দান করিবা মাত্র অশোক মানব লীলা সম্বরণ করিলেন।

মহারাজের অন্ত্যেষ্টিক্রিয়া সম্পাদিত হইলে রাধাগুপ্ত মন্ত্রিবর্গকে সমুদয় ঘটনা অবগত করাইলেন। তিনি বলিলেন যে অশোক একশত কোটি সুবর্ণ সঙ্গকে দান করিবেন প্রতিশ্রুত ছিলেন। ৯৬ সহস্র কোটি অর্থ প্রদত্ত হইয়াছিল, চারি কোটি সুবর্ণ অবশিষ্ট ছিল। কিন্তু যুবরাজ তাঁহাকে এই চারি কোটি পূর্ণ করিতে দেন নাই। সেই জন্য মহারাজ সমুদয় পৃথিবী দান করিয়াছেন। মন্ত্রীরা ইহা শুনিয়া চারি কোটি সুবর্ণ দিয়া সঙ্কের হস্ত হইতে পৃথিবীকে ক্রয় করিয়া লইলেন। তাহার পর তাঁহারা সম্পদিকে সিংহাসনে বসাইলেন। সম্পদের পর তাঁহার পুত্র বৃহস্পতি রাজা হইলেন; বৃহস্পতির পর বুধসেন; তাঁহার পর সূর্য্যবর্ষ্মণ এবং সূর্য্যবর্ষ্মনের পর পুষ্পমিত্র রাজা হইলেন। বিষ্ণুপুরাণে বলে যে অশোক এবং সম্পদির

পর মৌর্যবংশের আর ছয়জন রাজা হইয়া ছিলেন । তাঁহাদিগের নাম সুবংশ, দশরথ, সন্ধত, শালিশুক, সোমশর্ম্মন, বৃহদ্রথ । তাহার পর মৌর্যাদিগের সেনাপতি পুষ্পমিত্র বৃহদ্রথকে বধ করিয়া নিজে রাজা হন । এই পুষ্পমিত্র বৌদ্ধদিগের পরম শত্রু ছিল । রাজা হইবার পরই সে অশোক যেখানে যেখানে কীর্ত্তি স্থাপন করিয়া গিয়াছিলেন তাহা সকলই নষ্ট করিয়া ফেলিল । এমন কি বৃদ্ধ গয়ার মন্দিরে বুদ্ধের যে মূর্ত্তি ছিল, সে তাহার পরিবর্তে এক শিবের মূর্ত্তি স্থাপন করিয়াছিল । পরে সে কুঙ্কটআরামে গিয়া সেই আশ্রমকে একেবারে চূর্ণ বিচূর্ণ করিয়া তাহাতে বত ভিক্ষু এবং ভিক্ষুনীরা ছিল সে সকলকেই হত্যা করে । এইরূপে বৌদ্ধধর্ম্মের নাম-গন্ধও দেশে থাকে ইহা তাহার ইচ্ছা ছিল না । সে সকল স্থানে গিয়া বৌদ্ধদিগকে বিনাশ করিত এবং বৌদ্ধদিগের সুন্দর সুন্দর স্তূপ এবং বিহার সকলকে ভূমিসাৎ করিয়া ফেলিত । পুষ্পমিত্রের পর শুঙ্গ-বংশ পাটলিপুত্রে রাজত্ব করে । তাহাদিগের পর বৌদ্ধদিগের বৃদ্ধান্ত আর ইতিহাসে পাওয়া যায় না । কিছুকাল ধরিয়া সকলই অন্ধকারে আবৃত ছিল । তাহার পর কনিস্ক নামক এক জন প্রবলপরাক্রান্ত রাজা বৌদ্ধপতাকা আর একবার ভারত আকাশে উড্ডীয়মান করেন । তাঁহার সময়ে বৌদ্ধভিক্ষুদিগের চতুর্থ মহাসভা আহূত হয় ।

অশোক বলিয়াছিলেন যে পৃথিবীর প্রভু হইতে জলবিশ্বের আয় চপল এবং পরিবর্তনশীল । ইহা সত্য কথাই । এতবড় রাজা যাঁহার নামে কোটি কোটি লোক কল্পিত হইত, যাঁহার ঐশ্বর্য্যের সীমা ছিল না এবং যাঁহার ক্ষমতাতে সমুদয় ভারত অধীনস্থ হইয়াছিল । এমন রাজা পৃথিবী হইতে অন্তর্ধান করিলেন । আর তাঁহার সঙ্গে সঙ্গে তাঁহার সমুদয় কীর্ত্তিও লোপ পাইল ! কোথায় তাঁহার সময়ের ইতিহাস, কোথায় তাঁহার নাম, কোথায় তাঁহার পাটলিপুত্র নগর, কোথায় তাঁহার অগণ্য বিহার, স্তূপ এবং স্তম্ভ ?

কোথায় গেল তাঁহার ৮৪,০০০ ধর্মাদেশ ? কতকগুলি ভগ্নস্তম্ভে, কতকগুলি বিকৃত, লুপ্তপ্রায় পর্বতপৃষ্ঠে কয়েকটি অক্ষর লিখিত আছে দেখিতে পাওয়া যায় । সে অক্ষর গুলিও আর এখন প্রচলিত নাই । সে অক্ষরগুলির সংযোগে যে সকল কথা রচিত হইয়াছিল তাহাও এখনকার লোকে বুঝিতে পারে না । হা অশোক ! তোমার নাম এই লুপ্তভাষা, এই ভগ্নস্তম্ভ, এই অযুক্ত অক্ষর গুলির ভিতর হইতে বাহির করিতে হইয়াছে ! দুই সহস্র বৎসর পরে পুস্তক লিখিয়া তোমার স্বদেশীয়দিগকে বলিতে হইতেছে যে তুমি একজন মহাপ্রবলপরাক্রান্ত রাজা ছিলে ! দেখ, তুমি নাই, তোমার রাজ্য নাই, তোমার রাজধানী নাই, তোমার কীর্ত্তি নাই, তুমি যে ভাষাতে পৃথিবীকে কল্পিত করিতে সে ভাষাও নাই । কিন্তু তুমি যে ধর্ম্মে অটল বিশ্বাস স্থাপন করিয়াছিলে এবং যে ধর্ম্মের জন্ত তুমি একশত কোটি স্ববর্ণ অশ্বান বদনে দান করিয়াছিলে, সে ধর্ম্ম এখনও জগতে বিদ্যমান ! যে মহাপুরুষ সেই ধর্ম্ম স্থাপন করিয়াছিলেন, যাহার বোধি বৃক্ষকে তুমি তোমার পত্নীর হিংসা হইতে রক্ষা করিয়াছিলে; সে মহাপুরুষের নাম এখনও কোটি কোটি লোক কীর্ত্তন করিতেছে । সে বোধিবৃক্ষ এখনও পৃথিবীতে স্থানান্তরে বর্ত্তমান । সেই মহাপুরুষ পৃথিবীর লোকদিগকে যাহা শিক্ষা দিয়া গিয়াছিলেন তাহাই সত্য । সংসার ক্ষণভঙ্গুর । ঐশ্বর্য্য, খ্যাতি, প্রতিপত্তি সকলই অসার । আত্মসংযম সার । দয়া, ধর্ম্ম এবং নির্ব্বাণ আত্মার অনন্ত বিশ্রাম । অশোক, তোমার জীবন হইতে এই তত্ত্বগুলি সপ্রমাণ হইতেছে । আমরাও যেন তোমার দৃষ্টান্তে শিক্ষিত হই এবং তোমার আদর্শে সত্যের সহায়ে ইহকালে চালিত হই এবং পরকালে পরমগতি লাভ করি ।

অশোক-চরিত নাটক ।

নাট্যোল্লিখিত ব্যক্তিগণ ।

অশোক

মগধের রাজা

কুণাল

অশোকের পুত্র

বীতশোক

অশোকের ভ্রাতা .

রাধাগুপ্ত

মন্ত্রী

যশোমুনি

বৌদ্ধ ঋষি

ঋষি, নাগরিক, চণ্ডাল, কর্মচারী, দূত প্রভৃতি ।

প্রথম অঙ্ক ।

প্রথম গর্ভাঙ্ক ।

তপোবন ।

যশোমুনি আসীন ।

এক জন শিষ্যের প্রবেশ ।

শি। ভগবন, প্রণাম করিতেছি। আশ্রমের দ্বারে মহারাজ-
কুমার কুণাল উপস্থিত। আপনার সহিত সাক্ষাৎ করিবেন।

য। বৎস, তুমি শীঘ্র কুণালকে এইখানে লইয়া আইস।

শিষ্যের প্রস্থান।

কুণালের প্রবেশ।

এস বৎস, কুণাল, এস। এইখানে উপবেশন কর। রাজ-
ভবনে সকল মঙ্গল ত ?

কু। দেব, আমার প্রণাম গ্রহণ করুন। আমাকে আজ মহা-
রাজ সকালে ডাকাইয়া বলিলেন যে তুমি ভগবান যশোমুনির
আশ্রমে গিয়া সমুদয় কুশল সংবাদ লইয়া আইস। দেব, আপনার
সমস্ত মঙ্গল ত ? আশ্রম কার্য্য কুশলে নির্বাহিত হইতেছে ত ?
আপনাদিগের ধ্যানের কোন প্রতিবন্ধক হইতেছে না ত ? যখন
শিষ্যগণ সম্ভিষ্যাহারে ভিক্ষার্থ নির্গত হন, তখন প্রজাবর্গ যথেষ্ট
আদর করে ত ? ভগবতের প্রতি শ্রদ্ধা রাজ্যে বাড়িতেছে ত ?

ব্রাহ্মণ শ্রমণ উভয়ে স্ব স্ব ধর্ম কুশলে পালন করিতেছেন ত ? বিহার সমুদয় যথানিয়মে চলিতেছে ত ? ভিক্ষু ভিক্ষুণীরা ধর্মের পথে, ভগবতের পথে বিচরণ করিতেছেন ত ? রাজ্যে জীবহত্যা বাড়িতেছে না ত ? সংক্ষেপতঃ, মানুষ, মানুষী, বালক, বালিকা, ব্রাহ্মণ, শ্রমণ, ক্ষত্রিয়, বৈশ্য, শূদ্র, ভিক্ষু, ভিক্ষুণী, পশু, পক্ষী, কীট, পতঙ্গ, সকলই ত সুখে সুখে কালযাপন করিতেছে ?

য। বৎস, কুণাল, মহারাজের কৃপা অসীম। তাঁহার অনুগ্রহে এই সমাগরা পৃথিবী কম্পিতা, এবং তাঁহার ধর্মবলে সমুদয় দেবলোক মোহিত এবং পুলকিত। তাঁহার প্রভাবে ভগবান শাক্যের ধর্ম দেশবিদেশে প্রচারিত হইতেছে। কোথায় জম্বুদ্বীপ অতিক্রম করিয়া সিংহল দেশ, কোথায় গান্ধার এবং তক্ষশীলা, কোথায় কুশিনগর, দেশ বিদেশে, ভগবতের স্তূপ এবং বিহার প্রতিষ্ঠিত হইয়াছে। পৃথিবীর নিকৃষ্ট কীট পতঙ্গেরা পর্য্যন্ত মহারাজের কৃপাভাগী হইয়াছে। তাঁহারই গুণে স্থানে স্থানে মনুষ্য এবং পশুদিগের জন্ম অতিথিশালা এবং ঔষধশালা নির্মিত হইয়াছে। তাঁহার গুণ ও ঐশ্বর্য্য অশেষ এবং অসীম। তাহা হবেই বা না কেন ? ভগবৎ শাক্যের বাণী কি কদাচ নিষ্ফল হয় ? আহা ! মহারাজের কি অগাধ শ্রদ্ধা, কি বুদ্ধি, কি তেজ ! দেখ গয়ার বোধিক্রম একেবারে শুষ্ক প্রায় হইয়া গিয়াছিল। তাহার পর তাঁরই যত্নে ক্রমাগত দুগ্ধ পান করাইতে করাইতে সেই বৃক্ষ আবার সতেজ হইয়াছে। এখনও সেই বোধি বৃক্ষ দুই সহস্র বৎসর জীবিত থাকিবে, এবং সেই বৃক্ষের একটা শাখা মহেন্দ্র-কুমার সিংহলে লইয়া স্থাপিত করিয়াছেন। তাহার পরমায়ু আর কত সহস্র বৎসর থাকিবে কে বলিতে পারে ? বৎস, যত দিন বোধিবৃক্ষের একটি পল্লবও জীবিত থাকিবে তত দিন তোমার পিতার নাম এই ক্ষিত্রিয়গণে বি রাজ করিবে।

কু। ভগবন্, আপনার আশীর্বাদে কি না হইতে পারে ? মহারাজাধিরাজ আমাকে আরও বলিলেন যে, কুণাল, তোমাকে দেখিয়া পর্য্যন্ত যশোমুনি অত্যন্ত কাতর হইয়াছেন। কি জন্ম তাঁহার মনে এত কষ্ট হইয়াছে তাহা জানিয়া এস এবং কি করিলে তাঁহার যাতনা দূর হয়, তাহাও করিও। এ দাস সেই সকল কথা জানিবার জন্ম এখানে উপস্থিত হইয়াছে।

য। বৎস, তুমি আসিয়াছ ভাল করিয়াছ। দেখ, তোমাকে দেখিয়া পর্য্যন্ত যেমন আমার মন তোমার স্নেহেতে আকৃষ্ট হইয়াছে, তেমনি আবার তোমার ভবিষ্যৎ ভাবিয়া আমার মন দুঃখে বিগলিত হইতেছে। কুণাল, হায় ! তোমার সৌন্দর্য্য, তোমার নিরুপম চক্ষের কান্তি অধিক দিন থাকিবে না।

কু। ভগবন্, শরীর যে ক্ষণস্থায়ী তাহা সকলেই অবগত আছে। কিন্তু কি প্রকারে আমি এই অবশ্যম্ভাবী ঘটনার উপরে মনঃসংযোগ রাখিব, এবং তাহার জন্য প্রস্তুত থাকিব, তাহা দাসকে বলিয়া দিন।

য। বৎস, তোমার সঙ্গে এ বিষয়ে অনেক কথা বলিতে গেলে হৃদয় বিদীর্ণ হইয়া যায়। সংক্ষেপে এই বলিতেছি যে তুমি প্রতিক্ষণ, জাগ্রদবস্থায়, কেবল এই শ্লোকটি ধ্যান ও ধারণা করিবে—

ইদং ন চক্ষুর্মম ভৌতিকং চিরং
সুচারু তিষ্ঠেৎ ননু যাম্যতি ক্ষয়ং ।
কদা সমায়াৎ সূদিনং যদা ভবেৎ
বিকাশিতং জ্ঞানবিলোচনং মম ॥

কু। ভগবন্ যথেষ্ট হইয়াছে। আমি এই পরামর্শ দিন রাত্রি, শয়নে স্বপ্নে, জাগিয়া, মন্ত্ররূপে কল্পনা ও উচ্চারণ করিব। এখন তবে বিদায় হই। প্রণাম।

য। এস বৎস, তোমার চিরমঙ্গল হউক। উভয়ের প্রস্থান।

দ্বিতীয় গর্ভাঙ্ক ।

অরণ্য—এক ঋষি আসীন ।

অশোক এবং বীতশোকের প্রবেশ ।

বী । ভগবন্, প্রণিপাত করি, আশীর্ব্বাদ করুন ।.

অ । ভগবন্, প্রণমামি, আশীর্ব্বাদ করুন ।

ঋ । মঙ্গল হউক । এই খানে উপবেশন করুন । বোধ হয় আপনারা অত্যন্ত পরিশ্রান্ত হইয়াছেন । এখানে ক্ষণকাল বিশ্রাম করুন ।

অ । ভগবন্, আমরা মৃগয়া করিতে আসিয়া পথভ্রাস্ত হইয়াছি । তা আমরা অধিক ক্ষণ থাকিব না, ক্ষণকাল বিশ্রাম করিয়াই গমন করিব ।

বী । ভগবন্, আপনি কত কাল এই অরণ্যে বাস করিতেছেন ?

ঋ । দ্বাদশ বর্ষ ।

বী । আপনার আহার কি ?

ঋ । এই অরণ্যের ফলমূলাদি ।

বী । পানীয় ?

ঋ । বরষার নির্মূল জল ।

বী । শয়ন কিসে হয় ?

ঋ । পরিষ্কার প্রকৃতির ঘাসের শয্যা ।

বী । আচ্ছা, এত কঠোর তপস্যার মধ্যে আপনার মনে কখন কুচিন্তা আসে ?

ঋ । আসে বৈকি ? বিশেষ চেষ্টা করিয়াও মনকে কুচিন্তা হইতে উদ্ধার করিতে পারি না ।

অ । বীতশোক, আর অধিক প্রশ্নের প্রয়োজন নাই । চল, ভগবান্ ভানু অন্তাচলে যাইতে উদ্যত হইয়াছেন । এই সময় প্রস্থান না করিলে অদ্য রাজধানীতে প্রত্যাগমন করা দুঃসাধ্য হইবে ।

ঋ । বৎস, আমিও আশ্রমাভিমুখে গমন করি। আপনারা নিরাপদে গৃহে গমন করুন। [ঋষির প্রস্থান।

বী । দেখিলেন, মহারাজ। আপনাদের ধর্ম কেবল ভাণ মাত্র। এই ঋষি দ্বাদশ বর্ষ কাল অরণ্যে ঘোর তপস্যা করিয়াও মন হইতে পাপপ্রবৃত্তিকে দূর করিতে পারেন নাই। আর একজন বৌদ্ধ স্থাসনে বসিয়া অনুচর দ্বারা বেষ্টিত হইয়া মনে করেন যে আমার মত ধার্মিক এ ত্রিজগতে আর নাই। হুঃ—যে সনাতন ধর্ম আবহমান কাল পর্য্যন্ত ধনী দরিদ্র সকলকে সুখী করিতেছে, তাহা হইল কদর্য্য এবং কুৎসিত, আর যে ধর্ম বলে—সুখ কর, ব্যভিচার কর, যথেষ্টাচার কর, তাহাই হইল উৎকৃষ্ট এবং আশ্চর্য্য। শাক্যসিংহ ২৯ বৎসর কাল রাজ্যসুখ এবং ইন্দ্রিয়সুখ ভোগ করিয়া শেষে বৈরাগী হইয়া কি করিলেন—না নাস্তিকতা প্রচার করিলেন। যেমন গুরু তেমনি শিষ্য—শিষ্যেরা আবার গুরু অপেক্ষা বুদ্ধিমান। কেন না গুরু বনে গিয়াছিলেন; শিষ্যেরা সংসারে থাকিয়া ইন্দ্রিয়সুখ ভোগ করিয়া, আর কোথাও যাইতে চায় না। মহারাজ, তাই বলি এ ছাই ধর্ম ছাড়ুন। ইহাতে আপনার গৌরব কমিতেছে বই বাড়িতেছে না।

অ । বীতশোক, তোমার কথা শুনিবার অনেক সময় আছে। এখন চল সন্ধ্যা হইল। বাড়ী যাই।

উভয়ের প্রস্থান।

তৃতীয় গর্তাঙ্ক।

রাজভবন।

অশোক এবং রাধাগুপ্ত মন্ত্রী আসীন।

অ । এ আমার প্রাণে সহ্য হয় না। আমি হইলাম এই জম্বুদ্বীপের মহারাজ। আমার নামে দেশ দেশান্তরের মহীপালেরা কম্পান্বিত কলেবর। আমার প্রতাপে মৌর্য্যবংশ পৃথিবীর এক সীমা হইতে

সীমান্তর বিখ্যাত । যেখানে আমার ধর্ম প্রেরণ করিতেছি সেই খানেই তাহার আদর । আমার নামের সহিত ভগবৎশাক্যের নাম গৃহে গৃহে আদৃত হইতেছে । আর ইহা কি লজ্জার বিষয় নহে যে আমার সহোদর ভাই, বীতশোক, কালে অকালে কেবল আমার ধর্ম লইয়া ঠাট্টা করে আর ভগবতকে অপমান করে । ইহা আর সহ্য হয় না । একটা বিশেষ বিধি করিয়া বীতশোককে আমার দলে টানিয়া আনিতে হইবে । রাধাগুপ্ত !

রা । ধর্মাবতার, অম্লদাতা !

অ । আজ যখন রাজসভা হইতে স্নান করিবার নাম করিয়া উঠিব তখন তুমি কোন প্রকারে আমার মুকুট বীতশোকের মাথায় পরাইবে, এবং যখন কৌশলক্রমে তাহাকে সিংহাসনে বসাইবে, তখন আমায় তাহার সংবাদ পাঠাইও ।

রা । যে আজ্ঞা, মহারাজ, তাহাই হইবে ।

উভয়ের প্রস্থান ।

চতুর্থ গর্ভাঙ্ক ।

বীতশোক এবং অন্যান্য মন্ত্রী এবং রাধাগুপ্ত উপস্থিত ।

রা । মহারাজ, ঠিক হইয়াছে । রাজাধিরাজ স্নানে গমন করিয়াছেন । আমার অনেক দিনের একটা মনের সাধ ছিল তাহা বলি । অর্থাৎ কিনা, রাজাধিরাজের বয়ঃক্রম অধিক হইয়া আসিতেছে । আর অধিক দিন যে এ ধরণীতলে বিচরণ করেন তাহার বিশেষ কোন প্রত্যাশা নাই । তাহার স্বর্গারোহণের পর আপনাকেই সিংহাসনারোহণ করিতে হইবে । তা এই সময় রাজাধিরাজ অনুপস্থিত । আপনি একবার ঐ মুকুট পরিধান করিয়া সিংহাসনে বসেন আমার নিতান্ত বাসনা । দেখি, আপনাকে বসিলে কি রকম দেখিতে হয় ।

বী। দূর পাগল ! তাহাও কি হয় । দাদা জানিতে পারিলে কি বলিবেন ।

রা। আজ্ঞা, আমার কথাটা নিতান্ত তাচ্ছল্য করিবেন না । মহারাজ দিবাবসান না হইলে আর রাজসভায় উপস্থিত হইতেছেন না । আপনি অক্লেশে সিংহাসনে বসিতে পারেন । দোহাই, আমার কথাটা রাখুন ।

পারিষদ । মহারাজ, বলুন তো আমি দ্বার সকল বন্ধ করিয়া দিতেছি । কেহ আসিতে পারিবে না ।

সকলে । তাই ভাল, তাই ভাল । মহারাজ, আমাদের কথাটা রাখিতে হইবে ।

বী। আচ্ছা, তোমরা যখন এত পাগল হইয়াছ, আমারও একবার পাগল হইতে ক্ষতি কি ?

[সিংহাসনে উপবেশন ।

অশোকের প্রবেশ ।

অ। কি ! বীতশোক সিংহাসনে আরুঢ় ! আমি জীবিত থাকিতে আমার মরণকামনা । এত বড় স্পর্দ্ধা, এত বড় স্পৃহা ! কেও !

তিন জন কর্মচারীর প্রবেশ ।

মহারাজাধিরাজের জয় ! মহারাজাধিরাজের জয় ! মহারাজাধিরাজের জয় !

অ। বীতশোককে এখান হইতে লইয়া যাও !

ক। যে আজ্ঞা, মহারাজ ।

প্রথম । বীতশোক, এই তোমার শেষ সূর্য্য ।

দ্বিতীয় । বীতশোক, এই শেষ রাজমুখ দর্শন কর ।

তৃতীয় । বীতশোক, এই তোমার শেষ দিন ।

সকলে । মহারাজ বীতশোকের মস্তক এখনি লইয়া উপস্থিত করিতেছি ।

[বীতশোককে বন্ধন ।

রা । মহারাজ, কি করেন, কি করেন ? আমি আপনার চরণ ধরিয়া মিনতি করিতেছি, বীতশোককে প্রাণে নাশ করিবেন না । বীতশোক আপনার সহোদর । তাঁহাকে মারিলে আপনার নামে চিরকাল কলঙ্ক থাকিবে ।

অ । রাধাগুপ্ত, পা ছাড় । বীতশোকের অত্যন্ত স্পর্ধা হইয়াছে । প্রাণদণ্ড ব্যতীত আর কিছুই দেওয়া যায় না । যাহা হউক, তোমার কথাটা আমি রাখিলাম । বীতশোক আমার ভাই । বীতশোক রাজ্য লইতে নিতান্ত কামনা করিয়াছে । সেই জন্য আমার আজ্ঞা এই যে আজ এখনি রাজ্যময় ঘোষণা করিয়া দাও যে বীতশোক সাত দিনের জন্য মগধের রাজা হইলেন । এই সাত দিনে যত প্রকার স্মৃশ্রাব্য বাদ্য আনিতে পার আনিবে । স্নগন্ধ দ্রব্য পুষ্প এবং চন্দন দ্বারা বীতশোক সেবিত হইবেন । যত প্রকার মণি মাণিক্য থাকে তাহা দ্বারা সহোদরের শরীর ভূষিত হইবে । কিন্তু সাত দিন হইয়া গেলেই বীতশোকের মৃত্যু হইবে ।

[অশোকের প্রস্থান ।

পঞ্চম গর্তাঙ্ক ।

রাজসভা ।

বীতশোক এবং পারিষদবর্গ আসীন ।

রাধাগুপ্ত । (বীতশোককে সিংহাসনে বসাইয়া) হে অমাত্যগণ, হে জম্বুদ্বীপের প্রজাগণ, শ্রবণ কর । যেহেতু মহারাজাধিরাজ শ্রীল শ্রীযুক্ত অশোক সিংহ অধিককাল রাজ্যভার বহন করিয়া কাতর হইয়াছেন, এবং যেহেতু তাঁহার পক্ষে বিশ্রাম নিতান্ত আবশ্যক হইয়া পড়িয়াছে, অদ্য সকলকে বিশেষরূপে বিজ্ঞাপন দেওয়া যাইতেছে যে আমাদিগের অন্নদাতা মহারাজা সপ্ত দিবসের জন্য রাজ কার্য্য হইতে অবসর লইলেন । তিনি এই কয়েক দিবস ভগ-

বান্ধে যশোমুনির আশ্রমে ভগবচ্চিস্তায় দিন যাপন করিবেন । ইতি-
মধ্যে তাঁহার ভ্রাতা বীতশোক জম্বুদ্বীপের রাজা হইবেন । পাটলি-
পুত্রের প্রজারা, আবাল বৃদ্ধ বনিতা, সকলে এই সুসমাচার পাইয়া
আনন্দসূচক ধ্বনি করুক । জম্বুদ্বীপের যত করদাতা মহারাজা,
রাজা, ভূম্যধিকারী আছেন সকলে আপন আপন পদ এবং মর্যাদা
অনুসারে এই শুভ ঘটনাকে সম্মাননা করিতে ক্রটি করিবেন না ।
আজ হইতে এক সপ্তাহ কাল এই রাজগৃহে নৃত্য গীত বাদ্য ভিন্ন
আর কোন ধ্বনি প্রবেশ করিতে পারিবে না । এক সপ্তাহের জন্ত
রোগ, শোক, তাপ জম্বুদ্বীপ হইতে নির্বাসিত হইয়া যাইতেছে ।
এখন সকলে বল, বীতশোক মহারাজের জয় !

(বীতশোকের দিকে তাকাইয়া) মহারাজ, আপনাকে সম্ভাষণ
করিতে পাটলিপুত্রের সম্রাস্ত লোকেরা সমাগত হইয়াছেন । সাত
দিবস আপনাকে এই ভাবে কাটাইতে হইবে—শরীর মন প্রাণ
কেবল সুখেতেই নিমগ্ন থাকিবে । দুঃখ দূর হইল । রজনী চলিয়া
গেল—প্রভাতের তারকা উদিত হইল ! সহাস্যবদনে, প্রফুল্লমনে
প্রজাবর্গকে আপ্যায়িত করুন । আমি এক এক জনকে রাজ-
সিংহাসন তলে আনিয়া উপস্থিত করিতেছি ।

{ উপঢৌকন দান ।
{ আনন্দ ধ্বনি ।

নেপথ্যে গান ।

জয় ! জয় ! মহারাজ ! জয় ! বীতশোক জয় !

পোহাইল দুখনিশি, সুখরবি সমুদয় !

অতুল আনন্দ ভরে,

নাচ, গাও, ঘরে ঘরে,

শোক তাপ ধরা হতে হইল আজি বিলয় ।

রাধাগুপ্ত । মহারাজ, অত্যন্ত ক্লান্ত হইয়া থাকিবেন । এখন

গাত্রোত্থান করুন। আহা-রা-দি করিতে হইবে।

[মহারাজের গাত্রোত্থান।

তিন জন কর্মচারী। মহারাজ, সাত দিনের এক দিন গেল !
আর হয় দিন আছে !

[বীতশোকের প্রস্থান।

ষষ্ঠ গর্ভাঙ্ক।

অশোক এবং রাধাগুপ্ত।

অ। রাধাগুপ্ত, বীতশোকের সাত দিনের রাজত্ব শেষ হই-
য়াছে। তাহাকে আমার কাছে উপস্থিত কর।

রা। যে আজ্ঞা, মহারাজ।

[বীতশোক এবং তিন জন কর্মচারীর প্রবেশ।

মহারাজাধিরাজের জয় ! মহারাজাধিরাজের জয় ! মহারাজা-
ধিরাজের জয় !

অ। এস ভাই বীতশোক, এস। তবে সাত দিন সুখে রাজ্য
করিয়াছ ত ?

[বীতশোক মর্মানভাবে দণ্ডায়মান।

বলি, সাতদিন কুশলে রাজ্য করিয়াছ ত ?

[বীতশোক মর্মানভাবে অবস্থিত।

বলি, ও বীতশোক, বীতশোক, সাত দিন প্রাণভরে শুখ সন্তোষ
করিয়াছ ত।

বী। ম-ম-হা-রাজ, আ-আ-মার প্রাণ বু-বু-কের গো-গো-ড়ায়
এয়েছে। বা-বা-করোধ হ-হয়েছে।

অ। সেকি ? তুমি সাতদিন ত রাজসভায় ছিলে ?

বী। ছি-ছিলাম ত।

অ। তবে সেখানে তোমার জন্ম যে নৃত্য গীত হইয়াছিল,

ফুল চন্দনাদি দেওয়া হইয়াছিল, তাহা কি সন্ভোগ কর নাই? পৃথিবীর যত সুগন্ধ, সুস্বাদু, দেবগণ বাঞ্ছনীয় সুভোগ্য পদার্থ তোমার আকর্ষণের জন্ত আনীত হইয়াছিল, তাহা কি তুমি দেখ নাই?

বী। ব-ব-লব কি। রা-রা-জসভায় বসে য-য-ত বার ভু-ভু লিতে চেষ্টা ক-করি, ত-ত-তবার ঐ তি-তিনটে মি-মি-নসের মুখ চো-চো-কে পড়ে। প্রথম দিন হ-হয়ে গেল, রা-রাজ সভা থেকে বেরোবার স-সময়ে ঐ তি-তিনটে মিন্সে বলে উঠিল, ম-ম-মহারাজ, এক দিন গেল আর ছ-ছয় দিন আছে। কি দিন ঐ রকম ক-করে বলে। ম-ম-মহারাজ, মৃ-মৃ-মৃত্যু সম্মুখে থাকিলে কি আর সু-সু-খকে মনে হয়।

অ। রাধাপুত্র, ঐ তিন জনকে যেতে বল। (সহাস্যে) তাই, বীতশোক, তুমি এত ভয় পেয়েছ? আর তোমার কোন চিন্তা নাই। আমি একটা কথা বলিতেছি, শুন। তুমি সেই ঋষির আশ্রমে আমাকে বলিয়াছিলে—মনে আছে ত?—যে সুখাসনে বসিয়া ধর্ম করা যায় না, যেহেতু ঋষিরা দ্বাদশ রংসর কঠোর তপস্তা করিয়াও মন হইতে কুচিন্তা তাড়াইতে পারেন নাই। আচ্ছা, এখন বল দেখি তোমার মনে কি হয়? তোমাকে রাজসিংহাসনে বসাইয়া দিলাম, পৃথিবীর যত প্রকার সুখাদ্য দ্রব্য তোমার সম্মুখে রাখিয়া দিলাম, তথাপি তুমি মৃত্যুর ভয়ে সে সকলই বিস্মৃত হইলে। যাহারা ধর্ম গ্রহণ করে, তাহারা কি মৃত্যুকে দিন রাত্রি চক্ষের সম্মুখে রাখে না? তবে বনেই থাকুক, আর রাজত্ববনেই থাকুক, কোন অবস্থাতে তাহারা সাংসারিক সুখে নিবিষ্ট হইতে পারে না। আমাদের ভগবতের ধর্ম সেইরূপ জানিবে। ইহাকে কখন নিন্দা করিও না।

বী। মহারাজ, আর বুঝাইতে হইবে না। আপনি আমাকে বিশেষ শিক্ষা দিয়াছেন! আজই আমি ভিক্ষুব্রত অবলম্বন করিব এবং গৈরিক পরিধান করিয়া এবং কমণ্ডলু হাতে লইয়া বাহির হইব।

(প্রস্থান)

দ্বিতীয় অঙ্ক ।

প্রথম গর্ভাঙ্ক ।

রাধাপুত্র আসীন ।

রা। যাহাইউক বীতশোক মহারাজকে খুব জন্ম করিয়াছেন । মহারাজা কোথায় ভাইকে ভাল করিবেন, না ভাই ভাল হইয়া এখন মহারাজকে শিক্ষা দিতেছেন । বীতশোক আসিয়া বলিলেন, আমি ভিক্ষু হইব । মহারাজা কোনমতে পরাস্ত করিতে না পারিয়া অবশেষে রাজভবনের মধ্যে বীতশোকের জন্য একটি আশ্রম প্রস্তুত করিয়া দিলেন এবং বলিলেন রাজভবনে সকলের নিকট ভিক্ষা করিও । এ রকম বৈরাগ্য কদিন থাকে ? বীতশোক একদিন প্রাতে উঠিয়া কোথায় চলিয়া গিয়াছেন কেহই জানিতে পারে নাই । যাহা হউক এসকল ঘটনা থেকে শুভ আশা অধিক হয় না । মহারাজার বয়ঃক্রম বাড়িতেছে, ধর্মও বাড়িতেছে বটে । কিন্তু তাহার সঙ্গে সঙ্গে রাগও বাড়িতেছে । রাজার রাগ বৃদ্ধি হওয়াটা রাজ্যের পক্ষে মঙ্গলকর নহে ।—কেও !

[নেপথ্যে—ধর্মাবতার !

পুণ্ড্রবর্দ্ধন হইতে যে কর্মচারী আসিয়াছে তাহাকে পাঠাইয়া দেও ।

[নেপথ্যে—যে আজ্ঞা ।

কৰ্মচারীর প্রবেশ ।

ক । ধৰ্ম্মাবতার, কি আজ্ঞা হয় ?

রা । তুমি এই মুহূর্তে পুণ্ড্রবর্ধনে কিরিয়া যাও এবং সেখানে গিয়া এই পত্রের মধ্যে উল্লিখিত আজ্ঞা সর্বসাধারণকে অবগত করাইবে । ‘.

ক । আজ্ঞাটা কি জানিতে পারি না ?

রা । পত্রে ইহা লিখিত হইল—

“যেহেতু মহারাজাধিরাজ লোক পরম্পরায় এবং দূতের মুখে শ্রুত হইলেন যে পুণ্ড্রবর্ধন এবং পাটলিপুত্র নগরে ব্রাহ্মণদিগের এত বড় স্পর্ধা হইয়াছে যে তাহারা অনেক স্থানে ভগবৎ বুদ্ধের প্রতিমূর্তি চূর্ণ বিচূর্ণ করাইতেছে । আজ্ঞা হইল যে যে কোন লোক মহারাজাধিরাজের নিকট কোন ব্রাহ্মণ সম্মাসীর মুণ্ডচ্ছেদন করিয়া আনিতে পারিবে তাহাকে এক দীনার পারিতোষিক দেওয়া হইবে । লিখিত ক্রীরাধাশুপ্ত, মন্ত্রী, পাটলিপুত্র ।”

ক । কি ভয়ানক ব্যাপার ! ধৰ্ম্মাবতার, আমি পত্র লইয়া এখন যাই, নতুবা আমারও মস্তক যাইবে ।

[প্রস্থান ।

রা । কেও ! তক্ষশীলা হইতে যে দূত আসিয়াছে তাহাকে পাঠাইয়া দেও ।

দূতের প্রবেশ ।

দূত । ধৰ্ম্মাবতারের কি আজ্ঞা হয় ?

রা । তক্ষশীলার প্রজারা বিদ্রোহী হইয়াছে, মহারাজা তদ্বিষয় অবগত হইয়াছেন । আজ্ঞা হইল যে, মহারাজ কুমার কুণাল স্বরায় সৈন্য সামন্ত লইয়া তক্ষশীলাভিমুখে গমন করিবেন । তুমি এখনি যাইবার আয়োজন কর এবং কুমার সেনাপতির পথে কোন কষ্ট না হয় এমন যত্ন করিও ।

দূ । যে আজ্ঞা ।

[প্রস্থান ।

রা। তবে এখন যাওয়া থাক। যুদ্ধ যাত্রার আয়োজন করিয়া দিতে হইবে। [প্রস্থান।

একজন কৰ্ম্মচারীর প্রবেশ।

ক। আহা! হা! কি কাজ করিতেই মহারাণী তিম্বরক্ষিতা আমাকে তাঁর বাপের বাড়ী থেকে ধরিয়া এনেছেন। কোথায় দেশে থাকিয়া লাড়ু আর পুরি খাব, না যতপ্রকার দুর্গন্ধময় কাজে হাত দিতে হচ্ছে। সে দিন মহারাজার বিষম অনুখ হইল—কবিরাজেরা বিদায় লইলেন, আর আমাদের মহারাণী করলেন কি না একটা বাহিরের বুড়ো মেয়ে মানুষকে ডাকাইয়া জানিলেন যে তারও সেইরূপ গীড়া হইয়াছে। অমনি আমার উপর আজ্ঞা হইল যে আমি সেই মেয়ে মানুষটাকে মরে ফেলি। ফেলিলাম মেরে। তারপর তার শরীরটা কেটে দেখলে যে তার ভিতর একটা মস্ত পোকা নড়চে। সেই পোকাটা পেঁয়াজ দিতেই মরে গেল—সুতরাং পেঁয়াজ খেয়ে মহারাজও আরাম হইলেন।

এবার আবার আর একটা দুর্কর্মে প্রবৃত্ত হয়েছি। তিম্বরক্ষিতার কুণালের উপর ছুরভিসন্ধি হইয়াছিল। কুণাল সাক্ষাৎ ভগবান, মহারাণীর চক্রে পড়িবেন কেন? কিন্তু লক্ষ্মীছাড়ীর রাগ হইতে রক্ষা পাওয়া কার সাধ্য? আজ আমার উপর লুকুম হইল যে মহারাজা যখন ঘুমাইবেন তখন তাঁহার মোহরটি চুরি করিতে হইবে। ঘরে ঢুকেই দেখি বেগতিক। মহারাজ “কুণাল, কুণাল” বলে চীৎকার করে উঠিলেন। আমি দে ছুট। আবার ঢুকি—আবার চীৎকার। অবশেষে কোন রকমে মোহরটি চুরি করে এই গালার উপরে লাগাইয়াছি। এই চিটি খানা কুণালের যে কি সর্বনাশ করিবে বলিতে পারি না। ভগবন্, ভগবন্, লক্ষ্মীছাড়ী তিম্বরক্ষিতা কবে নরকে গিয়া পচে মরিবে, বলে দেও। আর দুর্কর্ম্ম করিতে পারি না। শরীর মন থাক হইল। যাই—

[প্রস্থান

দ্বিতীয় গর্ভাঙ্ক।

তক্ষশীলা।

কুণাল আসীন।

কু। আজ কেমন ভাল লাগিতেছে না। যে দিন পাটলিপুত্র রাজ্যে বসে বিমাতা আমার প্রতি খড়্গহস্ত হইলেন সেই দিন বুঝি-লাম আমার শরীর জীবন শেষ হইল এবং আধ্যাত্মিক জীবনের আরম্ভ। নূতন জন্ম না হইলে ত আর মন সংসারে তিষ্ঠিতে পারিতো না। যাহা হউক প্রস্তুত আছি—বিপদের জন্য প্রস্তুত থাকা এবং বিপদকে পরাস্ত করা এ দুই এক।

[কয়েকজন নাগরিকের প্রবেশ।

সকলে। মহারাজের জয় হউক।

কু। আসুন। এমন অসময়ে আপনারা আসিয়াছেন বোধ হয় কোন গুড় কারণ আছে। প্রজারা ত আবার বিদ্রোহী হয় নাই?

১ না। মহারাজ, সর্বনাশ হইয়াছে! আর কি বলিব। পাটলিপুত্র হইতে এই পত্রখানি প্রেরিত হইয়াছে। ইহা পাঠ করিয়া পর্যন্ত আমাদের মাথায় বজ্রাঘাত লাগিয়াছে। না পড়িলে নয় এই জন্ম পড়িতে হইতেছে। [পত্র পাঠ করিতে উদ্যত। দ্বিতীয় নাগরিকের প্রতি] ও মহাশয়, আমার ত চক্ষু অশ্রুতে পরিপূর্ণ হইল। আপনি পড়ুন।

২ না। মহাশয়, আমাকে মার্জনা করুন। ও কাজ আমার দ্বারা হইবে না। (৩ যের প্রতি) ও মহাশয়, আপনি পড়ুন না।

৩ না। আচ্ছা দিন।...ও বাপরে, ঠিক যেন একটা সাপ হাতে এল রে। মহারাজ, আপনি পড়ুন।

কু। এমন কি সর্বনাশ হইয়াছে যে আপনারা কেহ পড়িতে পারিলেন না? দেখি, আমাকে দিন দেখি। [পাঠ।

আ! এত দিনের পর সেই দিন আসিল। বন্ধুগণ, আপনারা

আজ প্রকৃত বন্ধু হইয়া আসিয়াছেন । এই পত্রে মহারাজা আপনাদের অনুজ্ঞা দিতেছেন যে আপনারা পত্র পাঠ আমার চক্ষুদ্বয় উৎপাটন করিবেন—নতুবা আপনাদের প্রাণ দণ্ড হইবে ।

স । মহারাজ, এমন কাজ আমরা কিরূপে করি ?

কু । বন্ধুগণ, আপনারা ত জানেন যে আমার পিতা ঠাকুর ক্রোধান্বিত হইলে সব করিতে পারেন । অতএব আপনারা যদি তাঁহার আজ্ঞা পালন না করেন আপনাদেরই অমঙ্গল হইবে । সেই জন্ত শীঘ্র এই কার্যে তৎপর হউন । এখনি একজন চণ্ডালকে ডাকুন । পিতৃ আজ্ঞা আমার শিরোধার্য্য । এখনি তাহা পালন করিতেই হইবে । মহাশয়, আপনি একজন চণ্ডালকে ডাকিয়া আনুন ।

১ । মহারাজ, আপনার পিতার নামে আমি কম্পিত হইতেছি । বাহা আজ্ঞা দিলেন তদনুসারে কার্য্য করিব । কিন্তু এমন পুত্রকে দণ্ড দিতে কোন্ পিতার রুচি হয় ?

[প্রস্থান ।

১ নাগরিকের সহিত চণ্ডালের প্রবেশ ।

চণ্ডাল । মহারাজের কি আজ্ঞা হয় ?

কু । ভাই, আমার বড় উপকার করিতে আসিয়াছ । পিতা ঠাকুরের আজ্ঞা যে তুমি আমার চক্ষু দুটি উৎপাটন করিয়া লও ।

চ । কি ? আপনার পিতা ঠাকুর ? আপনার চক্ষু ? আমি ? মাপ করুন, ধর্ম্মাবতার, আমার দ্বারা ও কন্দ্ব হইবার নয় । আমি কি অমন সোণার আকাশ থেকে অমন দুটি নক্ষত্র খসাইয়া নিতে পারি ? আমাকে আর আজ্ঞা করিবেন না, আমি পালাই । [প্রস্থান ।

কু । বন্ধু, আপনি যদি অনুগ্রহ করিয়া আর কাহাকে ডাকাইয়া আনেন ।

[২ নাগরিকের প্রস্থান ।

পুনঃপ্রবেশ ।

২ না । ধর্ম্মাবতার, কাহাকেও ত পাইলাম না । তবে সহরের মধ্যে একজন এ দেশীয় চণ্ডাল আছে, সে তাহার পুত্রের ঐরূপ চক্ষু

উপড়াইয়া তাহার প্রাণ হত্যা করিয়াছে। তাহাকে বলাতে সে স্বীকার করিল—এখানে উপস্থিত ।

চণ্ডালের প্রবেশ ।

কু। কি ভাই, তুমি আমার এ উপকারটি করিতে পারিবে ?

চ। হুঁ।

কু। এখনি করিতে প্রস্তুত ?

চ। হুঁ।

কু। শীঘ্র পারিবে ?

চ। হুঁ।

কু। তবে এস।

চ। হুঁ। [একটি চক্ষু উৎপাটন।

সকলে। হায় ! হায় ! হায় ! যেন আকাশমণ্ডল হইতে চন্দ্র খসিয়া পড়িল। যেন একটি পদ্ম পুষ্করিণী হইতে উৎপাটিত হইল। কি হল, কি হল, আমাদের সর্বনাশ হইল।

কু। ভাই, এ চক্ষুটি আমার হাতে দেও দিখি। (দেখিয়া) হায় ! তোমারই এত গৌরব, হে চক্ষু। তুমি কুণাল পক্ষীর চক্ষুর মত সুন্দর বলিয়া আমার নাম কুণাল হইয়াছিল। তোমার সে সৌন্দর্য্য কোথায় গেল ? আর কেন তুমি দেখিতে পাইতেছ না, হে স্বর্ণিত মাংসপিণ্ড ! হায় ! লোকেরা কি নির্বোধ যখন তাহার। তোমাকে দেখিয়া বলে যে এই তো আমি। ছি ! ছি ! তুমি এখন এমনি স্বর্ণিত হইয়াছ যে তোমাকে স্পর্শ করিতে আমার ঘৃণা হইতেছে। যে লোক তোমাকে ক্ষণস্থায়ী জানিয়া তোমার সহিত ব্যবহার করে, সেই বিপন্যুক্ত, চিদানন্দ। এস ভাই, ফের এস।

[আর একটি চক্ষু উৎপাটন।

কু। দেও ত ভাই আমার হাতে। হায় ! এবার আর দেখিতে পাইলাম না ! কিন্তু এ কি ! আমার ত চক্ষু যায় নাই। আমি যে সব দেখিতে পাইতেছি। স্বর্গের শোভা যে আমার সম্মুখে

হঠাৎ উদ্ভিত হইল । ঐ যে দেবগণ আমাকে সহাস্য বদনে অভ্যর্থনা করিতেছেন ! তাইত এ যে জ্ঞান চক্ষু । চক্ষু চক্ষুর পরিবর্তে জ্ঞান চক্ষু পাইলাম । আমাকে মহারাজ ত্যাগ করিলেন, কিন্তু ধর্মরাজ ভগবান যে আমাকে গ্রহণ করিলেন । আমি রাজ্য সুখ ছাড়িয়া যে স্বর্গের সুখ পাইলাম । ভাই, তোমাকে উষ্ণীষটি দান করিলাম । তোমার অনুগ্রহে আমি আজ ধর্মরাজ্যের উত্তরাধিকারী হইলাম । বন্ধুগণ, তোমাদের ধন্যবাদ দিলাম । এখন আমাকে রাস্তার ভিখারী করিয়া ছাড়িয়া দেও । [কুণালকে লইয়া গমন]

তৃতীয় গর্ভাঙ্ক ।

রাধাগুপ্তের প্রবেশ ।

রা । যা বলেছিলাম তাই হইল । সেই সময় বলেছিলাম, মহারাজ, এমন আজ্ঞা দিবেন না । এখন কি হয় ? মানুষের কি লোভ । এক দীনারের লোভে ঝাঁকে ঝাঁকে ব্রাহ্মণ ভিক্ষুদের মুণ্ড আসিয়া পড়িতেছে । যেমন কর্ম তেমনি ফল । সে দিন যেমন একটি মুণ্ড উপস্থিত করিল, দেখিলাম যে তাহা বীতশোকের মস্তক । একজন আতীরের বাড়ীতে বীতশোক আশ্রয় লইয়াছিলেন । এমন সময় সে আর তার পত্নী দীনারের লোভে ব্রাহ্মণ ভাবিয়া তাহাকে কাটিয়া ফেলে । এখন মহারাজ কপালে হাত দিয়া বসিয়াছেন— বলিতেছেন যে কেনই বা এমন আজ্ঞা দিয়াছিলাম । ভগবৎ কে বিশ্বাস করিলে কি হইবে ? ভগবতের উপর যে ভগবান আছেন তিনি কি রাজাকেও দণ্ড দিতে বাকি রাখেন ?

অশোকের প্রবেশ ।

অ । রাধাগুপ্ত, এখন পৃথিবী দ্বিধা হইলেই রক্ষা পাই । বীতশোকের কথা শুনিয়া ত পাগল হইয়া গিয়াছি । এখন কুণালকে ফিরিয়া পেলে যে বাঁচি । যশোমুনির কথা ভাবিলে অস্থির হই,

আর রাঁজ্রে যাহা স্বপ্ন দেখিয়াছি তাহাতে মন আরও ব্যাকুল হই-
য়াছে। রাধাগুপ্ত, সকাল হইতে আজ ঐ রথশালার দিক হইতে
কে গান গাইতেছে। আমার ঠিক বোধ হয় ও কুণাল—ঐ শুন
ফের গাইতেছে।

••

নেপথ্যে গান

রাগিণী সিদ্ধু।—তাল একতাল্য।

মন কিরে এত দিনে বুঝি না। অনিত্য সংসারে তুই মুক্তি
তো কভু পাবি না। কামনা কামনা করে জীবন মোচন কভু কি
হয়। যদি পাবি (ওরে ও মুচমন) পরম পদ, ও মন ভগবতে
ভাব না।

কামনা হইতে হয়, শোক তাপ সমুদায়; কামনায় অমঙ্গল তাকি
মন জান না।

সিদ্ধ হব যদি মন, গুরু পদে রাখি মন, কামনা (ওরে ও মুচ
মন) আশ্রমে শান্তিবারি ওমন ঢেলে দেনা।

আমার মন কেমন করিতেছে। দেখ দেখি ও কে?

রাধাগুপ্তের পুনঃপ্রবেশ।

রা। মহাশয়, ও এক জন ভিখারী আর কেহ নহে।

অ। (গান শ্রবণ) না ও কুণাল। ওকে ডাক দেখি।

রাধাগুপ্ত এবং কুণালের প্রবেশ।

অ। তুমি কে গা? তোমার গলাটি বড় মিষ্ট লাগিতেছে।
তুমি কে? (অনেকক্ষণ দেখিয়া) তুমি কি কুণাল?

কু। মহারাজ আমি কুণাল।

অ। কি! (অট্টহাস্যে) তুমি পতন বৎস কুণাল, তোমার
এমন ছদ্মশা কে করিল? এমন কোন্ পাষণ্ড মন যে তোমার এমন
অমঙ্গল করে। বল শীঘ্র করিয়া, কেন না সে পাষণ্ডকে আমি
একবার দেখিব।

ক। মহারাজ, আমার ছদ্মশা দেখিয়া ক্ষুণ্ণ হইবেন না।

ভগবান্ যশোমুনির পরামর্শে আমি এ বিপদের জন্ত সম্পূর্ণ প্রস্তুত ছিলাম এবং তাঁহারই অনুগ্রহে আমি এখন দিব্য চক্ষু পাইয়াছি ।

অ । বৎস, তুমি সে পাষাণের নাম বল । কেন না, ক্রোধানলের তেজে আমার সমুদয় স্নেহ শুষ্ক হইয়াছে । দয়া, বাৎসল্য, মমতা আমার হৃদয়ে আর কিছুই নাই । বল, বল, শীঘ্র । আমি জানিবার জন্য অধীর হইয়াছি ।

ক । মহারাজ, বলিব কি ? বলিবার মুখ নাই । তবে আমি করষোড়ে মিনতি করিতেছি যে যিনি তক্ষশীলার নাগরিকগণকে আপনার নাম জাল করিয়া আমার চক্ষু উৎপাটন করিবার আজ্ঞা পাঠান তাঁহাকে আপনি মার্জ্জনা করুন ।

অ । সে কে—কোন পাষাণ ?

ক । মহারাজ, আমি রাস্তায় আসিতে আসিতে শুনিলাম তিনি—আমার বিমাতা—

অ । তিষ্যরক্ষিতা ? বটে, সেই পাপীয়সী, কুলকলঙ্কিনী, চুরা-চারীণী, বিশ্বাসঘাতিকা তিষ্যরক্ষিতা তোমার উপর এমন শত্রুতা করিয়াছে ? কেন সে কি আর কাহাকে বিষদৃষ্টিতে দেখিতে পাইল না ? থাক, তাহার সমুচিত দণ্ড দিতেছি । রাধাগুপ্ত, আজ রাত্রে তিষ্যরক্ষিতাকে অগ্নিতে নিক্ষেপ করিবার আজ্ঞা হইল ।

ক । মহারাজ, আপনার চরণ ধরিয়া মিনতি করি আমার মাতাকে এমন শাস্তি দিবেন না । তিনি এমন কি দণ্ড দিয়াছেন ? মহারাজ, সন্তানকে কি মা শাসন করেন না ? রক্ষা করুন তাঁকে, পিতা, মার্জ্জনা করুন । আমি বলিতেছি যে পুনর্জন্মে আমার এই চক্ষু আবার দেখিতে পাইবেন ।

অ । সে কথা পরে হইবে । কুণাল, তুমি পরিশ্রান্ত হইয়াছ, এখন যাও, আহার কর, বিশ্রাম কর । হাত ধরিয়া লইয়া যাও ।

[কুণালের প্রস্থান ।

অ । রাধাগুপ্ত, আমার কন্মের ফল সব পাইলাম । এখন

একটা কথা বলি শুন। আমি এককালে প্রতিশ্রুত ছিলাম যে ভগবতের ধর্ম রক্ষার্থ কোটি স্বর্ণ ব্যয় করিব। তাহার মধ্যে ৯৬ লক্ষ স্বর্ণ দিয়াছি, আর ৪ লক্ষ অবশিষ্ট আছে। আমি স্বর্ণ, রৌপ্য নির্মিত যত দ্রব্য ছিল তাহাও যশোমুনির আশ্রমে পাঠাইয়াছি। অবশেষে ঐদ্য দ্রব্যও পাঠাইয়াছি। কেবল একটি আমলক ফল আহারের জন্য ছিল। তাহার অর্ধেকটি আশ্রমে পাঠাইয়াছি। এখন দেখ আমার আর কিছু নাই, বল দেখি এখন পৃথিবীপতি কে ?


রা। কেন, মহারাজ, আপনিই পৃথিবীপতি।

অ। আমি এখনও পৃথিবীপতি আছি ? তবে শুন। আমি এই রাজদণ্ড হাতে করিয়া বলিতেছি যে এই উত্তর দিক, ঐ দক্ষিণ দিক, এই পূর্বদিক, ঐ পশ্চিম দিক। উপরে আকাশ, নিম্নে পাতাল। ইহার অন্তর্গত সমস্ত সমাগরা পৃথিবী আমি ভগবতের ধর্ম প্রচারার্থ তাহার আশ্রমকে দান করিলাম। রাধাগুপ্ত, আমার আর কিছুই রহিল না। জম্বুদ্বীপের মহারাজ আজ অন্নবস্ত্রহীন হইয়া ভিক্ষু ব্রত লইলেন। আমার শরীর স্পন্দ রহিত হইতেছে। আমাকে এখান হইতে স্থানান্তর কর।

সকলে। আহা ! হা ! কি হইল, কি হইল।

[অশোককে লইয়া গ্রস্থান।

সমাপ্ত।



26/1/74

